

Non tlenon okichikey non itlatitlaniluan

Jesus oteili ualas non Espiritu Santo

1 Itech non kachto non nolibro, Teófilo, onitlajkuilo nochi non tlenon Jesus okichi uan nochi non oteititi ijkuak ope tekiti, ²sta ipan non tonale ijkuak otlejkok tlakpak. Kachto ijkuak ayimo otlejkoya tlakpak, ika non ipoder non Espiritu Santo okintlapejpeni non itlatitlaniluan uan okimili tlenon kichiuaskej. ³Satepan ijkuak Jesus omik, okimmotitij yoltika, ompouale tonalmej okimmotitinemiya para kimatiskej ijua melauak nemi uan okinnojnotzaya kenimejkan kampa tlanauatia Dios.

⁴Kuak Jesus oknoma oktaya inka non itlatitlaniluan, okinnauati ma amo kana yakan ompa Jerusalén, okimili:

—Chok xikchiakan ma pano non tlenon noTata yokijto kenime nejua yoninamechili. ⁵Melauak Juan otlakuateki ika atl, mas kana ipan keski tonalmej namejuan namechkuatekis Dios ika non Espiritu Santo.

Jesus otlejkok tlakpak kampa ka Dios

⁶Non itlatitlaniluan omosentlalikej itlak Jesus uan okitlajtlanikej:

—Señor, ¿axkan nin tonalmej tikinkauilis san ijuan moyekanaskej uan tlanauatiskej nin israelitas?

⁷Jesus okinnankili:

—Namejuan amo moneki nankimatiskej keman o tlen tonale noTata yokitlali para kichiuas. San ijua kipia poder para kijtos keman kichiuas. ⁸Mas ijkuak ualas namotech non Espiritu Santo, namechmakas poder uan nankisaskej para nanteititisekej nin notlajtotl, ipan Jerusalén noyoka Judea, Samaria uan nouiyan ipan nin tlale.

⁹Kuak Jesus otlán tlajtlatoua, otlejkok tlakpak uan ijuan okitztayaj, uan ouala sente mextle uan okitlapacho, uan ayikmo keman okitakej.

¹⁰Chika Jesus otlejkoya tlakpak, ijuan oajkotlachixtayaj, uan omemej tlakaj ika intzotzoma chipauak oneskej intlak. ¹¹Uan okimilikej:

—Tlakaj inchan Galilea, ¿tleka nantlachixtikatej ka tlakpak? Inin Jesus, nin yotlejkok tlakpak, nin namouan oktaya, ualas oksepa kenime yonankitakej yotlejkok.

Okitemojkej akinon kitlaliskej ipatka Judas

¹² Non itlatitlaniluan Jesus omejkuanikej ipan non Olivostepetl uan oualakej ka Jerusalén. Ipan non Olivostepetl uan Jerusalén kipia ka uejka kenime okinkauiliayaj itech itlanauatil Dios ma nejnemikan ipan non tonale ijkuak non judfos moseuijaj. ¹³ Kuak oasisoj Jerusalén, otlejkokej tlapauetzian ijtek non kale kampa oktayaj. Ompa oktayaj Pedro, Jacobo, Juan, Andrés, Felipe, Tomás, Bartolomé, Mateo, Jacobo non ikone Alfeo, Simón, non onemiya inuan non cananistas, uan Judas non ikone Jacobo. ¹⁴ Nochtin ijuan omosentlaliayaj momostla para sekne motlatzajtziliskej ka non ikniuan Jesus, ika Maria non inana Jesus uan ka oksekin siuamej.

¹⁵ Ijkuak non tonale omosentlalikey kana se ciento uan sempouale tlaneltokakej, uan Pedro omoketz inepantla uan okimili:

¹⁶ —Nokniuan, okipiaya para panos tlenon okijto non Espiritu Santo ijkuak otlajkuilo non rey David itech non Yektlajkuilole, Judas okinyekan non tlakaj non okasikej Jesus. ¹⁷ Judas oktaya tosepan uan touan otekitiya. ¹⁸ (Mas ijua oya uan okiko sente tlale ka non melio non okitlaxtlauikej por non itlajtlakotl. Ompa ouetz ka itzontekon uan otlajkotzayan uan okuitlaxkolkis.) ¹⁹ Kuak okimatkej non tlenon omochi nochtin non tlakaj non chantij Jerusalén, okitokayotikej inon tlale Acéldama, ika intlajtotl ijuan kijtosneki tlale ka yestle. ²⁰ Itech non libro itoka Salmos kijtousa kiyin:

Ma tlakajteuakan ichan,
uan ma amo kaj mochanti ichan.

Iteuan kijtousa:

Ma tekiti okse tlakatl ipatka.

²¹ 'Nikan katej tlakaj onentinemiyaj touan mochipa ijkuak toSeñor Jesus touan oktaya. ²² Ijuan opejkej nentinemij touan ijkuak Juan ope tlakuatekia uan sta ijkuak Jesus otlejkok tlakpak. Uilijtika monelos touan se tlakatl para teilis melauak Jesus omoskali.

²³ Ompa okintlapejpenikej omemej tlakaj: sente itoka Matías uan oksente Jose Barsabás. Inin tlakatl iteuan okitokayotiayaj Justo.

²⁴ Satepan omotlatzajtzilikej uan okijtokej:

—Señor, tejua tikimixmati inyolo nochtin nin tlakaj, xitechititi katla ijuatl nin omemej tejua yotiktlapejpeni, ²⁵ para ma kichiuu nin tekittl ke tlatitlanile nin Judas okipolo por non itlajtlakotl, ijkuak oya kampa kitokaroua yes.

²⁶ Ompa omotlankej para kimatiskej katla ijuatl Dios yokitlapejpeni, uan okitlan Matías. Ijkuak ope inuan tlapouale non majtlaktle uan sente itlatitlaniluan.

1. OTENOJNOTZKEJ NIN KUALI TLAJTOLE IPAN JERUSALÉN (2.1--8.3)

Dios okualtitlan non Espíritu Santo

2 Kuak oasik non iluitl itoka Pentecostés, nochtin non tlaneltokakej sekne osentlalkaktayaj ijtek sente kale. ² Uan se tiempo okakistik tlenon oualeuaya tlakpak, ke ijkuak yejyeka chikauak, uan okakistik noyoka ompa kaltek kampa oyejyeuatayaj. ³ Uan okimmotitikej tlenon ke tletl uan omoxejxelo non tletl intech sesentemej. ⁴ Uan niman Dios okintemiti nochtin ika non Espíritu Santo, uan opejkej tlajtlatouaj ika oksekin tlajtolmej kenime okinchiuaya non Espíritu Santo ma tlajtokeran.

⁵ Ijkuak ipan non tonalmej oktayaj judíos ompa Jerusalén akin oualeuayaj noyoka ipan nin tlale. Ijuan la okitlakaitayaj Dios. ⁶ Kuak non tlakaj okikakej otlakakistik, omosentlalikey uan amo okimatiyay tlenon kinemiliskej por sesentemej okinkakiyay kenika otlajtlatouayaj non intlajtotl. ⁷ Nochtin omojkatlachixtayaj uan omoluiyay san ka ijuan:

—¿Xikitakan, amo chantij Galilea nochtin nin nikan tlajtotikatej?

⁸ ¿Kine tleka tikinkakij ijuan sesentemej tlajtlatouaj kenime nin titlajtlatouaj tejuan nin tlajtole nin sta ipan otitlakatkej? ⁹ Nikan katej tlakaj inchan ipan non paises intokayan Partia, Median, Elam, Mesopotamia, Judea, Capadocia, Ponto uan Asia, ¹⁰ uan Frigia, Panfilia, Egipto, uan ipan non itlaluan Africa kampa oktaya sa itech non tlaueyikan itoka Cirene. Inteuan katej romanos chantij nikan, sekin nin romanos judíos por kiyon otlakatkej uan oksekin satepan omokuepej judíos por okiselikej kenime okineltokayaj Dios non judíos. ¹¹ Nikan katej inteuan tlakaj inchan Creta uan Arabia. Tonochtin tikinkakij tlajtlatouaj ika nin totlajtotl nin la kuakuale nin tlenon Dios kichiua.

¹² Nochtin omojkatlachixkej uan amo okimatiyay tlenon kinemiliskej, uan omotlajtlaniayaj:

—¿Tlenon kijtosneki inin?

¹³ Mas oksekin otepipinajtiayaj uan okijtouayaj:
—Inimej tlatlauankej.

Pedro oteititi itlajtol Dios

¹⁴ Ompa Pedro omoketz ka non majtlaktle uan sente tlatitlanilmej, otlajto chikauak uan okijto:

—Toknluan judíos uan nochtin nin chantij Jerusalén, xikmatikan namejuan inin, uan xikkakikan kuali nin tlenon nininamechilis. ¹⁵ Nin tlakaj amo tlatlauankej kenime namejuan nankinemiliaj, kue kimach las nueve. ¹⁶ Mas nin tlenon panotika non tlenon okijto non tlakatl otlajtouaya ipatka Dios non oitokaya Joel ijkuak okijto:

¹⁷ Dios kijtousa:

Kuak iasitika nin tonale ijkuak tlamis nin tlale, niktitlanis noEspíritu intech nochtin nin chantij ipan nin tlale. Non namotelpochuan uan non namochpochuan tlajtoskej nopatka. Non telpokamej tlakochitaskej, uan non ueuentzitzin tlatemikiskej.

¹⁸ Ipan non tonalmej niktitlanis noEspíritu intech non notekituan, uan tlajtoskej nopatka.

¹⁹ Tlakpak niteititis tlemach tlenon non tlakaj kinchiuas ma mojkatlachiakan, uan tlatzintlan ipan nin tlale nesiskej milagros: oyes yestle, tletl uan poktle.

²⁰ Kachto ijkuak ayimo asi non tonale ueyi ijkuak ualas non toSeñor, non tonale tlileuis, uan non metzton chichileuis ke yestle.

²¹ Uan nochtin akinomej kitzajtziliaj non toSeñor para ma kimmakixti ijtek intlajtlakol, kimmakixtis.

²² Pedro okimili:

—Tlakaj israelitas, xikkakikan nin tlenon nininamechilis. Namejuan nankimatikatej kuali, Dios okitlajpejpeni Jesus non ouale Nazaret para kinchiuas milagros uan okseki tlemach namotzalan. ²³ Kuak Jesus okitemaktikej namomak, Dios sta kachto yokimatiya tlenon nankayitisekej uan kiyon okinekiya. Namejuan onankasikej uan onankimiktikej itech non kolotzin, immak inon tlakaj amo kualtin.

²⁴ Maski Dios okiskali, uan okixti imak non ipoder non mikistle por non mikistle auele okitlan. ²⁵ Non rey itoka David, okitene Jesus, okijto:

Mochipa onikitaya ka nixtlan non Señor.

Ijua oktaya ika nonakastlan ka ipan nomanejmatl para amo kaj necholinis.

²⁶ Por uinon opajpak nin noyolo, uan onikimijto tlatolmej ika pakilistle.

Mas nin nonakayo mikis, nikmati noskalis.

²⁷ Tejua amo tikkauas nin noalma kampa katej mimikkej, iteuan amo tikkauas ma palani nin inakayo nin motekit nin yotikyolchipa.

²⁸ Yotechititi nin ojtle nin nechuika kampa mochipa ninemis, uan mixpan yotechtlalili pakilistle itech nin noyolo.

²⁹ Pedro okijto:

—Noknluan, kuali nestika ka nin iuejka totata David. Ijua omik uan okitokakej, uan kampa non okitokakej oknoma touan ka. ³⁰ Mas David otlajtouaya ipatka Dios uan okimatiya Dios yokilika non melauak, sente non iuejka ikoneuan yes Cristo uan motlalis ipan isilieta para tlanauatis. ³¹ Kiyon David ke okitztaya sta kachto tlenon panos, okitene Cristo moskalis, uan okijto non ialma amo mokauas kampa katej non mimikkej nian non inakayo palanis. ³² Uan ijua inin Jesus, Dios okiskali, uan tonochtin tejuan otikitakej kema yomoskali. ³³ Kiyon okitlejkaui Dios uan okitlali ka ipan imanejmatl, uan okimakak iTata Dios non Espiritu Santo non yokilika non melauak kimakas uan nochi nin tlenon yonankitakej uan yonankikakej, Jesus yokichi. ³⁴ David amo otlejkok tlakpak ke Jesus, mas ijua okijto: Dios okili non noSeñor:

“Ximotlali ka ipan nomanejmatl.

³⁵ Sta ijkuak nejua nimitztlalis titlayekanke intech inon mitztlaelitaj.”

³⁶ Xikmatikan kuali, namonochtin nin nanisraelitas, inin Jesus nin namejuan onankikuapilokej itech kolotzin, Dios yokichi Señor uan Cristo.

³⁷ Kuak nin tlakaj okikakej nin tlajtolmej, la omoyolkokojkej, uan okitlajtlanikej Pedro uan non oksekin non tlatitlanilmej:

—Noknluan, ¿tlenon tikchiusaskej?

³⁸ Pedro okinnankili:

—Ximoyolkuepakan ka Dios uan ximokuatekikan nansesentemej ipan itokalis Jesucristo, para namechtlapojpoluiskej non

namotlajtlakoluan. Uan Dios namechmakas non Espiritu Santo.

³⁹Nin tlenon okijto Dios namechmakas, para namejuan uan para namokoneuan uan nochtin non katej uejka uan para nochtin akinomej nin Señor toDios kinnotzas.

⁴⁰Ka inin tlajtolmej uan ka oksekin, Pedro okinnajnauati non tlakaj uan okimili:

—Xikisakan ijtek nin tlajtlakole intzalan nin tlakaj yotlajtlakojkej.

⁴¹Kiyon non okiselikej non itlajtol, omokuatekijkej, uan ijkuak non tonale omaxiltikej kana yeyi mil tlakaj. ⁴²Uan non tlenon okimititiayaj non itlatitlaniluan nochi okichiuayaj, mochipa sepan oktayaj, omotlatzajtziayaj uan omosentlaliayaj para kikuaskej non pantzin para kilnamikiskej Jesus omik.

Kiyin onemiyaj nin kachto okineltokakej Jesus

⁴³Non itlatitlaniluan okinchikej miyek milagros uan okseki tlemach, uan nochtin omojkatlachixkej. ⁴⁴Nochtin non okineltokakej Jesus san se inyolo oktayaj, uan omomakayaj tlenon okipiayaj.

⁴⁵Okinnemakayaj non intlaluan uan nochi non tlenon okipiayaj, uan okixejejlouayaj non melio sesentemey ka non okimpolouaya.

⁴⁶Momostla omosentlaliayaj ijtek non tiopantle. Uan inchan okikuayaj non pantzin para kilnamikiskej Jesus omik por ijuan, uan sepan okikuayaj ka pakilistle uan ka yolyemanilistle.

⁴⁷Okueyitlaliayaj Dios, uan nochtin non tlakaj okintlakaitayaj nin okineltokayaj Jesus, uan non Señor momostla okintlapiuiaya non okisayaj ijtek non intlajtlakol.

Sente tlakatl uelatik opajtik

3 Se tonale Pedro iteuan Juan okitlejkauiiayaj kampa ka non tiopantle, kana las tres non ka iyouak, ijkuak non hora ijkuak omotlatzajtziayaj. ²Momostla ompa oktaya sente tlakatl uelatik sta ipan otlakat. Uan okuikayaj itech non tiopantle uan okitlaliayaj kiauatenco kampa itoka Kuakuale, para motlayeuis inka non okalakiyaj ompa. ³Kuak non tlakatl uelatik okimitak Pedro uan non Juan kalaktiuej ijtek non tiopantle, omotlayeui inka. ⁴Ompa Pedro iteuan Juan okiyekitagej, uan Pedro okili:

—Xitechita.

⁵Non tlakatl okinyekitak, uan okichixtaya itlaj kimakaskej. ⁶Pedro okili:

—Amitla nikipia plata nian oro, mas nin tlenon nikipia, timitzmakas: ipan itokalis Jesucristo non ualeua Nazaret, ximoketzta uan xinejnemi.

⁷Ompa Pedro okitzitzki itech non imatzin ka ipan imanejmatl uan okajkok. Uan niman ochikajkej non ikxiuan uan non ikakayoluan.

⁸Uan non tlakatl uelatik otzekuin ijkuak omoketz, uan ope nejnemi. Uan okalak inuan Pedro iteuan Juan ijtek non tiopantle, onejnenta, otzekuinta uan okueyitlaliaya Dios. ⁹Nochtin non tlakaj okitakej nejnemi uan kueyitlalia Dios. ¹⁰Omojkatlachixkej uan omojkamikej por non tlenon opanok ika por yokonixmatkej non tlakatl uelatik non omotlaliaya para motlayeuis itlak non tiopantle, kiauatenko kampa itoka Kuakuale.

Pedro oteititi itlanauatil Dios ijtek iCorredor Salomón

¹¹Non tlakatl uelatik non yompajtik, amo okinkajkauaya Pedro iteuan Juan. Uan nochtin non tlakaj omojkatlachixkej uan omotlalokej ka intlak ijuan, itlak non tiopantle kampa ka itoka iCorredor Salomón.

¹²Pedro, ijkuak okitak inin, okimili non tlakaj:

—Tlakaj israelitas, ¿tleka nammojkatlachiaj namejuan? ¿Tleka nantechitaj tejuan, ke tejuan otikpajtikej nin tlakatl ika topoder, o ika toyolchipauualis para ma nejnemi? ¹³Non inDios non iuejka totatauan Abraham, Isaac uan Jacob, ijua yokueyitlali Jesus, nin iKone, non namejuan onankitemakakej inka non tekichikej ueyixtikatej. Uan ijkuak Pilato okinekiya kikajkauas, namejuan amo onankinekej.

¹⁴Maski nin Jesus yolchipauak uan yolmelajke ixtlan Dios, namejuan amo onankinekej ma kikajkauakan. Namejuan onankinekej ma inon Pilato kikajkaua sente temiktiani. ¹⁵Namejuan kiyon onankimiktikej nin temaka nemilistle. Maski Dios okiskali kampa okitokakej, uan inin tejuan otikitakej. ¹⁶Nin tlakatl nin namejuan nankitaj uan nankixmatij, Dios okichijchika por tikneltokaj ipoder Jesus. Uan por tikneltokaj Jesus, opajtik kuali, kenime namejuan kuali nankitaj.

¹⁷Inikmati nokniuuan, ijkuak namejuan uan non namotekichikej onankimiktikej non Jesus, non melauak amo onankimatiyaj tlenon onankichiuayaj. ¹⁸Mas kiyin Dios okichi kenime okijto kichiuas, tlenon yokijtojka kachto ka non inkamak non tlakaj non otlajtouayaj ipatka: non iCristo Dios kipia para kipanós. ¹⁹Por uion, ximoyolpatlakan uan ximoyolkuepakan ka Dios, para kiyon non

namotlajtlakotl kimpojpoulos. Uan toDios namechualtitlanilis tonalmej para namechyolseuis,²⁰ uan Dios niman kualtitlanis non Jesus, non Cristo, non kachto yokitlali para namechtlajtlakolmakixtis.²¹ Maski axkan Jesucristo kipia para mokauas tlakpak, sta ijkuak Dios yokimektlali kuali nochi non tlemach, kenime okijto ka non inkamak non intlakaj inyolchijapkej non otlajtokej ipatka Dios uan onenkej iuejka.²² Kiyin okimili Moises non iuejka totatauan: “Non Señor toDios namechualtitlanilis sente tlakatl siyijua nin namokniuan tlajtos ipatka Dios, kenime onechualtitlan nejua. Ijua xikkakikan nochi tlenon ninamechilis.²³ Uan nochtin akinomej amo kikakiskej nin tlakatl tlajtos ipatka Dios, nempoliuiskej, uan kinxeloskej intzalan non israelitas.”²⁴ Uan nochtin non tlakaj non otlajtouayaj ipatka Dios, peua ika Samuel sta axkan, ijuan okijtokej tlenon panos ipan nin tonalmej.²⁵ Tlenon yokijto Dios non melauak temakas ijkuak otlajtokej non tlakaj ipatka ijua, inin para namejuan. Non pakto non Dios okichi ka non iuejka totatauan oktaya iteuan para namejuan, ijkuak okili Abraham: “Nochtin nin chantij ipan nin tlele nikintuechuias ika non iuejka mokoneuan.”²⁶ Kuak Dios okiskali nin ikone, okititlan kachto ka namejuan para namechteuechuias uan para sesentemej namejuan nankikauaskej non tlenon amo kuali.

Pedro iteuan Juan okinuikakej immixtlan non tekichikej

4 Pedro iteuan Juan oknoma okinnojnottzayaj non tlakaj ijkuak oualakej non tiopixkimejtiopixkimej iuan non ueyixtika non otlamokuitlauiayaj ijtek non tiopantle uan inka non saduceos.² Ijuan okualantayaj por Pedro iteuan Juan okimititiayaj non tlakaj uan okimiliayaj non yomijmikej moskaliskej por Jesus yomoskali kampa oktayaj non mimikkej.³ Ompa okinuikakej uan okintzajtzakuatoj sta non ualmostla por iyouak oktaya.⁴ Miyekej non okikakej non itlajto Dios ijkuak Pedro otlajtlatotaya, okineltokakej. Non okineltokakej Jesus san non tlakaj tlapoualtin kana makuile mil.⁵ Non ualmostla omosentlalikey ompa Jerusalén non intekichikej non judíos, non ueuentzitzin uan non temachtikej non itlanauatil Dios.⁶ Iteuan ompa oktayaj Anás, inin oktaya tiopixke ueyixtika, Caifás, Juan, Alejandro uan nochtin non ken okimitayaj non tiopixtlayekankej.⁷ Ompa okimanatoj Pedro iteuan Juan, okinketzkej nepantla uan okintlajtlanikej:

—¿Akinon onamechmakak poder, o akinon ika ipoder onankipajtikej nin tlakatl?

⁸ Ompa Pedro ika non Espíritu Santo okimili:

—Tekichikej uan ueuentzitzin inchan nikan ipan nin tlale Israel: ⁹ por namejuan nantechtlajtlaniaj kenika otikpaleuikkej nin tlakatl omokokouaya uan kenika opajtik. ¹⁰ Xikmatikan namejuan, uan ma kimatikan nochtin nin tlakaj nin chantij Israel, inin tlakatl nin nikanka tixtlan tonochtin, opajtik ipan itokalis Jesucristo non ualeua Nazaret. Ijua non namejuan onankikuapilokej itech kolotzin, mas Dios okiskali kampa katej non mimikkej. ¹¹ Inin Jesus ke tetl, nin kachi ika chikajtika nin kale, mas non kalchikej amo okiselikej.

¹² Amo onka oksente tlakatl para temakixtis ijtek nin tlajtlakole, Dios amikaj kualtitlani oksente ipan nin tlale para techmakixtis ijtek nin tlajtlakole.

¹³ Kuak non tekichikej okitakej Pedro iteuan Juan amo okimmojtiajay ijkuak otlajtouayaj, uan ijkuak okimatkej ijuan oktayaj san akin uilis tlakaj uan amo ouiyaj kampa temachtilo, omojkatlachixkej. Ompa okimixmatkej onemiyaj iuan Jesus. ¹⁴ Uan non tlakatl non yompajtik ompa oktaya inuan Pedro iteuan Juan, iuinon auele tla okijtouayaj.

¹⁵ Ompa Pedro iteuan Juan okinkixtikej kampa otlamachkaktayaj, uan omokajkej monojnotztikatej san non tekichikej. ¹⁶ Omoluiayaj:

—¿Tlenon tikchiuaskej inka nin tlakaj? Nochtin nin chantij Jerusalén kimatij yokichikej nin milagro, uan auele tikijtoskej amo melauak.

¹⁷ Mas para ma ayikmo ueya nin tlenon teititiaj, tikimmomojtiskej para ma niman axkan peukan ayikmo teititiskej ipan itokalis Jesus.

¹⁸ Ompa otlatekimakakej para ma kimanatij Pedro iteuan Juan, uan okimilikej ma amo tlajtokan uan ma amo teititikan ipan itokalis Jesus. ¹⁹ Pedro iteuan Juan otenankilikej:

—Xiknemilikan siyika namejuan tlenon Dios kineki. ¿Akinon tikneltokaskej, namejuan o Dios? ²⁰ Tejuan auele tikkauaskej titeititiskej nin tlenon yotikitakej uan nin tlenon yotikkakej.

²¹ Ompa non tekichikej okimmomojtikej Pedro iteuan Juan, mas okinkajkej ma yakan. Amitla okinnextilikej kenika kimpanoltiskej por nochtin nin tlakaj okueyitlaliayaj Dios por non tlenon yompanok.

²² Non tlakatl non opajtik ika ipoder Dios, amo okipiaya san ompouale xiuitl, okipiaya ojkachi.

Non tlaneltokakej okitlajtlanilikej Dios ma kinyolchikaua

²³ Pedro iteuan Juan ijkuak okinkajkajkej, oyakej kampa oktayaj non insepán, uan oteilikej nochi tlenon okimilikej non tiopixtlayekankej uan non ueuentzitzin. ²⁴ Uan ijkuak okikakej, omosepanelokej ipan san sente inyolo uan omotlatzajtzilikej, uan okijtokej:

—ToSeñor, tejuá tiDios. Tejuá otitlachijchi tlakpak, nin tlale, nin atl ueyi uan nochi nin tlenon onka. ²⁵ Tejuá ika non Espíritu Santo uan ika non ikamak non motekit David, otikijto:

¿Tleka mopasolouaj nin tlakaj nin chantij noyoka ipan nin tlale, uan kinemiliaj non amo kuali?

²⁶ Nin reyijtin ipan nin tlale okualankej, uan nin tekichikej ipan nin chantilismej omosentlalikej, para kixnamikiskej toSeñor Dios uan non iCristo.

²⁷ Non melauak Herodes uan Poncio Pilato omosentlalikej nikan kampa nin tlaueyikan, ika non israelitas uan ka non amo israelitas, para kixnamikiskej nin moKone yolchipauak, nin otikualtitlan para tlanauatis. ²⁸ Kiyin ijuan okichikej nochi tlenon tejuá otiknek ma pano. ²⁹ Uan axkan, Señor, xikita kenika techmomojtiaj, xikinyolchikaua nin motekituan para amo ka mojkamilstle teititiskej nin motlajtotl. ³⁰ Uan ma pajtikan nin mokokouaj ka nin mopoder uan ma kinchiuakan milagros uan okseki tlemach ipan itokalis Jesus nin moKone yolchipauak.

³¹ Kuak otlankej motlatzajtziiaj, otlalolin kampa otlamachkaktayaj, uan nochtin Dios okintemiti ika non Espíritu Santo, uan ayikmo ka mojkayotl oteititayaj nin itlajtol Dios.

Non tlaneltokakej tlenon okiapiyaj, okixexelouayaj

³² Nochtin non okineltokakej san se intlalnami kilis okiapiyaj. Amikaj okijtouaya non tlenon okiapiya san ijua iuaxka. Nochi tlenon okiapiyaj para nochtin oktaya. ³³ Nin itlatitlaniluan ika ueyi poder otemachiltikej non Señor Jesus omoskali. Uan Dios nochtin la okinteuechiuaya. ³⁴ Amo kaj oktaya nian akin tlaj okipolouaya, por nochtin non okimpiyaj itlalan o ikaluan okinnemakayaj, uan non melio okualekayaj, ³⁵ uan okimakayaj non itlatitlaniluan, uan okixexelouayaj sesentemej inka non okimpolouaya. ³⁶ Teuan onemiya sente tlakatl levita oitokaya Jose, otlakat ipan non tlale itoka Chipre, uan non itlatitlaniluan okitokayotikej Bernabé, kijtosneki non

teyolchikaua. ³⁷ Inin tlakatl okinemakak sente tlale, uan non melio okualekak uan okimakak non itlatitlaniluan.

Intlajtlakotl Ananías uan Safira

5 Uan sente tlakatl oitokaya Ananías uan non isia Safira, okinemakakej sente tlale. ² Nin tlakatl okikuik seki non melio, uan non okseki okitlali imak non itlatitlaniluan ke nochi yeskia. Uan non isia okimataya. ³ Pedro okili:

—Ananías, ¿tleka okalak moxikuani itech moyolo, uan omitzchiuili tikajkayauas non Espíritu Santo uan tikuis seki non melio non ika omitztlaxtlauikej non motlal? ⁴ ¿Amo tejua mouaxka oktaya non tlale? Satepan ijkuak otiknemakak, ¿amo tejua mouaxka non melio? ¿Tleka otiknemili tikchuias kiyin? Tiknemilia tejuan otitechkajkayaj, mas otikajkaya Dios.

⁵ Kuak Ananías okikak nin tlajtole, ouetzito uan niman omik. Uan nochtin non okimatkej tlenon omochi, omojkamikej. ⁶ Ompa oualakej sekin telpokamej, uan okikemelokey non miki uan okitokatoy.

⁷ Satepan kana ipan yeyi hora, okalak non isia Ananías. Amo okimatiya tlenon ompanok. ⁸ Pedro okitlajtlani:

—Xinechili, ¿melauak kiyon ipati non tlale kenime nankijtouaj?

Uan non siuatl okijto:

—Melauak, kiyon ipati.

⁹ Pedro okili:

—¿Namejuan tleka onamotlajtolmakakej para nankikajkayauaskej non Espíritu Santo? Pauitzij nepa kiauatenko non okontokatoy non monamik; axkan tejua mitztokatiuej.

¹⁰ Uan niman ouetzito yomik ixtlan Pedro. Kuak okalakej non telpokamej, okinextikej yomik, uan okixtikej uan okitokatoy inakastlan non inamik. ¹¹ Uan nochtin non tlaneltokakej, uan nochtin non okimatkej tlenon opanok, omojkamikej.

Miek milagros okinchikey non itlatitlaniluan

¹² Non itlatitlaniluan okinchiuayaj miyek milagros uan okseki tlemach intzalan non tlakaj, uan nochtin omosentlaliayaj kampa itoka iCorredor Salomón. ¹³ Non oksekin amikaj okinekiya kimmonelos, mas la okintlakaitayaj non tlaneltokakej. ¹⁴ Uan miyekej tlakaj uan siuamej okineltokakej nin toSeñor. ¹⁵ Uan okinkixtiayaj ipan ojtle non

kokoxkej, uan okintlaliayaj ipan impetl para ijkuak panos Pedro, mas san non iyekauitl impan panos, pajtiskej. ¹⁶Inteuan oualakej miyekej tlakaj Jerusalén non san ompa ochantiyaj, okinualikayaj inkokoxuan, uan non okiapiayaj espíritus amo kualtin; uan nochtin opajtiyaj.

Pedro iteuan Juan okinnekiyaj kintzajtzakuaskej

¹⁷Ompa non tiopixke ueyixtika uan non iuan omoketzayaj non saduceos akinomej sepan oktayaj, omoxikojkej ka non itlatitlaniluan.

¹⁸Non itlatitlaniluan okinuikakej para kintzajtzakuaskej, uan okinkalakijkej ipan non cárcel. ¹⁹Uan sente iangel non Señor okitlapo non cárcel ka tlayoua, okinkixti uan okimili:

²⁰—Xiyakan, ximoketzakan ijtek non tiopantle, uan xikimilikan non tlakaj nochi nin yankuik nemilistle.

²¹Kuak okikakej nin tlajtole, non ualmostla ka tlajtlanestika okalakej ijtek non tiopantle uan opejkej teititij.

Kuak oasiko non tiopixke ueyixtika uan non isepan, okinsentlalikej non tlakaj ipan non ueyi junta, kijtosneki non ueuentzitzin ueyixtikatej ipan non tlaueyi Israel, uan otlatitlankej ma kimanatij non itlatitlaniluan ipan non cárcel. ²²Kuak oasitoj ipan non cárcel non otlamokuitlaluiayaj ijtek non tiopantle, amo okinnexitikej non itlatitlaniluan uan omokuepkej otemachiltitoj ²³uan oteiliki:

—Otiknextikej non cárcel tzajtzaktika kuali, uan non soldadotintlamokuitlaluijtikatej ipan non kiauatemmej, mas ijkuak otiktlapojkej, amikaj otiknextikej.

²⁴Kuak okikakej nin tlajtole, non tiopixke ueyixtika uan non kachi ueyixtika non otlamokuitlaluiayaj ijtek non tiopantle uan non tlayekankej non tiopixkimej omoluiayaj:

—¿Tlenon panos axkan?

²⁵Ijkuak san niman oasito sente tlakatl uan okimili:

—Non tlakaj non onankintzajtzakej, katej ijtek non tiopantle, kimmachtijtikatej non tlakaj.

²⁶Ompa non otlamokuitlaluiayaj ijtek non tiopantle uan non kachi ueyixtika ka ijuan oyakej okimmanatoj non itlatitlaniluan, okinualikakej ka kuali, por omojkamikiyaj ka non tlakaj kintemakaskej. ²⁷Kuak okinualikakej, okintlalikej ixpan non ueyi junta, uan non tiopixke ueyixtika okimili:

²⁸—Tejuan otinamechkaualtikej kuali ayikmo nanteititiskej ipan itokalis Jesus. ¿Uan axkan tlenon yonankichikej? Nin tlenon

nanteititaj yonankitemitikej noyoka Jerusalén, uan nankinekij nantechmamaltiskej tejuan otikmiktikej non tlakatl.

²⁹ Ompa Pedro uan non oksekin non itlatitlaniluan otenankilikej: —Tejuan kipia para tikhiuaskej tlenon kijtous Dios, amo tlenon kijtous nin tlakaj. ³⁰ Non inDios non uejka totatauan okiskali nin Jesus, nin namejuan onankimiktikej ijkuak onankikuapilokej itech kolotzin. ³¹ Dios okueyitlali uan okitlali ipan imanejmatl uan yokichi Tlayekanke uan Temakixtike, para kinkauilis ma moyolkuepakan non tlakaj israelitas uan para ma kintlapojpoluikan intlajtlakol.

³² Tejuan otikitakej nochi nin tlenon Dios yokichi, uan iteuan kimati non Espíritu Santo non yokimmakak Dios non kineltokaj.

³³ Kuak okikakej non tlakaj non oktayaj ipan non ueyi junta, okualankej uan okinekiyaj kimmijmiktiskej non tlatitlanilmej. ³⁴ Mas intzalan oktaya sente fariseo oitokaya Gamaliel. Inin oktaya temachtitlanauatil Dios uan la okitlakaitayaj. Omoketz uan otlatekimakak para ma kinkixtikan tepitzin kiauak non tlatitlanilmej. ³⁵ Ompa okimili non tekichikej:

—Tlakaj israelitas, xikitakan uan xiknemilikan tlenon nankichiuaskej ka nin tlakaj. ³⁶ Xikilnamikikan namejuan ayimo uetl uejkaui sente tlakatl oitokaya Teudas okijtousaya ijua ueyixtika, uan okinyekanaya kana naui ciento tlakaj. Mas ijua okimiktikej, uan nochtin non okinyekanaya omoxexelokej uan nochi otlán. ³⁷ Satepan ijkuak yomik Teudas, ipan non tonalmej ijkuak okimpouayaj non tlakaj, ouala Judas, non ualeua Galilea, uan miyekej okinyekan, iteuan okimiktikej uan nochtin non okinyekanaya omoxexelokej. ³⁸ Por uinon ninamechilia xikinkauakan nin tlakaj uan amo ximokalaktikan ka ijuan. Tla nin tlenon teititaj uan kichiuaj, ualeua intech tlakaj, pojpoliuis. ³⁹ Mas tla nin tlenon teititaj uan kichiuaj, ualeua itech Dios, namejuan auele nankipojpoloskej. Ximokuitlauikan, amo ximokalaktikan inuan, tla amo nankinekij nankixnamikiskej Dios.

⁴⁰ Uan nochtin okiselikej non tlenon okijto Gamaliel. Ompa okinnotzkej non tlatitlanilmej, okimmakilikej uan okinnauatikej ma ayikmo tlajtokan ipan itokalis Jesus, uan satepan okinkajkajkej.

⁴¹ Non tlatitlanilmej okiskej imixpan non tekichikej ka pakilistle por Dios okinkauili ma kimpijpinatikan ipampa Jesus. ⁴² Uan momostla ijtek non tiopantle uan techajchan amo okikauayaj temachtikej uan kiteneuaj Jesucristo.

Okintlapejpenikej chikome tlapaleuianimej

6 Ipan non tonalmej non tlaneltokakej otlapiuiayaj, uan non otlajtouayaj griego opejkej kinteneuaj non otlajtouayaj hebreo, okijtouayaj non invioras amo okintlamakayaj kuali, ijkuak momostla omoxexelouayaj non tlakuale. ² Ijkuak non majtlaktle uan ome tlatitlanilmej okinsentlalikey nochtin non tlaneltokakej uan okimilikej:

—Amo kuali para tejuan tla tikkauaskej titeititisej nin itlajtol Dios para tikxejxeloskej non tlakuale. ³ Por uinon, nokniuian, xikintemokan ka namejuan chikome tlakaj, non kintlakaitaj, non ijiuiyantín uan non yokintemiti Dios ika non Espiritu Santo, para immak tikkauaskej nin tekítl. ⁴ Tejuan amo tikajkauaskej totlatzajtzilisej uan titeititisej nin itlajtol Dios.

⁵ Uan nin tlajtole nochtin okimpaktij, uan okintlapejpenikej Esteban, inin okineltokaya Jesus ika nochi iyolo, uan Dios yokitemiti ika Espiritu Santo, uan Felipe, Prócoro, Nicanor, Timón, Parmenas uan Nicolás. Nin tlakatl ochantiya Antioquía. Kuak ayimo okineltokaya Jesus, okineltokak Dios ke non judíos, mas amo judío oktaya. ⁶ Ompa okinualikakej kampa oktayaj non tlatitlanilmej, uan non tlatitlanilmej omotlatzajtzilikej uan okintlalikej non immatzin impan.

⁷ Non itlajtol Dios omochaya noyoka, uan non tlaneltokakej la otlapiuiayaj ipan Jerusalén, uan noiijke miyekej tiopixkimej judíos okineltokayaj Jesus.

Okasijkej Esteban

⁸ Dios okitemiti Esteban ika ipoder uan la okiteuechi, uan por uinon intzalan non tlakaj Esteban okinchiuaya milagros uan okseki tlemach. ⁹ Oualakej sekin tlakaj tlapoualtin ijtek non intiopan non judíos. Nin kale oitokaya Tlanemakalmej Tlamakauilmej. Inimej ika oksekin inchan Cirene, Alejandría, Cilicia uan Asia opejkej kitlajtolixnamikij Esteban. ¹⁰ Maski ijuan ayikuali okixnamikiyaj Esteban uan non Espiritu Santo kachi okijuiyantiliaya ijkuak otlajtouaya. ¹¹ Ompa okintlaxtlauikej oksekin tlakaj para ma kijtokan okikakej non Esteban okitlajtlakoltiaya Moises uan Dios. ¹² Kiyin okichikej para ma kwalanikan non tlakaj, non ueuentzitzin uan non temachtikej itlanauatil Dios. Uan oyakej ka itech Esteban, okasikej uan okuikakej ipan non ueyi junta. ¹³ Uan okintemojkej tlakaj amo kualtin para tlaixkomakaskej uan kiyin okijtokej:

—Nin tlakatl Esteban mochipa kitlajtlakoltia nin tiopantle uan nin itlanauatil Dios. ¹⁴ Otikkakej kijtoua nin Jesus non ualeua Nazaret kixixitonis nin tiopantle, uan iteuan kijtoua kpatlas nin itlanauatil Dios.

¹⁵ Ompa non tekichikej uan nochtin non ompa oyejyeuatayaj, ijkuak otlachixkej itech Esteban, okitakej non ixayak ones ke non ixayak sente angel.

Esteban oteili itlajtol Dios uan okimiktikej

7 Ompa non tiopixke ueyixtika okitlajtlani Esteban:
—¿Melauak nochi nin tlenon kijtouaj?

² Esteban okinankili:

—Nokniuuan uan tatajmej, xinechkakikan. Nin toDios ueyixtika okimotiti non totata Abraham, ijkuak onemiya ipan non tlale itoka Mesopotamia, kachto ijkuak ayimo oyaya omochantiaya ipan non tlaueyikan itoka Harán. ³ Uan Dios okili: “Xikisa nikan ipan nin motlal uan xikinkaua nochtin nin ken tikimita, uan xia ipan nin tlale nin nejua timitzitis.” ⁴ Ompa Abraham okis ipan non tlale itoka Caldea uan omochantito Harán. Satepan ijkuak yomik non itata, Dios okualekak nin Abraham nikan ipan nin tlale, kampa axkan namejuan nanchantij. ⁵ Dios amitla okikauilite itlal ipan nin tlale, nian kampa kiketzas sente ikxi. Maski okili non melauak kikauiliteuas itlal uan ijkuak mikis, nin tlenon yokikauilite, yes para non ipiluan, maski ijkuak non tonalmej Abraham ayimo okiipiaya ipiluan. ⁶ Uan Dios okili non ken kimita Abraham chantiskej ipan sente tlale teuaxka. Ipan non tlale yeskej tlanemakalmej uan la kimpanoltiskej nau ciento xijpan. ⁷ Iteuan Dios okili Abraham: “Nejua nikimixkomakas non tlakaj non chantij ipan non tlaueyi non tepiaskej ke tlanemakalmej. Uan satepan kisaskej ompa uan nechueyitlaliskej nikan ipan nin tlale.” ⁸ Dios okichi se pakto ka Abraham uan okinauati ma motlakanakayoteteki, itoka circuncisión, para nesis okiseli non pakto. Por uinon ijkuak otlakat non ikone itoka Isaac, non ualchikome Abraham okichiui circuncisión. Uan siyikiyon okichi Isaac ka Jacob non ikone, uan Jacob iteuan siyikiyon okichi ka non majtlaktle uan ome ipiluan. Inimej oyakej non iuejka totatauan, tonochtin nin tiisraelitas.

⁹ 'Non ipiluan Jacob, non oyakej iuejka totatauan, omoxikojkej itech non imiknin itoka Jose, uan okinemakakej para ma kiukakan ipan non tlalueyi itoka Egipto. Mas Dios iuan oktaya Jose, ¹⁰ uan ijkuak otlajyoui, okipaleui uan okijiuiyantili. Iteuan okipaleui para ma kipakti non irey Egipto non itoka Faraón, non tlenon okichiuya Jose. Non rey okitlali Jose para tlanauatis ipan non tlalueyi Egipto, uan iteuan ichan non rey.

¹¹ 'Satepan ope apistle uan uilijki tlajyouilistle noyoka ipan Egipto uan ipan non tlele itoka Canaán, uan non iuejka totatauan amo okipiayaj tlenon kikuaskej. ¹² Mas ijkuak Jacob okima oktaya trigo ipan Egipto, okintitlan non ipiluan, non iuejka totatauan. Ijkuak kimach ijtoti ouiayaj. ¹³ Kuak ka okpa ouiayaj, Jose omoka ma kixmatikan non ikniuan, uan kiyon non irey Egipto okima akinon itech oualeuaya Jose. ¹⁴ Ompa Jose otlatitlan ma kimanatij Jacob non itata uan nochtin non ochantiyaj ichan. Ijuan oktayaj yeypouale uan kaxtole tlakaj. ¹⁵ Kiyon opanok uan Jacob oya omochantito Egipto, kampa satepan omik, uan kampa iteuan omijmikej non iuejka totatauan. ¹⁶ Satepan non inakayo okinuikakej ipan non tlaueyikan itoka Siquem. Ompa okintokakej kampa okipiaya itlakoyok Abraham. Inon tlatekoyonke kachto okinkouili Abraham non ipiluan Hamor ompa Siquem.

¹⁷ 'Opanok miyek xiuitl uan ijkuak opoliuiyay sa keski tonalmej para Dios kinkixtis non israelitas kenime yokilika Abraham non melauak kinkixtis, non israelitas ipan Egipto la miyekej yomochijtayaj.

¹⁸ Satepan ompa Egipto ope tlanauatia sente rey. Inin amo keman okixma Jose. ¹⁹ Ijua nin yankuik rey okinkajkaya non tochantlakaj uan la okimpanoltij non iuejka totatauan, okinkaualtiyaj non ipiluan non kimach otlakatiyaj para ma mijmikikan. ²⁰ Ijkuak ipan non tonalmej otlakat Moises uan Dios okuelitak non piltontle. Uan non itatajuan okueyaltikej inchan yeyi metztle. ²¹ Uan ijkuak non itatajuan okikajkej non chichile, non ichpoch irey Egipto okajkok uan okueyalti ke ikone. ²² Por uinon Moises okimachtikej nochi tlenon okimatiyaj non ochantiyaj Egipto, uan Moises oueyixtaya ka otlajtouaya uan ka otekipanouaya.

²³ 'Kuak Moises okipiaya ompouale xiuitl, okinekiya kintlajpaloti non ichantlakaj, non israelitas. ²⁴ Uan ompa okitak sente egipcio okimakilitaya sente israelita. Moises ipan otlajto non israelita uan para kikuepilis, okimikti non egipcio. ²⁵ Moises okinemiliaya non

ichantlakaj israelitas kasojkamatiskiaj Dios okititlan para kinkixtis, mas ijuan amo okasojkamatkej. ²⁶ Non ualmostla, Moises okimitak omemej israelitas omoteuijtayaj. Okinekiya kinxelos uan kinyolseuis uan okimili: “Namejuan namiknimej, ¿tleka namoteuij?” ²⁷ Ompa non otlateuijtaya okimape Moises, uan okili: “¿Akinon omitztlali tejua ke titlayekanke uan ke tijues para ma toxelokan?” ²⁸ ¿Tikneki techmiktis noteuan, kenime iyalua otikmikti non egipcio?” ²⁹ Kuak Moises okikak nin tlenon okijto nin tlakatl, ocholo uan oya ipan non tlale itoka Madián. Ompa ochantik ipan nin tlale teuaxka uan okimpix ome ipiluan.

³⁰ ‘Kuak yopanok ompouale xiuitl, se tonale ipan non tluuakan itlak non tepetl itoka Sinaí, okimotiti sente angel ijtek non itleyo non xiuitl itoka kokochi. ³¹ Moises omojkatlachix ijkuak okitak, uan ijkuak omopepecho para kachi kuali kitas, okikak itlajtol non Señor: ³² “Nejua niinDios non motatajuan, inDios Abraham, Isaac uan Jacob.” Ompa Moises ope ueueyoka ka mojkayotl, uan ayikmo okinekiya kitas. ³³ Uan non Señor okili: “Xikixti nin motekakjuan, por kampa nin tiyejkatika nin tlale mauistik. ³⁴ Nejua yonikitak tlajyouiaj nin nopiljuan ipan nin tluueyi Egipto, yonikinkak chokaj ka yolkokolistle uan yonitemok para nikimmakixtis. Axkan xiuala, nejua timitztitlanis Egipto.”

³⁵ ‘Mas ijuan amo ipan okitakej Moises uan okilikej: “¿Akinon omitztlali tejua ke titlayekanke uan ke tijues para ma toxelokan?” Mas Dios okitlali nin Moises ke tlayekanke uan ke temakixtiani, ijkuak non angel okimotiti ijtek non kokochi. ³⁶ Moises akin okinkixti non iuejka totatauan ipan Egipto, okinchi milagros uan okseki tlemach ipan Egipto, ipan non atl ueyi itoka Chichiltik uan iteuan ipan non tluuakan kana ompouale xiuitl. ³⁷ Ijua oya inin Moises non okimili non israelitas: “Dios namechualtitlanilis sente tlakatl siyijua nin namokniuan tlajtos ipatka Dios, kenime onechualtitlan nejua. Ijua xikkakikan.” ³⁸ Ijua inin Moises non onemiya intzalan non tlakaj ipan non tluuakan, uan ka non angel akin okinotz ipan non tepetl itoka Sinaí, uan ka non iuejka totatauan. Ijua inin Moises akin okimakakej non kuali tlajtole non temaka nemilistle para techpanoltilis.

³⁹ ‘Mas non iuejka totatauan amo okinekej kineltokaskej, uan amo okislikej uan okinekiyaj mokuepaskej Egipto. ⁴⁰ Okilikej Aarón:

“Tiknekij xitechinchijchiuili xantojtzimej para ma techyekanakan, por nin Moises, nin otechkixti Egipto, amo tikmatij tlenon yopanok ika.”⁴¹ Uan okichijchikej sente xantojtzin tlachijchijtle ke pisero, okimiktikej yolcamej uan okintlalikej ixtilan non inxantojtzin, uan opajpakej ka non tlenon okichijchikej non imauan.⁴² Por kiyon okichikej, Dios okinka, iteuan okinka ma kinueyitlalikan non tonale, non metzton uan non sitlalmej. Kiyon nestika itech non inlibro non otlajtouayaj ipatka Dios:

Namejuan nin israelitas, ¿onankimiktikej yolcamej para nankintlaliskej nixtilan,

ijkuak onannemiyaj ipan non tluakan ompouale xiuitl?

⁴³ Amo, namejuan onankuikayaj non itiopantzin non xantojtzin

Moloc,

uan isitlalin non xantojtzin Renfán,

ome xantojtzimej namejuan onankinchijchikej para

nankinueyitlaliskej.

Por uinon nejua namechkixtis ipan nin namotlal, uan namechtitlanis kachi uejka tla amo ipan non tlale itoka Babilonia.

⁴⁴ Ipan non tluakan non iuejka totatauan okipiayaj intiopantzin

tlachijchijtle ika tzotzomajtle kampa okintlaliayaj non temej kampa

nestika non itlanauatil Dios. Inin tiopantzin kiyon okichijchikej

kenime Dios okititi Moises.⁴⁵ Non iuejka totatauan okimakakej non

tiopantzin non impiljuan, uan non oualakej ika Josué okualekakej

ijkuak okinkuilikej non intlal non oksekin non tlakaj non amo

oktayaj judíos. Dios okinkixti non tlakaj imixpan non iuejka

totatauan. Kiyon opanok sta ijkuak otlanauatiaya David.⁴⁶ Uan Dios

okitlasojtlak non rey David, uan David okinek kichijchiuas sente

kale kampa non ipiluan Jacob kueyitlaliskej Dios.⁴⁷ Mas satepan

Salomón non ikone David okichijchi non tiopantle para Dios.⁴⁸ Mas

tikmatij toDios ueyixtika amo chanti ijtek templos non

okinchijchikej tlakaj. Kiyin okijto non tlakatl otlajtouaya ipatka

Dios:

⁴⁹ ToDios kijtous:

Niueyixtika tlakpak kampa notlalia.

Nin tlale kampa nikintlalia nin nokxiuan.

¿Kenime nannechijchiuiliskej sente kale?

¿O kanin kuali noseuis?

⁵⁰ ¿Amo nejua onitlachijchi nin tlenon onka noyoka?

⁵¹ Esteban okimili:

—Mas namejuan mochipa yonanyakej nanyoltepitzikey, uan amo nankinekij nankikakiskej nin itlajtlo Dios nian nankitlakamatiskej. Namejuan mochipa nankixnamikij nin Espíritu Santo. Ke non iuejka namotatajuan. ⁵² ¿Katla ijua non otlajtouayaj ipatka Dios amo okimpanoltikej non iuejka namotatajuan? Ijuan okimmijmiktikej non tlakaj non otlajtouayaj ipatka Dios non okijtouayaj ualas sente tlakatl yolmelajkan, uan axkan youitza, namejuan onankitemaktikej uan onankimiktikej. ⁵³ Maski namejuan onankiselikej non itlanauatil Dios ijkuak onamechpanoltikej non angeles, amo onankineltokakej.

Esteban okimiktikej

⁵⁴ Kuak non tlakaj okikakej nin tlajtolmej, okualankej ka Esteban sta omotlanteskej. ⁵⁵ Mas Esteban, otentaya ika Espíritu Santo, otlachix ka tlakpak uan okitak itlaueyilis Dios, uan Jesus oyejkataya ka ipan imanejmatl Dios. ⁵⁶ Uan Esteban okijto:

—¡Xikitakan! Nikitztika tlapojtika tlakpak. Uan Jesus nin tlakatl nin ualeua itlak Dios yejkatika ka ipan imanejmatl ijua.

⁵⁷ Uan ijuan omonakastzajtzakej, otzajtzikey chikauak uan ipan oyakej Esteban. ⁵⁸ Uan okixtikej Esteban ipan non tlaueyikan uan okitemakakej ka temej. Uan non tlakaj non okitemakakej, okinkajkej non intzotzomaj ika sente telpokatl oitokaya Saulo. ⁵⁹ Uan ijkuak okitemakatayaj, Esteban omotlatzajtzi uan okijto:

—Señor Jesus, xikseli nin noespíritu.

⁶⁰ Satepan omotlankuakuetz uan otzajtzikey chikauak:

—Señor, xikintlajpojpolui nin inltajtlakol nin tlenon nechaitaj. Uan satepan ijkuak otlantlajtlatoua, omik.

Saulo okinekiya kimmijmiktis non tlaneltokakej

8 Saulo otekauili ma kimiktikan Esteban.

Ijkuak ipan non tonale ope miyekej tlakaj kinetikij kimmijmiktiskej non tlaneltokakej non oktayaj Jerusalén. Nochtin ocholokej ipan non tlalmej intokayan Judea uan Samaria, mas non tlatitlanilmej amo ocholokej. ² Uan sekin tlaneltokakej okitokatoj Esteban uan la okichokilikej. ³ Mas Saulo ope kintemoua non tlaneltokakej para kimmijmiktis, uan okalakiya techajchan para kinkixtis uan kinuelantas non tlakaj uan siuamej uan okintzajtzakauaya.

2. OTENOJNOTZKEJ NIN KUALI TLAJTOLE IPAN SAMARIA UAN JUDEA (8.4-9.43)

Felipe oteititiaya itlajtol Dios ipan non tlaueyikan itoka Samaria

⁴Uan non okiskej Jerusalén noyoka kampa oyayaj, oteititiayaj nin itlajtol Dios kuali temakixtia ijtek tlajtlakole. ⁵Felipe, sente tlakatl non ocholo teuan, oya ipan non tlaueyikan itoka Samaria uan ope tenojnotza itlajtol Cristo. ⁶Nochtin non tlakaj omosentlaliayaj para kikakiskej kuali tlenon okijtouaya Felipe uan para kitaskej non milagros non okinchiuaya. ⁷Por miyekej tlakaj non okiapiyaj espíritus amo kualtin opajtikej, uan non espíritus amo kualtin okisayaj intech non tlakaj tzajtzitiuej. Inteuán miyekej tlakaj uelatikej uan koxojtikej opajtikej. ⁸Por uinon ipan non tlaueyikan nochtin la opakiyaj.

⁹Ipan Samaria oktaya sente tlakatl oitokaya Simón. Inin kachto oktaya tlajma uan okinkajkayauaya non tlakaj non ochantiyaj Samaria, okimiliaya ijua ueyixtika. ¹⁰Uan nochtin non tlakaj, pilamej uan ueuentzitzin, okikakiyaj kuali tlenon okimiliaya uan okijtouayaj non tlakaj:

—Nin Simón kipia ipoder Dios.

¹¹Okineltokayaj, por youejka okinkajkaya ka non itlajmalis. ¹²Maski ijkuak okikakej non kuali tlajtole non oteili Felipe, okineltokakej. Felipe okimititi non kenika tlanauatia Dios uan okinnojnötz ika Jesucristo. Uan omokuatekiyaj tlakaj uan siuamej. ¹³Uan iteuán Simón okineltokak uan omokuateki, uan ope nemi iuan Felipe. Kuak Felipe okinchiuaya non uejueyin milagros uan okseki tlemach, omojkatlachiaya Simón.

¹⁴Kuak non tlatitlanilmej non oktayaj Jerusalén okimatkej ipan Samaria yokiselikej non itlajtol Dios, okintitlankej Pedro iteuán Juan. ¹⁵Kuak oasitoj, omotlatzajtziikej para non yokineltokakej para ma Dios kimaka non iEspíritu Santo. ¹⁶Por ayimo oualaya non Espíritu Santo intech nian sente; san yomokuatekikaj ipan itokalis non toSeñor Jesus. ¹⁷Satepan Pedro iteuán Juan okintlalikej non immatzin ipan non yokineltokakej, uan Dios okimakak non iEspíritu Santo.

¹⁸Kuak Simón okitak non Espíritu Santo oualaya ijkuak okintlaliayaj non immatzin non tlatitlanilmej impan non yokineltokakej, Simón okinekiya kimmakas melio. ¹⁹Okimili:

—Xinechmakakan noteuan nin poder, para ijkuak nejua niktllalis nin nomatzin ipan san akin uilis ma iteuan Dios kimaka non Espíritu Santo.

²⁰ Ompa Pedro okili:

—Ma Dios mitzpojpolo tejua uan non momelio por tejua tiknemilia nin tlenon Dios temaka, kuali tikouas ka melio. ²¹ Tejua ayikmo timopouas touan nian auele tikchiuas inin tekintl, por tejua amo tiyolchipauak ixtlan Dios. ²² Ximoyolkuepa ka Dios, xikkaua nin motlajtlakotl, uan ximotlatlajti ixtlan Dios, tele mitztlajpojpoluis nin tlenon tiknemilia itech moyolo. ²³ Nikita tikpia xiotlakalistle uan nin motlajtlakotl mitztzajtaktika.

²⁴ Ompa Simón okinnankili:

—Ximotlatzajtzilikan namejuan itech nin Señor para ma amitla pano noka nin tlenon yonankijtokej.

²⁵ Satepan ijkuak yokitokej non tlenon Dios yokichi ka ijuan uan ijkuak yotlajtokej itlajtol Dios, non tlatitlanilmej inteuan oteititikej nin kuali tlajtole ipan miyekej chantilismej ipan Samaria, uan ompa omokuepej Jerusalén.

Felipe okinojnotz sente tlakatl ochantiya Etiopía

²⁶ Satepan sente iangel non Señor okili Felipe:

—Ximoketza uan xia ka tlatzintlan, ipan non ojtle non temo ka Jerusalén uan ya asi sta ipan non tlaueyikan itoka Gaza.

Inin ojtle pano ipan non tluakuan. ²⁷ Felipe omoketz uan oya, uan ipan ojtle okinamik sente tlakatl ichan Etiopía. Nin tlakatl oktaya eunuco, ueyi tekichike oktaya uan okimokuitlauiaya non imelio sente reina itoka Candace non otlanauatiaya ipan non tluueyi itoka Etiopía. Nin tlakatl oyajka Jerusalén para kueyitllalis Dios. ²⁸ Ijua nin tlakatl youalmokuepaya ika ichan, yeuati ipan icarretón uan kitlajtojtijti non tlenon okichijchi Isaías non tlakatl non otlajtoouaya ipatka Dios. ²⁹ Ompa non Espíritu Santo okili Felipe:

—Ximopepecho itlak nin carretón.

³⁰ Uan ijkuak Felipe omopepecho, okikak kitlajtojtia non okichijchi Isaías, non tlakatl non otlajtoouaya ipatka Dios, uan Felipe okitlajtlani:

—¿Tikasojkamati nin tlenon tiklajtojtijti?

³¹ Non etiopo okili:

—Auele nikasojkamatis tla ayak akinon nechititis.

Uan non etiope okili Felipe ma tlejko uan ma motlali inakastlan.

³² Kampa okitlajtoltijtaya non etiope, kiyin kijtousa:

Okuikakej para kimiktiskej ke sente borrego.

Uan ke sente borreokonetl amo tzajtzi ijkuak kixtiliaj non itojmiyo, kiyon ijua amitla onauat ijkuak okimiktikej.

³³ Okipipinajtikej uan okitlajtlakoltikej, mas amitla okichi.

¿Kenika kuali kinteneuaskej non ipiluan?

Por okimiktikej nikan tlapan.

³⁴ Uan non tekichike okitlajtlani Felipe:

—Nimitztlatlajtia xinechilui, ¿nin tlakatl nin tlajtousa ipatka Dios, tlajtousa ka ijua o ka okse tlakatl?

³⁵ Ompa Felipe ope kinojnotza sta ipan nin nanka nin Yektlajkuilole non okitlajtoltijtaya non etiope, uan okili nin kuali tlajtole Jesus temakixtia ijtek tlajtlakole. ³⁶ Uan ijkuak opanoyaj kampa oktaya atl, non etiope okijto:

—Nikan onka atl; ¿kualikan nokuatekis?

³⁷ Felipe okili:

—Tla tikneltoka ka nochi moyolo, kuali timokuatekis.

Uan non tlakatl okinankili:

—Nikneltoka nin Jesucristo iKone Dios.

³⁸ Ompa non etiope otlatekimakak ma ketzakan non carretón, uan ineuan okalakej ijtek non atl, uan Felipe okikuateki. ³⁹ Kuak okiskej ijtek non atl, non iEspíritu non Señor okuikak non Felipe, uan non etiope ayikmo keman okitak, mas ijua oya ipan iyojue ka pakilistle.

⁴⁰ Uan Felipe ones ipan tlaueyikan itoka Azoto, uan opanotaya uan oteititiaya non kuali tlajtole. Kiyon okichiuaya ipan nochtin non chantilismej sta oasito Cesarea.

Saulo okineltokak Jesus

(Hch. 22:6-16; 26:12-18)

9 Uan Saulo oknoma okualantaya uan okintemojtinemiya non tlaneltokakej ka non toSeñor para kimmijmiktis. Por unon oya okitato non tiopixke ueyixtika, ² uan okitlajtlani sente amatlanauatile para teititis ijtek non intiopanuan non judíos ompa ipan non tlaueyikan itoka Damasco. Non amatlanauatile okijtousaya Saulo kuali kintemos nochtin non tlakaj uan siuamej non okineltokayaj Jesus para kinualikas uan kintzajtzakuas ipan

Jerusalén. ³ Mas ijkuak Saulo oyaya ipan ojtle, san itlak Damasco, se tiempo ouala ipan Saulo sente tlauiile teixmijmikti ouale tlakpak.

⁴ Ompa Saulo ouetzito tlalpan, uan okikak sente tlajtole, okili kiyin:
—Saulo, Saulo, ¿tleka tinechtemojtinemi?

⁵ Ompa Saulo otlajtlan:
—¿Akin tejua, Señor?

Uan okinankili:

—Nejua niJesus akin techtlauelita. [Siyitejua timokokoua, ke non kuakue ijkuak kiteleksa ikuaikpak non ika kitzopinia ijkuak tekiti.]

⁶ Uan Saulo oueueyokataya ka mojkamilistle, okijto:
—Señor, ¿tlenon tikneki ma nikchiua?

Uan non Señor okinankili:

—Ximoketza uan xikalaki ipan non tlaueyikan, uan ompa mitziliskej tlenon tikchluas.

⁷ Non tlakaj non oyayaj iuan Saulo la omojkamiktayaj, por okikakej non tlajtole mas amikaj okitakej. ⁸ Ompa Saulo omoketz, mas ijkuak okintlapo non ixteolouan, auele tla okitak. Por uinon okitelantakej uan okuikakej Damasco. ⁹ Ompa Damasco oktaya uan yeyi tonale amo otlachiaya, uan amitla okikua nian okonik.

¹⁰ Ompa ipan non tlaueyikan itoka Damasco ochantiya sente tlakatl oitokaya Ananías. Nin tlakatl okochitak nin toSeñor okinojnotz uan okili:

—¡Ananías!

Uan ijua okinankili:

—Nikan nika, Señor.

¹¹ Uan non Señor okili:

—Ximoketza uan xia ipan non xolatl itoka Melajkan, uan xia ichan Judas uan xitlajtlani ka sente tlakatl itoka Saulo ualeua ipan non tlaueyikan itoka Tarso. Ijua motlatzajtzilia, ¹² uan yokochitak sente tlakatl itoka Ananías kalaki kaltek uan kitlalia non imatzin ipan para kuali tlajtlachias okse uelta.

¹³ Kuak okikak inin tlajtole, Ananías okijto:

—Señor, miyekej yonechnojnotzkej ka non tlakatl, uan nochi non tlenon yokimayiti non mitzneltokaj non chantij Jerusalén. ¹⁴ Uan axkan youala nikan, ika amatlanauatile non okimakakej non tiopixtlayekankej para kinuikas uan kintzajtzakuas nochtin nin motlatzajtzilia ipan monombre.

¹⁵ Mas non Señor okili:

—Xiya, nejua yoniktajpejpeni nin tlakatl para ma kinnojnotza noka nin tlakaj non amo judíos, nin inreyuan uan non israelitas. ¹⁶ Nejua nikititis kenika la tlajyouis por nopampa.

¹⁷ Ompa Ananías oya uan okalak ijtek non kale kampa oktaya Saulo. Okitlali non imatzin ipan, uan okili:

—Noknin Saulo, non Señor Jesus, non omitzmotiti ipan ojtle kampa ka otialaya, onechualtitlan para titlajtlachias okse uelta uan para titemis ika Espíritu Santo.

¹⁸ Uan niman okima ke otekope tlenon itech inon ixtelolouan, uan kuali otlachix okse uelta. Ompa Saulo omoketz uan omokuateki.

¹⁹ Satepan otlakua uan oksepa ochijchika, uan omoka kana keski tonale ka non tlaneltokakej non ochantiyaj Damasco.

Saulo oteiliaya itlajtol Dios ipan non flaueyikan itoka Damasco

²⁰ Uan Saulo niman ope teilia itlajtol Dios ijtek non intiopanuan non judíos, oteiliaya Jesus iKone Dios. ²¹ Nochtin non okikakiyaj, omojkatlachiyaj uan okijtouayaj:

—¿Amo ijua nin nanka nin tlakatl non okintemojtinemiya ompa Jerusalén non motlatzajtziyaj ipan itokalis Jesus? ¿Uan amo por uinon ouala nikan, para kinuikas uan kintemaktis ka non tiopixtlayekankej para ma kintzajtzakuakan?

²² Mas Saulo oteititiaya itlajtol Dios kachi chikauak, okimititiaya Jesus ijua Cristo. Kiyon okintlapololtiaya non judíos non ochantiyaj Damasco.

Saulo ocholo ompa Damasco

²³ Satepan ijkuak yopanok miyek tonale, non judíos okijtokej kimiktiskej non Saulo, ²⁴ mas Saulo okima. Mochipa ka tonale uan ka tlayoua okichijchiayaj para kimiktiskej itlak non puertas kampa okisayaj non ochantiyaj ipan non flaueyikan. ²⁵ Ompa non tlaneltokakej okitlalikey non Saulo ijtek sente ueyi chikiuitl uan okitemouikej ka tlayoua itech non tepamitl non okimalakachotaya non flaueyikan, uan kiyon ocholo.

Saulo oya Jerusalén

²⁶ Kuak Saulo oasito Jerusalén, okinekiya kimmonelos non tlaneltokakej. Mas nochtin okimmojtaya, por amo okineltokayaj tla

ijua yokineltokaya Jesus. ²⁷ Maski Bernabé okuikak uan okimixpanti non tlatitlanilmej. Uan okimili kenika Saulo okitak non Señor uan kenika non Señor okinojnotz ipan ojtle. Bernabé iteuan okimili kenika Saulo otenojnotz ipan itokalis Jesus ka chikaualistle ipan non tlaueyikan itoka Damasco. ²⁸ Uan Saulo omoka Jerusalén uan inuan onemiya. ²⁹ Okiteneuaya toSeñor ka chikaualistle, uan omotlajtolnamikiya ka non judíos non otlajtouayaj griego; mas ijuan inimej okinekiyaj kimiktiskej. ³⁰ Kuak non tlaneltokakej okimatkej, okuikakej nin Saulo ipan non tlaueyikan itoka Cesarea, uan satepan okititlankej ipan okse tlaueyikan itoka Tarso.

³¹ Uan non tlaneltokakej non ochantiyaj Judea, Galilea uan Samaria oyolsejkej uan okineltokakej ka chikaualistle. Non Espíritu Santo okimpaleuiaya uan non tlaneltokakej okitlakaitayaj non toSeñor uan otlapiuiatayaj.

Eneas opajtik

³² Kuak Pedro okintlajpalojtinemiya non tokniuan, iteuan oya okintlajpalojto non ochantiyaj ipan non chantilistle itoka Lida.

³³ Ompa ipan non chantilistle okinexti sente tlakatl uelatik oitokaya Eneas. Yokipiaya chikueyi xiuitl oktaya ipan ipetl. ³⁴ Pedro okili: —Eneas, Jesucristo mitzpajtia. Ximeua uan xikektlali nin mopetl. Uan Eneas niman ome. ³⁵ Uan okitakej nochtin non ochantiyaj Lida uan Sarón. Uan okikajkej non kachto okineltokayaj uan okineltokakej nin toSeñor.

Dorcas omoskali

³⁶ Ijkuak non tonalmej ochantiya ipan non tlaueyikan itoka Jope sente siuatl tlaneltokake itoka Tabita, ika non tlajtole griego itoka Dorcas. Nin siuatl oktaya la kuali tlakatl, okimpaleuiaya non tlakaj non okimpolouaya tlemach. ³⁷ Ijkuak non tonalmej Dorcas omokoko uan omik. Satepan ijkuak yokompajpakej non inakayo, okitekakej kaltek tlapauetzian. ³⁸ Non tlaueyikan Jope uan Lida amo uejka omotztayaj. Non tlaneltokakej okimatkej Pedro oktaya ipan non chantilistle Lida uan okintitlankej omemej tlakaj para ma kilitij: —San niman xiuala nikan Jope.

³⁹ Pedro oya inuan non tlakaj. Kuak oasisito, okuikakej kaltek kampa oktaya non miki, uan nochtin nin viorajtin ochokayaj uan

okoyoualokej nin Pedro uan okititikej non tzotzomajmej non okinchijchiuaya Dorcas ijkuak onemiya. ⁴⁰ Ompa Pedro okinkixti nochtin, omotlankuaketz uan omotlatzajtzi, uan okitak non siuatl miktika uan okijto:

—¡Tabita, ximeua!

Ompa non siuatl okintlapo non ixteolouan, uan ijkuak okitak Pedro, omotlali. ⁴¹ Uan Pedro okitelan itech non imatzin para ma moketza. Satepan okinnotz non viorajtin uan non oksekin tlaneltokakej, uan okixpanti imixtlan yoltika. ⁴² Inin omachistik noyoka ipan non tlaueyikan itoka Jope, uan miyekej okineltokakej nin toSeñor. ⁴³ Uan Pedro omoka miyek tonalmej ompa Jope, ichan sente tlakatl itoka Simón. Nin tlakatl okinchijchiuaya kuitlaxmej.

3. OKINNOJNOTZKEJ NIN KUALI TLAJTOLE NON AMO JUDÍOS (10.1--28.31)

Pedro uan Cornelio

10 Ipan non tlaueyikan itoka Cesarea oktaya sente tlakatl oitokaya Cornelio. Ijua okinyekanaya se ciento soldados. Inimej ointokayaj Italiano. ² Cornelio uan nochtin non ochantiyaj ichan okitlakaitayaj uan okueyitlaliyaj Dios. Iteuan otemakaya ueyi melio para kimpaleuis non judíos, uan mochipa omotlatzajtziaya itech Dios. ³ Se tonale kana las tres ka iyouak, Cornelio okochitak kuali sente iangel Dios okalak ikaltek kampa ijua oktaya, uan okili: —¡Cornelio!

⁴ Cornelio okitak non angel ka mojkamilistle uan okitlajtlani:

—¿Tlenon inin, Señor?

Non angel okinankili:

—Dios yokikak nin timotlatzajtziya uan yokitak nin tikimpaleuia nin akin tlaj kimpolouaj. ⁵ Axkan xikintitlani tlakaj ipan nin tlaueyikan itoka Jope para ma kanatij sente tlakatl itoka Simón Pedro.

⁶ Mokalotia ichan oksente tlakatl itoka Simón. Nin tlakatl kinchijchiua kuitlaxmej uan kipia non ikatl itenko non atl ueyi. Ijua mitzilis tlenon kipia para tikchius.

⁷ Kuak oya non angel non okinojnotztaya, Cornelio okintzajtzi omemej non intekituan uan sente soldado. Nin soldado iteuan okitlakaitaya Dios uan okipaleuiaya Cornelio. ⁸ Uan Cornelio okimili nochi tlenon okitak, uan satepan okintitlan Jope.

⁹ Non ualmostla, chika ijuan oyayaj ipan ojtle, uan ijkuak yoasitayaj Jope, Pedro otlejkok ipan non kale ka tlakualespan para motlatzajtzilis. ¹⁰ Pedro la oapismikiya uan okinekiya tlakuas, mas chika okichijchiuilitayaj tlakuale, okikochitak tlenon. ¹¹ Okochitak omotlapo tlakpak uan oualtemoya ipan nin tlale ke tzotzomajtle ueyi, oualilpijtaya najkan ikuajkuaikpak. ¹² Itech non tzotzomajtle oktayaj miyekej yolramej nin okipiayaj naui imikxiuan uan iteuan nin mouelanaj uan nin patlanij. ¹³ Ompa Pedro okikak sente tlajtole, okili: —Ximoketza, Pedro, xikimmikti uan xikinkua.

¹⁴ Pedro okinankili:

—Amo, Señor. Nejua amo keman nikkua itlaj non itlanauatil Dios amo techkauilia tikkuaskej.

¹⁵ Nin tlajtole oksepa okili:

—Nin tlenon Dios okichipa, amo xikijto amo chipauak.

¹⁶ Yexpa kiyin opanok, uan satepan non tzotzomajtle okse uelta otlejkok tlakpak. ¹⁷ Chika Pedro okinemilitaya tlenon okijtosnekiya nin okochitak, non tlakaj non okinualtitlan Cornelio oasitoj kiauatenco. Inimej otlajtlantinemiyaj kanin ichan Simón. ¹⁸ Kuak oasitoj, otlajtlankej chikauak tla ompa omokalotiaya sente tlakatl itoka Simón Pedro. ¹⁹ Uan Pedro oknoma okinemilitaya non tlenon okochitak, ijkuak non Espíritu Santo okili:

—Xikkaki, mitztemouaj yeyimej tlakaj. ²⁰ Ximoketza uan xitemo, xia inuan uan amo ximonemili. Nin tlakaj nejua onikinualtitlan.

²¹ Ompa Pedro otemok intlak non tlakaj non okinualtitlan Cornelio, uan okimili:

—Nejua nin akin nankitemouaj. ¿Tleka onannualakej?

²² Ijuan otenankilikej:

—Tiuitzij ipatka Cornelio non kinyekana se ciento soldados. Nin tlakatl kitlakaita Dios, kuali nemi ka non judíos uan ijuan kitlakaitaj. Uan sente iangel Dios okili ma tlatitlani ma mitzanaki para tiyas ichan, para kikakis tlenon tikilis.

²³ Pedro okinkalakej non tlakaj uan omokajkej ompa non tlayoua. Non ualmostla Pedro oya inuan non tlakaj, uan iuan oyakej oksekin tokniuan non inchan Jope.

²⁴ Non ualmostla oasitoj Cesarea, kampa Cornelio okinchixtaya ka non ken kimita uan ka non isepan non yokinsentlalika. ²⁵ Kuak oasito

Pedro ichan Cornelio, ijua okis okinamikito uan omotlankuaketz ixtlan para kueyitlalis. ²⁶ Mas Pedro okiketz uan okili:

—Ximoketza, nejua nitlakatl kenime tejua.

²⁷ Chika ijuan omonojnotztayaj, Pedro okalak uan okimitak tlamachkatej miyekej tlakaj. ²⁸ Ompa Pedro okimili:

—Namejuan nankimatij nin itlanauatil Dios amo tekauilia moneloskej sente judío ka okse tlakatl non amo judío. Mas Dios yonechititi amo kipia kaj nikilis yolkakatztik ixtlan Dios. ²⁹ Por uinon ijkuak onechanato, amitla onikijto uan niman oniuala. Nikneki nikmatis tleka onannechanatoj.

³⁰ Ompa Cornelio okinankili:

—Kipia naui tonale, ika imanin nikan onaktaya nochan onosaktaya uan onotlatzajtzililitaya kana las tres non ka iyouak, ijkuak onechmotiti sente tlakatl ka itzotzoma tzotlani. ³¹ Uan onechili:

”Cornelio, Dios yokikak nin timotlatzajtzililia uan yokilnamik tejua tikimpaleuia nin akin tla kimpolouaj. ³² Xitetitlani ma kanatij Simón Pedro ipan non tlaueyikan itoka Jope. Ijua mokalotia ichan sente tlakatl iteuan itoka Simón. Nin tlakatl kinchijchiua kuitlaxmej uan chanti itenko non atl ueyi. Uan ijkuak ualas, ijua mitznojnotzas.”

³³ Por uinon niman onitetitlan ma mitzanati, uan niktlasojkamati por yotiuala. Axkan nikan tikatej tonochtin ixtlan Dios, uan tiknekij tikkakiskej nochi tlenon omitzili xitechili non toSeñor.

Pedro otenojnotz ichan Cornelio

³⁴ Ompa Pedro ope tenojnotza, uan okijto:

—Axkan nikasojkamati non melauak Dios kintlasojtla san akin uilis tlakaj. ³⁵ Uan nouiyan ipan nin tlale Dios kineki akinon kichiuua non kuali uan kitlakaita ijua. ³⁶ Dios otechualtitlanili tejuan nin tijudíos kuali tlajtole teyolseuia ka Jesucristo, nin toSeñor para tonochtin.

³⁷ Namejuan nankimatij kuali tlenon opanok ipan intlal non judíos. Ope ipan non tlale Galilea, satepan ijkuak Juan oteititi nin kuali tlajtole uan otekuateki. ³⁸ Namejuan nankimatij kenika Dios okiteuechi Jesus nin ualeua Nazaret ika Espíritu Santo para kiplas poder. Uan nankimatij nin Jesus okichiuaya non tlenon kuali, uan okimpajtiayaj nochtin non okimpanoltiayaj non moxikuani. Okichi nochi inin Jesus por ika oktaya Dios. ³⁹ Tejuan otikitakej tlenon okichi Jesus nouiyan ipan non tlale itoka Judea uan ipan nin tlaueyikan Jerusalén. Satepan okimiktikej uan okikuapilokej itech

kolotzin.⁴⁰ Mas Dios okiskali ipan yeyi tonale, uan okichi ma techmotiti.⁴¹ Amo okimmotiti nochtin nin tlakaj, san tejuan, akin otechtlapejpeni sta kachto para titeiliskej tlenon otikitakej. Tejuan iuan otitlakuakej uan otatlikej satepan ijkuak yomoskali.⁴² Uan otechtitlan ma tikinnojnotzakan uan ma tikimititikan nin tlakaj, Dios yokitlali nin Jesus ke Jues para techixkomakas tonochtin nin tiyoltikatej uan nin yomikej.⁴³ Iteuan nochtin non otlajtokej kachto ipatka Dios okitenejkej Jesus. Okitokej nochtin akinomej kineltokaj ijua, kintlapojpouiliskej intlajtlakoluan ipan itokalis Jesus.

Non Espiritu Santo ouala intech non tlakaj non amo judíos

⁴⁴ Oknoma otlajtotaya Pedro, ijkuak non Espiritu Santo ouala intech nochtin non okikaktayaj non itlajtol.⁴⁵ Uan non judíos non tlaneltokakej non okinualikak Pedro, omojkatlachixkej por nin Espiritu Santo iteuan ouala intech nin amo judíos.⁴⁶ Uan okinkajkej tlajtouaj ika yankuikkej tlajtolmej, uan okueyitlaliayaj Dios.⁴⁷ Ompa Pedro okijto:

—¿Ka onka akin kuali kintzakuilis para ma amo mokuatekikan nin tlakaj, nin yokiselikej nin Espiritu Santo ke tejuan?

⁴⁸ Uan Pedro okintitlan ma mokuatekitij ipan itokalis Jesucristo. Satepan omotlatlajtikey itech Pedro para ma mokaua ka ijuan kana keski tonale.

Pedro oteiliaya tlenon opanok ipan non tlaueyikan itoka Cesarea

11 Non tlatitlanilmej uan non tokniuan non ompa oktayaj Judea okimatkej nin amo judíos inteuan okiselikej nin itlajtol Dios.² Uan ijkuak Pedro omokuek Jerusalén, sekin non judíos non yokineltokakej Jesus okajuakej.³ Okilikej:

—¿Tleka otikintlajpaloto non amo judíos, uan otitlakua inuan?

⁴ Ompa Pedro okimili nochi tlenon opanok, uan okijto:

⁵ —Onaktaya ipan non tlaueyikan itoka Joep, uan ijkuak onotlatzajtzililitaya, onikochitak ke tzotzomajtle ueyi tlakpak oualtemoya ualilpiti najkan ikuajkuaikpak uan oasiya kampa onaktaya.⁶ Kuak onikitak kuali tlenon okiapiaya, onikimitak tlanelokey yolkamej nin okiapiayaj naui imikxiuan, yolkamej tekuanimej, yolkamej nin mouelanaj uan nin patlanij.⁷ Uan onikkak okijto sente tlajtole: “Ximoketza Pedro, xikimmikti uan xikinkua.”

⁸ Uan nejua onikijto: “Amo, Señor, nejua amo keman nikkua itlaj non itlanauatil Dios amo techkaulia tikkuaskej.” ⁹ Ompa non tlajtole ualeua tlakpak okse uelta onechnotz, uan onechili: “Nin tlenon Dios okichipa, amo xikijto amo chipauak.” ¹⁰ Kiyon opanok yexpa, uan satepan okse uelta nochi otlejkok tlakpak. ¹¹ Uan niman ijkuak yeyimej tlakaj oasitoj itlak non kale kampa onaktaya, okinualtitlankej ipan non tlaueyikan itoka Cesarea para nechtemoskej. ¹² Uan non Espíritu onechili ma niya inuan uan ma amo nonemili. Inteuan oyakej noka chikuasemej nin toknuiuan. Tonochtin otikalakej ichan sente tlakatl itoka Cornelio. ¹³ Uan otechili kenika okitak sente angel yejkatika ompa ichan uan okili: “Xikintitlani tlakaj ipan non tlaueyikan itoka Jope para ma kanatij Simón Pedro, ¹⁴ uan ijua mitzilis kenika nankisaskej ijtek namotlajtlakotl, tejua uan nin chantij mochan.” ¹⁵ Kuak onipe nikinnojnotza, non Espíritu Santo ouala intech, ke ijkuak ouala totech kachto. ¹⁶ Ijkuak onikilnamik non tlenon okijto nin toSeñor: “Melauak Juan otekuateki san ka atl, mas namejuan namechkuatekiskej ika Espíritu Santo.” ¹⁷ Tla Dios okimmakak inteuan ke otechmakak tejuan nin yotineltokakej nin toSeñor Jesucristo, ¿niakin nejua para nikilis nin Dios ma amo kiyon kichiua? ¹⁸ Ompa ijkuak non tlaneltokakej non ochantiyaj Jerusalén okikakej nin tlajtole, ayekmitla okijtokej uan okueyitlalikej Dios, okijtokej: —¡Axkan tikasojkamatij inteuan nin amo judíos Dios yokinkauili ma moyolkuepakan para mochipa nemiskej!

Nin tlaneltokakej nin ochantiyaj Antioquía

¹⁹ Kuak okimiktikej Esteban, inteuan opejkej kintemouaj para kintzajtzakuaskej non oksekin non tlaneltokakej. Uan sekin ocholokej sta ipan non tlalmej intokayan Fenicia uan Chipre uan oksekin sta ipan non tlaueyikan Antioquía. Ompa oteititikej nin kuali tlajtole, okimititikej san non judíos. ²⁰ Uan sekin tlaneltokakej non otlakatkej ipan Chipre uan Cirene oasitoj ipan non tlaueyikan itoka Antioquía uan oteititikej nin kuali tlajtole toSeñor Jesus temakixtia ijtek tlajtlakole. ²¹ Uan nin toSeñor okimmakak poder, uan miyekej okikajkej non oktayaj kachto intlaneltokilis uan okineltokakej nin toSeñor.

²² Kuak nin tlaneltokakej nin ochantiyaj Jerusalén okimatkej tlenon opanok, okititlankej Bernabé sta Antioquía. ²³ Uan ijkuak Bernabé

oasito uan okitak kenika Dios okinteuuchi, la opak. Okinyolchika nochtin, okimili ma mochipa kineltokakan nin toSeñor ka inyolmelajkan. ²⁴ Por Bernabé oktaya kuali tlakatl, otentaya ika Espiritu Santo, uan la okineltokaya Jesus. Por uinon miyekej tlakaj okineltokakej nin toSeñor.

²⁵ Satepan, Bernabé oya okitemoto Saulo ipan non tlaueyikan itoka Tarso, uan ijkuak okinexti, okuikak Antioquía. ²⁶ Uan omokajkej ompa ka non tlaneltokakej se xijpan, uan okimmachtikej miyekej tlakaj. Ompa Antioquía kanin kachto okintokayotikej kristianos non tlaneltokakej.

²⁷ Ijkuak non tonalmej, sekin tlakaj non otlajtouayaj ipatka Dios okiskej Jerusalén uan oasitoj Antioquía. ²⁸ Sente oitokaya Agabo. Inin omoketz inepantla nin tlaneltokakej, uan okijto non tlenon okili non Espiritu Santo, okijto ualas ueyi apistle nouiyan ipan nin tlale, uan kiyon opanok ipan non tonalmej ijkuak otlanauiatiaya non emperador itoka Claudio. ²⁹ Kine nin tlaneltokakej nin ochantiyaj Antioquía, omoluikej kimpaleuissej kenika kuali nin imikniuan nin ochantiyaj Judea. ³⁰ Kiyon okichikej, uan okititlankej melio ka Bernabé uan ka Saulo, uan ijuan okimmakakej non ueuentzitzin, non tlayekankej ipan non intiopanan ompa Judea.

Jacobo okimiktikej uan Pedro okitzajtzakej

12 Ijkuak non tonalmej non rey oitokaya Herodes ope kintemoua para kintzajtzakuas sekin non tlaneltokakej.

² Otlatekimakak para ma kimiktikan ika espada Jacobo non iknin Juan. ³ Uan ijkuak okitak okimpaktij non judíos, iteuan okitzajtzak non Pedro. Kiyon opanok ipan non iluitl ijkuak mokua non pantzin non amo kipia levadura. ⁴ Ijkuak Herodes okasik nin Pedro, okitzajtzak ipan non cárcel uan okimaktij immak nauimej grupos ika nauimej soldadotinkada se grupo para ma kimokuitlauikan. Uan okinekiya kimixpantis non tlakaj ijkuak yopanok non iluitl itoka pascua. ⁵ Kiyon Pedro oktaya ipan cárcel, la okimokuitlauijtayaj, mas non tlaneltokakej la omotlatzajtzilitayaj itech Dios por Pedro.

Dios okixti Pedro ipan cárcel

⁶ Sayijkuak non teotlakan ijkuak ayimo oasiya inon tonale para inon Herodes kimixpantilis ika non tlakaj, Pedro okochtaya intzalan ome

soldadotinuan oilpitaya ka ome kadenas, uan oksekin soldadotinokimokuitlauijtayaj non cárcel itlak non puerta. ⁷ Uan se tiempo oualnes sente iangel nin Señor, uan otlapetlan ompa ijtek non cárcel. Non angel okimatokak ikesnastlan nin Pedro, okijxiti, uan okili:

—Ximeua uiliui.

Uan niman non kadenas ouetzkej itech non imauan Pedro. ⁸ Uan non angel okili:

—Ximotlajkoilpi uan xikimmaki nin motekakjuan.

Kuak Pedro omotlajkoilpi uan okimmaki non itekakuan, non angel okili:

—Xikkaki nin mokoton uan xinechtoka.

⁹ Pedro okis kitokati non angel, amo okimatiya tla melauak non tlenon okichiuaya non angel. Okinemiliaya okochistaya. ¹⁰ Uan okimpanauikej se grupo soldadotinuan satepan oksente. Uan oasitoj itlak non puerta ueyi tlachijchijtle ika tepostle kampa ka okisayaj ka xolatl, uan non puerta san ijua omotlapo. Okiskej, uan satepan ijkuak yonejnenkej se xolatl, non angel okika sa isetl. ¹¹ Ijkuak Pedro okasojkama uan okijto:

—Axkan nikasojkamati non melauak, nin Señor okualtitlan iangel para nechkixtis imak Herodes uan iteuan non tlenon okinemiliayaj nechaitiskej non judíos.

¹² Kuak Pedro okasojkama, oya ichan Maria, non inana Juan Marcos, kampa miyekej tlakaj sepan omotlatzajtzilayaj. ¹³ Kuak Pedro otlakakalatiz itech non puerta ueyi, sente ichpokatl itoka Rode okitato akinon tlakakalatza. ¹⁴ Uan ijkuak Rode okitenkak Pedro, amo okitlatlapolui ijua kachi omotlalo ka tlajtek ka pakilistle para teilis nin Pedro nanka itlak nin puerta. ¹⁵ Nin ichpokatl okilikej:

—¡Tejua tiyejyekayo!

Mas non ichpokatl okimiliaya kema melauak. Ijuan okijtouayaj:

—Amo ijua, san non iangel.

¹⁶ Uan Pedro oknoma otlakakalatztaya. Uan ijkuak otlatlapojkej uan okitakej, omojkatlachixkej. ¹⁷ Mas Pedro okinchiuili señas ka non imatzin para ma tlatlamatakan, uan okimili kenika okixti ipan cárcel nin Señor, okimili:

—Xikilikan inin Jacobo uan non tokniuán.

Satepan okis ompa uan oya oksejkan.

¹⁸ Kuak otlajtlanes, oixpolikej non soldadotinpor amo okimatiyaj tlenon opanok ika Pedro. ¹⁹ Herodes otlatekimakak para ma kitemoti Pedro, mas amo okinextikej. Satepan okintlajtlani non soldadotintlenon opanok, uan ijkuak yokomintlajtlani Herodes otlatekimakak para ma kimmijmiktikan. Ompa satepan Herodes okis ompa ipan tlale itoka Judea, uan omochantito ipan tlaueyikan itoka Cesarea.

Herodes omik

²⁰ Herodes okualantaya ka non tlakaj non ochantiyaj ipan non tlaueyikamej intokayan Tiro uan Sidón, mas ijuan okijtokej kitatiuej Herodes. Okiseltikej sente tlakatl oitokaya Blasto para ma kimpaleui. Inin oktaya ueyi tlayekanke ichan non rey. Uan kuali okichikej ma tlajto Blasto impatka para ma ayikmo kualani Herodes, por nin tlakaj nin ochantiyaj Tiro uan Sidón oyayaj okikuiyaj non tlakuale ipan non itlal non rey. ²¹ Herodes okitlali sente tonale para monojnotzaskej, uan ijkuak oasik non tonale, Herodes omaki non itzotzoma kachi kuali non makiaj non reyijtin, uan omotlali ipan non isilieta kampa non tlaixkomaka uan ope tlajtlatoua. ²² Ijkuak non tlakaj opejkej tzajtzij chikauak, okijtouayaj:

—¡Inin akin tlajtotika amo tlakatl, nin tlajtotika sente dios!

²³ Uan niman ijkuak sente iangel toSeñor okichi Herodes ma mokoko, por amo okueyitlali Dios. Uan okikuakej okuilmej uan omik.

²⁴ Mas nin itlajtol Dios san kampa uilis okimatiyaj, uan otenojnotzayaj nouiyan.

²⁵ Kuak Bernabé uan Saulo otlankej non intekitl, oyakej okse uelta Jerusalén. Okuikakej iteuan Juan Marcos.

Bernabé uan Saulo otenojnotzatoj oksejkan

13 Non tlaneltokakej non oktayaj Antioquia inuan oktayaj tlakaj otlajtouayaj ipatka Dios uan temachtikej. Ompa oktayaj Saulo, Bernabé, Simón (inin iteuan okikuitiayaj Tliltik), Lucio (inin oualeuaya ipan non tlaueyikan itoka Cirene) uan Manaén, (inin oueyak ika Herodes non otlanauatiaya ompa Galilea). ² Se tonale ijkuak okueyitlalitayaj Dios uan omosaktayaj, okijto non Espiritu Santo:

—Xinechxeluikan Bernabé uan Saulo para ma kichiuakan nin tekiti
nin yonikimili.

³ Satepan ijkuak yomotlatzajtzilikej uan ijkuak yomosajkej,
okitlalikej non immatzin impan Bernabé uan Saulo, uan
okintitlankej.

Non tlatitlanilmej otenojnotzkej ipan non tlale itoka Chipre

⁴ Satepan nin Espíritu Santo okintitlan Bernabé uan Saulo ipan non
tlaueyikan itoka Seleucia, uan ompa okiskej uan oyakej ijtek sente
barko ipan non tlale itoka Chipre. ⁵ Kuak oasitoy ompa Salamina,
opejkej teititiaj itlajtol Dios ka ijtek intiopanuan non judíos. Juan
Marcos oyaya iteuan para kimpaleuis. ⁶ Bernabé uan Saulo
onejnenkej nouiyan ipan non tlale itoka Chipre uan oasitoy ipan non
tlaueyikan itoka Pafos, uan ompa okinextikej sente tlakatl itoka
Barjesús. Inin tlakatl oktaya tlajma uan otekajkayauaya, okijtouaya
ijua tlajtolou ipatka Dios. ⁷ Inin tlajma oktaya ka non tlanauatike
Sergio Paulo. Nin tlanauatike la ijiuiyan oktaya. Otlatitlan ma kanatij
Bernabé uan Saulo por okinekiya kikakis nin itlajtol Dios. ⁸ Nin
tlajma iteuan oitokaya Elimas, okimixnamik Bernabé uan Saulo para
ma amo kineltoka itlajtol Dios nin tlanauatike. ⁹ Saulo iteuan
oitokaya Pablo, tentika ika Espíritu Santo, okitak melajkan nin tlajma
¹⁰ uan okili:

—¡Tejua titekajkayauani, tiyolkakastik, tiikone moxikuani, tikokolia
nochi non kuali! ¿Sta keman tikkauas nin tikinkajkayaua nin tlakaj
para ma amo kitokakan nin kuali ojtle, iyojue toSeñor? ¹¹ Axkan nin
Señor mitzpanoltis, mitzchiuas tixpatzaktik kana keski tonale, auele
tikitas nin tonale.

Uan niman omoka ixpatzaktik, uan okitemouaya akinon para ma
kitelana. ¹² Kuak non tlanauatike okitak nin tlenon opanok,
okineltokak por okuelitak nin itlajtol toSeñor.

Pablo uan Bernabé oasitoy Antioquía ipan non tlale itoka Pisidia

¹³ Pablo uan non isepan okiskej ipan non tlaueyikan itoka Pafos ijtek
non barko uan oasikej ipan tlaueyikan itoka Perge ipan non tlale
itoka Panfilia, uan ompa ipan nin tlale Juan Marcos okinka uan
omokuek Jerusalén. ¹⁴ Satepan Pablo uan Bernabé okiskej Perge uan
oasitoy Antioquía. Antioquía mokaua ipan non tlale itoka Pisidia.
Ompa ipan non tlale se tonale sábadotika okalakej ijtek non intiopan

non judíos uan omotlalikey. ¹⁵ Satepan ijkuak yokontlajoltikej non itlanauatil Dios uan non libros non otaljkuilokej non otlajtouayaj ipatka Dios, non tlayekankej ompa ijtek non intiopan non judíos okintlajtlani Pablo uan Bernabé, okimilikej:

—Nokniuán, tla nankipiaj itlaj tlajtole para kinyolchikauas nin tlakaj, xikijtokan.

¹⁶ Ompa Pablo omoketz uan okinchiuili seña ka non imatzin para ma tlatlamatakan, uan okijto:

—Xikkakikan israelitas, uan namejuan nin nankitlakaitaj Dios. ¹⁷ Nin inDios nin israelitas okintlapejpeni non uejka totatauan, uan la okintlapiui ijkuak oknoma ochantiyaj ipan tetlatl ipan non tlaweyi itoka Egipto, uan satepan okinkixti ika ipoder. ¹⁸ Dios okimijyouili kana ompouale xiuitl non tlenon okichiuayaj ipan non tlaweukan.

¹⁹ Uan okimpojpolo chikome grupos tlakaj ipan non tlaweyi itoka Canaán, uan okimmakak intlal non uejka totatauan. ²⁰ Satepan Dios okintlalili jueses kana nauí sientó uan tlajko xiuitl, sta ijkuak onen nin tlakatl tlajtoua ipatka Dios itoka Samuel. ²¹ Uan ompa otlajtlankej sente rey para kinyekanas, uan Dios okimmakak Saúl ke rey.

Okinyekan kana ompouale xiuitl. Nin Saúl oktaya ikone Cis. Cis kemotaya inon uejka ipiluan Benjamín.

²² Satepan Dios okejkuani nin Saúl, uan okimmakak oksente rey itoka David, uan Dios okijto:

“Yonikitak David ikone Isaí, nin tlakatl nechpaktia uan kichiuas nochi tlenon niknekis.” ²³ David ken okitaya Jesus. Dios okititlan nin

Jesus para kimmakixtis ijtek tlajtlakole nin israelitas, kenime kachto yokijtojka. ²⁴ Kachto ijkuak ayimo uitz Jesus, Juan non Tlakuatekiani okinnojnotz non israelitas, okimili ma moyolkuepakan ka Dios uan

ma mokuatekikan. ²⁵ Uan ijkuak Juan ayimo omikiya, okijto: “Amo nejua niCristo kenime namejuan nankinemiliaj. Pauitz satepan sente tlakatl kachi ueyixtika tla amo nejua; amitla nikpia kualí para nopachos uan nikintojtomilis non itekakuan.”

²⁶ Nokniuán, namejuan nin ken nankitaj Abraham, uan namejuan nin nankitlakaitaj Dios, nin tlajtole temakixtia ijtek tlajtlakole para tonochtin.

²⁷ Nin chantij Jerusalén uan nin tlakaj ueyixtikatej amo okimatiyaj akinon oktaya Jesus, uan amo okasojkamatkej non intlajtotl non tlakaj non otlajtouayaj ipatka Dios nin kitlajtoitaj mochipa non sabados ijtek non intiopan non judíos. Kuak Jesus okikuapilokej, okichikej ma asi non tlenon yokijtojka. ²⁸ Mas amitla

okinextilikej tlajtlakole para kimiktiskej, ijuan okilikej Pilato ma tlatekimaka para ma kimiktikan. ²⁹ Kuak yokichiulikej nochi tlenon nestika itech non Yektlajkuilole, okitemouikej itech non kolotzin uan okitokatoy. ³⁰ Mas satepan ijkuak okimiktikej, Dios okiskali. ³¹ Uan miyek tonale Jesus okimmotiti non iuan okiskej Galilea uan oasikej Jerusalén, uan axkan ijuan tenojnotzaj nin itlajtol Dios.

³² Uan tejuan tinamechmakatikatej nin kuali tlajtole nin Dios yokijto kachto ka non iuejka totatauan. ³³ Uan tejuan nin titepiljuan. Dios yokichi touan tlenon kachto okimili non iuejka totatauan ijkuak yokiskali Jesus. Kenime kijtoua itech non ka ome salmo: “Tejua tinoKone. Uan nimoTata.” ³⁴ Dios yokijtojka kiskalis Jesus para amo palanis non inakayo, kenime kijtoua non Yektlajkuilole: “Namejuan namechmakas nin llateuechiuilstle non David onikili nikmakas.”

³⁵ Por uinon iteuan kijtoua itech oksente salmo: “Amo tikkaus ma palani nin inakayo nin motekit yolchipauak.” ³⁶ David omik ijkuak otlán tekiti ka non tlakaj non onemiyaj ipan non ichantilis kenime Dios okinek, uan okitokakej itlak kampa otoktitayaj non itatajuan, uan non inakayo opalan. ³⁷ Mas non inakayo Jesus amo opalan, por Dios okiskali. ³⁸ Xikmatikan nokniuan, tejuan tinamechnojnotzaj Jesus namechtlapojpoluia namotlajtlakotl. ³⁹ Nochtin akinon kineltokaj Jesus, Dios kintlapojpoluia, maski ipan itlanauatil Dios auele kintlapojpoluia. ⁴⁰ Ximokuitlauikan, para ma amo pano ka namejuan non tlenon otlajkuilokej non tlakaj otlajtouayaj ipatka Dios, ijkuak okijtokej:

⁴¹ Xikkakikan, tepipinatikej, ximojkatlachiakan uan xipoliuikan. Por nejua niDios, nikchiuas sente tekittl ueyi ipan namotonatl, uan non tekittl amo nankineltokaskej mas kaj ninamechilis.

⁴² Uan ijkuak okiskej Pablo uan Bernabé ijtek non intiopan non judíos, okimilikej ma okse uelta kinnojnnotzajtij non ualchikome.

⁴³ Kuak yokiskej nochtin nin tlakaj ijtek non intiopan, miyekej judíos uan oksekin non amo judíos non okitlakaitayaj Dios okitokakej Pablo uan Bernabé. Uan ijuan okimilikej ma kineltokakan melajkan itlasojtlalis Dios.

⁴⁴ Uan ipan non ualchikome, omosentlalikej nochtin non chantij ipan non tlaueyikan para kikakiskej nin itlajtol Dios. ⁴⁵ Mas ijkuak non judíos okitakej omosentlalikej miyekej tlakaj, omoxiokojkej uan opekej kitlajtolnamikij uan kitlajtlauikaltij nin Pablo. ⁴⁶ Ompa Pablo uan Bernabé omoyolchikajkej, uan okijtokej:

—Uilijtika kachto namejuan nin nanjudíos tinamechnojnotzaskej nin itlajtól Dios, mas por amo nankiselaij, kiyin nankijtouaj amo nankinekij nin nemilistle non amo keman tlamis. Por uinon axkan tejuan tiauej tikinnojnotzaj non amo judíos. ⁴⁷ Kiyon otechtekimakak nin toSeñor, okijto:

Otimitztlali ke tlauike para tikintlauilis nin tlakaj non amo judíos, iteuan para tikimilis kenika kisaskej ijtek tlajtlakole nouiyan ipan non tlaie.

⁴⁸ Kuak non tlakaj non amo judíos okikakej nin tlajtole, opajpakej uan opejkej kijtouaj kuali nin itlajtól nin Señor, uan nochtin okineltokakej non okintlajpejpeni Dios para kipiasej nemilistle non amo keman tlamis. ⁴⁹ Kiyon oteititikej nin itlajtól nin Señor ipan nochtin non chantilimej sa ompa kampa ka Antioquía. ⁵⁰ Uan non judíos okinyolchikakej sekin siamej ueyixtikatej non okitlakaitayaj Dios, iteuan non tlakaj ueyixtikatej ipan non tlaueyikan para ma kimasikan Pablo uan Bernabé uan ma kinkixtikan ompa ipan non tlaie. ⁵¹ Ompa Pablo uan Bernabé omokxitzetelokej para ma kitakan non intlajtlakol non tlakaj, uan oyakej ipan tlaueyikan itoka Iconio.

⁵² Uan non tlaneltokakej oyoltenkej ika pakilistle uan ika Espiritu Santo.

Pablo uan Bernabé oasitój ipan non tlaueyikan itoka Iconio

14 Pablo uan Bernabé okalakej ijtek non intiopan non judíos, uan otenojnotzkej ika poder. Uan miyekej otlaneltokakej non judíos uan non amo judíos. ² Uan non judíos non amo okineltokayaj Jesus, okintlajtolmakakej non amo judíos para ma kinemilikan non amo kuali ka non tokniuan. ³ Por uinon Pablo uan Bernabé omokajkej miyek tonalmej ompa, otenojnotzkej ika yolchikaualistle uan okichiayaj ma kimpaleui toSeñor. Uan toSeñor okimmakak poder para ma kinchiuakan milagros uan okseki tlemach. Kiyon oteititiaya Dios melauak non tlenon oteiliayaj non tlatitlanilmej non itlasojtlalis Dios. ⁴ Uan non tlakaj non ochantiyaj ipan non tlaueyikan itoka Iconio omotlajkoxelokej, sekin oktayaj ka non judíos uan oksekin ka non tlatitlanilmej. ⁵ Satepan non judíos uan non amo judíos uan non tekichikej omotlajtolmakakej para kintlajtlakoltiskej uan kintemakaskej non tlatitlanilmej. ⁶ Uan ijkuak Pablo uan Bernabé okimatkej, ocholokej. Oyakej ipan non

laueyikamej intokayan Lистра uan Derbe. Nin laueyikamej katej ipan non tlale itoka Licaonia uan iteuan oyakej ipan non tlalmej non kiyoualouaj non laueyikamej. ⁷ Iteuan ompa otenojnotzkej nin kuali tlajtole.

Pablo okitemakakej ipan non laueyikan itoka Lистра

⁸ Ipan non laueyikan itoka Lистра oyeuataya sente tlakatl uelatik. Nin tlakatl sta ipan otlakat uelatik, uan amo keman onejnemiya. ⁹ Inin tlakatl okikaktaya tlenon Pablo okijtouaya, uan Pablo okiyekitak uan okitak kineltoka Jesus para kipajtis. ¹⁰ Pablo okili chikauak non mokokoua:

—Ximoketza melajkan.

Uan nin tlakatl niman omoketz uan ope nejnemi. ¹¹ Kuak okitakej nin tlenon okichi Pablo, non tlakaj non chantij Licaonia opejkej tzajtzij chikauak ka intlajtotl, okijtokej:

—¡Ome diostin omokuepej tlakaj uan oualakej totlak!

¹² Bernabé okitokayotikej dios Júpiter, uan Pablo dios Mercurio, por ijua otlajtouaya. ¹³ Uan non itiopixke Júpiter okipiaya itiopan ixtlan non laueyikan, uan okinualikak kuakuejtin uan okimmakijkej xochitl. Nin tiopixke uan non tlakaj okinekiyaj kimmiktiskej non kuakuejtin para ika kinueyitlaliskej Pablo uan Bernabé. ¹⁴ Mas ijkuak Pablo uan Bernabé okitakej inin, okitzatzayaskej non intzotzoma uan omotlalokej intzalan non tlakaj, tzajtziuej:

¹⁵ —¡Tlakaj! ¿Tleka kiyon nankichiuaj? Tejuan titlakaj ke namejuan, uan otialakej otimechilikoj xikajkauakan nin tlenon nankichiuaj nin amo namechpaleuis. Ximoyolkuepakan ka nin Dios yoltika, nin okichijchi nin tlenon onka tlakpak, nin tlale, nin atl ueyi uan nochi tlenon onka tlalpan uan nochi nin tlenon onka nouiyan. ¹⁶ Ipan nin tonalmej nin yopanokej, Dios okinkauili nin tlakaj ma kichiuakan tlenon ijuan okinekej. ¹⁷ Maski Dios mochipa okimmotiti akinon ijua, por okinchiuiliaya tlenon kuali. Ijua techualtitlanilia nin kiauittl uan ijua kichiuiilia ma tlamochiua, uan techmaka nochi tlenon tikkuaskej uan tlenon ika tipakiskej.

¹⁸ Mas kiyon okijtokej, Pablo uan Bernabé tekio ka okinseltikej non tlakaj para ma amo kimmiktikan non kuakuejtin para ika kinueyitlaliskej ijuan.

¹⁹ Ompa oasikoj sekín judíos oualeuayaj ipan non laueyikamej intokayan Antioquía uan Iconio, uan okinyolchikajkej non tlakaj para

ma kitemakakan Pablo. Uan ijkuak Pablo yokontemakakej, okixtikej kuelantiuej ka tlatentle, uan okinemiliayaj yomik. ²⁰ Uan ijkuak non tlaneltokakej okikoyoualokej Pablo, ijua omoketz uan okalak okse uelta ipan non tlaueyikan. Uan non ualmostla oyakej ineuan Bernabé ipan non tlaueyikan itoka Derbe.

²¹ Ompa ipan non tlaueyikan itoka Derbe otenojnotzkej nin kualitlajtole uan miyekej okineltokakej, uan satepan omokuepkej impan non tlaueyikamej intokayan Listra, Iconio uan Antioquía. ²² Ompa impan non tlaueyikamej okinyolchikajkej non tlaneltokakej para ma kineltokakan ka inyolmelajkan. Uan okimilikej uilijtika kipanosej para kalakiskej kampa tlanauatia Dios. ²³ Nouiyan kampa omosentlaliayaj non tlaneltokakej okintlalikej tlakaj para ma teyekanakan, uan satepan ijkuak yomotlatzajtzilikej uan ijkuak yomosajkej, okintlalikej ipan imatzin toSeñor, akin okineltokakej.

Pablo uan Bernabé omokuepkej ipan tlaueyikan itoka Antioquía ipan non tlae itokayan Siria

²⁴ Satepan opanokej ipan non tlae itoka Pisidia uan oasikoj ipan non tlae itoka Panfilia. ²⁵ Otenojnotzkej nin itlajtoll Dios ipan non tlaueyikan itoka Perge, uan satepan oyakej ipan non tlaueyikan itoka Atalia. ²⁶ Uan satepan ompa Atalia otlejkokej ijtek barko uan oyakej ipan non tlaueyikan itoka Antioquía, kampa okintitlankej ika itlasojtlalis Dios para ma kichiuakan nin tekittl nin axkan yotlankej.

²⁷ Kuak Pablo uan Bernabé oasikej Antioquía, okinsentlalikej non tlaneltokakej, uan oteilikkej nochi tlenon Dios okichi ka ijuan. Oteilikkej Dios inteuan okinseli nin amo judíos para noijke ma kualit kineltokakan Jesus. ²⁸ Pablo uan Bernabé omokajkej ompa miyek tonalmej ka non tlaneltokakej.

Ipan Jerusalén omotlamachtlalikej non tlaneltokakej

15 Ijkuak non tonalmej, sekin tlakaj oualeuayaj ipan non tlae itoka Judea uan oasikoj Antioquía uan opejkej kimititiaj non tokniuan para kisaskej ijtek tlajtlakole kipia para mosirkonsidaskej kenime okinnauati Moises. ² Pablo uan Bernabé omotlajtolkuepkej chikauak ka non tlakaj. Por uinon Pablo, Bernabé uan oksekin tokniuan okintechtikej ma yakan Jerusalén para ma kinnojnotzakan non tlatitlanilmej uan non ueuentzitzin tlayekankej uan teliskej tla

uilijtika mosirkonsidasoskej non amo judíos.

³ Non tlaneltokakej inchan Antioquía okintitlankej Pablo, Bernabé uan oksekin, uan ijkuak oyakej, opanokej ipan tlalmej intokayan Fenicia uan Samaria, uan okimilitayaj non tlaneltokakej kenika non amo judíos yokikajkej non kachto intlaneltokilis uan okineltokakej Dios. Uan non toknluan la opajpakijaj.

⁴ Kuak Pablo uan Bernabé oasikej Jerusalén, non tlatitlanilmej uan non ueuentzitzin tlayekankej okinselikej Pablo, Bernabé uan non oksekin, uan oteiligej nochi tlenon Dios okichi ka ijuan. ⁵ Uan sekin fariseos non yokineltokakej, omoketzkej uan okijtokej:

—Nin tlaneltokakej non amo judíos kipiaj para mosirkonsidasoskej, uan kichiuaskej tlenon nestika itech itlanauatil Dios.

⁶ Ompa omosentlalikey non tlatitlanilmej uan non ueuentzitzin tlayekankej para kektlaliskej nin tlajtole non yomijtojka. ⁷ Satepan ijkuak youejkaj monojnotzaj, Pedro omoketz uan okijto:

—Noknluan, namejuan nankimatij ikipia kana keski tonale, namotzalan namejuan Dios onechtexti para nikimilis nin kuali tlajtole non temakixtia ijtek tlajtlakole uan para ma kineltokakan Jesus nin tlakaj amo judíos. ⁸ Uan Dios kixmati nin inyolo nin tlakaj. Otechitititi inteuan kinselia nin amo judíos uan inteuan okimmakak non iEspíritu Santo ke tejuan. ⁹ Dios amo otechseli san tejuan, mas okinseli inteuan ijuan. Noijke ijuan Dios okinyolpojpo por kineltokaj Jesus. ¹⁰ Axkan, ¿tleka namomamatij ka nin tlenon Dios yokichi, tleka nankimmakaj nin tlanauatile nin tlaneltokakej? Nian tejuan nian non iuejka totatauan auele okichikej. ¹¹ Amo kiyon, tejuan tikneltokaj techmakixtia ijtek tlajtlakole nin toSeñor Jesus ke ijuan non amo judíos por techtlasojtla.

¹² Ompa nochtin otlatlamatatkej uan okikakej itlajtol Bernabé uan Pablo. Oteiligej Dios okinchi milagros uan okseki tlemach ka ijuan intzalan non amo judíos. ¹³ Kuak Pablo uan Bernabé otlankej tlajtlatouaj, Jacobo okijto:

—Noknluan, xinechkakikan: ¹⁴ Simón Pedro yotechili kenika Dios okinseli kimach ijtoti nin tlakaj non amo judíos, inteuan okintlapejpeni para ijua. ¹⁵ Kiyon panotika kenime otlajkuilokej non otlajtokej ipatka Dios. Kijtoua non Yektlajkuilole:

¹⁶ Satepan nokuepas, uan nikektlalis oksepa ichan David non yoxixiton, uan okse uelta nikektlalis non tlenon omoka,

uan okse uelta nikajkokis.

¹⁷ Para ma nechtemokan nochtin nin oksekin nin tlakaj, judíos uan amo judíos, para ma yekan nouaxkauan.

¹⁸ Kiyon kijtous toSeñor, kiyon okijto ipan non tonalmej iuejka.

¹⁹ Por uinon nikijtous ma amitla kimilikan nin amo judíos non yokikajkej non kachto intlaneltokilis para ma kineltokakan Dios.

²⁰ Kualika san tikinchiujiuiliskej ma amo kikuakan tlakuale non yokintlalilikaj non xantojtzimej, ma amo auilnemikan ika oksekin non amo inamik noso isiuu, ma amo kikuakan nakatl non itech uajuakke yestle, uan ma amo kikuakan yestle. ²¹ Sta ipan non tonalmej iuejka onka ipan sesente chantilistle akinon teititia itlanauatil Dios, nin kitlajoltia ijtek non totiopanuan ipan non tonale ijkuak toseuijaj.

²² Ompa non tlatitlanilmej uan non ueuentzitzin tlayekankej uan non oksekin tlaneltokakej okintechtikej tlakaj intzalan ijuan para ma yakan Antioquía inuan Pablo uan Bernabé. Non okintechtikej intokaj Judas Barsabás uan Silas. Inimej oktayaj ueyixtikatej intzalan non toknluan. ²³ Uan ka ijuan okititlankej amatlajkuilole kampa nestika: “Tejuan nin titlatitlanilmej uan nin tieuentzitzin titlayekankej uan nin toknluan, tikintlajpalouaj non toknluan non amo judíos non chantij Antioquía, Siria uan Cilicia. ²⁴ Otikmatkej sekin tlakaj okiskej nikan uan tejuan amo otikintitlankej. Inimej okinekiyaj namechtlapololtiskej. Oteititotj ma mosirkonsidarokan uan ma kichiuakan nochi tlenon kijtous itlanauatil Dios. ²⁵ Por uinon tejuan tonochtin otiknemilikej kualitintechtiskej tlakaj totzalan tejuan para tikintitlaniskej namotlak, ika nin totlasojiknluan Pablo uan Bernabé. ²⁶ Inimej la miyekpa yokipanokej por ipampa toSeñor Jesucristo. ²⁷ Por uinon axkan tinamechtlalanilij Judas uan Silas. Ijuan noijke ninamechiliskej uan namechyeknojnotzaskej nochi nin tlenon yotinamechchijchiuilikej. ²⁸ Nin Espíritu Santo okitak kualit, uan tejuan, amo tininamechiliskej nankichiuaskej nochi tlenon kijtous itlanauatil Dios, san ninamechiliskej nankichiuaskej inin: ²⁹ amo xikkuakan non nakatl non yokitlallilika non xantojtzimej, amo xikkuakan yestle, amo xikkuakan nakatl non san itech uajuakke yestle, uan amo itlak ximotekakan suatl ijkuak ayimo namosiuajtiaj.

Tla nankichiuaj nin tlenon namechiliaj, nankichiuaj kuali. Xiyolsejtakan namejuan.”

³⁰ Satepan Pablo, Bernabé, Judas uan Silas okintitlankej uan oyakej ipan non tlaueyikan itoka Antioquía. Uan ompa Antioquía okinsentlalikey non toknluan uan okimmakakej nin amatlajkuilole.

³¹ Uan ijkuak non toknluan okitlajtoltikey, la opajpakej uan omoyolseuikkej. ³² Uan Judas uan Silas inteuan otlajtouayaj ipatka Dios, por uinon okinyolseuikkej uan okinyolchikajkej non toknluan ka non intlajtotl. ³³ Satepan ijkuak Judas uan Silas yomokajkej kana keski tonale ompa Antioquía, non toknluan okinualtitlankej ka Jerusalén, okimilikej ma yakan ka kuali. ³⁴ Uan Silas okijto mokauas.

³⁵ Inteuan omokajkej Pablo, Bernabé uan miyekej oksekin ompa Antioquía, uan okseki oteititikej uan otenojnotzkej nin kuali tlajtole.

Pablo okis uejka ka okpa oya tenojnotza nin kuali tlajtole

³⁶ Satepan ijkuak yopanok kana keski tonale, Pablo okili Bernabé: —Toue tikintlajpalouaj oksepa nin toknluan para tikimitaskej kenika katej, ipan nin tlaueyikan kampa yotitenojnotzkej nin itlajtol toSeñor.

³⁷ Bernabé okinekiya ma kuikakan iteuan Juan Marcos. ³⁸ Maski Pablo amo okinek kuikaskej, por yokinualkajteka ipan non tlale itoka Panfilia, ijkuak amo oya iuan ipan non tekintl. ³⁹ Pablo uan Bernabé omotlankuitzuikej uan omoxelokej. Bernabé omonelokej ka Juan Marcos uan oyakej ipan non tlale itoka Chipre ijtek sente barko.

⁴⁰ Uan Pablo okimonelo Silas. Uan satepan ijkuak non toknluan yokintlalikey ipan itlasojtlalis toSeñor, okiskej. ⁴¹ Uan opanokej ipan tlalmej intokayan Siria uan Cilicia kinyolchikajtiuej nin toknluan.

Timoteo oya iuan Pablo uan Silas

16 Pablo uan Silas oasitoj ipan non tlaueyikamej intokayan Derbe uan Listra, kampa okinextikej sente tlaneltokake itoka Timoteo, ikone sente siuatl judía tlaneltokake uan non itata oktaya griego. ² Non toknluan non ochantiyaj ipan non tlaueyikamej intokayan Listra uan Iconio, otlajtouayaj kuali ka Timoteo. ³ Pablo okinek ma ya iuan Timoteo, uan okisirkonsidaro para amo kualaniskej non judíos non ochantiyaj ompa ipan non tlaueyikamej, por nochtin okimatiyaj itata griego. ⁴ Uan noyoka ipan non tlaueyikamej kampa opanoyaj, okimiliayaj non toknluan non tlenon okijtokej non tlatitlanilmej uan non ueuentzitzin tlayekankej ipan

Jerusalén. ⁵ Uan kiyon non tlaneltokakej okasikej chikaualistle ka non intlaneltokilis uan otlapiuiayaj momostla.

Pablo okochitak sente tlakatl ichan Macedonia

⁶ Uan non Espiritu Santo amo okinkauili ma tenojnotzakán non itlajtol Dios ipan non tlale itoka Asia. Por uinon okimelakej ipan non tlalmej intokayan Frigia uan Galacia. ⁷ Uan oasitoy kampa monamikij non tlalmej intokayan Misia uan Bitinia. Ompa okinemiliayaj kalakiskej ipan non tlale itoka Bitinia, mas non Espiritu Santo amo okinkauili. ⁸ Onkan opanokej ka inakastlan non tlale itoka Misia, uan oasitoy ipan non tlaueyikan itoka Troas itenko non atl ueyi. ⁹ Uan ijkuak non tlayoua Pablo okochitak sente tlakatl ichan Macedonia. Non tlakatl oyejkataya uan okiliaya Pablo: "Xipano ka Macedonia uan xitechpaleui." ¹⁰ Uan ijkuak Pablo okochitak, niman otipejkej titlayektlaliay para tiaskej Macedonia, uan otikmatiyaj kuali Dios otechnotztayaj para ma tikinnojnotzatiy nin kuali tlajtole.

Pablo uan Silas onentinemiyaj ipan non tlaueyikan itoka Filipos

¹¹ Otitledjokej ijtek sente barko uan otiajkej melajkan ipan non isla itoka Samotracia, uan non ualmostla otasitoy ipan non tlaueyikan itoka Neápolis. ¹² Uan ompa otiajkej Filipos. Non tlaueyikan Filipos ijua kachi ueyi ompa ipan non tlale Macedonia. Ipan nin tlaueyikan non romanos otlanauiatayaj. Ompa otokajkej kana keski tonale. ¹³ Non tonale ijkuak moseuiay non judíos otikiskej ka tlatentle, uan otiajkej atenko, kampa oyayaj omotlatzajtziayaj. Ototlalikey ompa uan otikinnojnotzkej nin kuali tlajtole non siamej non ompa otlamachkaktayaj. ¹⁴ Uan sente siuatl oitokaya Lidia. Nin siuatl ochantiya ipan non tlaueyikan itoka Tiatira. Ijua okinemakaya non kuali tzotzomajmej moraroykej, uan okueyitlaliaya Dios, uan ijkuak nin siuatl otlakaktaya, nin toSeñor okiyoltlapo para kiselis tlenon okijtouaya Pablo. ¹⁵ Uan Lidia omokuateki ka non ochantiayaj ichan, uan satepan otechtlatlajti uan otechili:

—Tla namejuan nankimatij non melauak nikneltoka toSeñor, ximokauakan nochan.

Uan otechtlatlajti para ma tiakan ichan uan otokauatoj.

¹⁶ Se uelta ijkuak otiajaj kampa motlatzajtziayaj, otikitakej sente ichpokatl okipiaya espiritu amo kuali. Nin siuatl oteitiliaya. Temak

oktaya nin situatl, uan ijkuak oteitiliaya, la okitlaniya melio uan okimmakaya non immak oktayaj. ¹⁷ Nin ichpokatl ope techtokaj Pablo uan tejuan, okijtojtaya chikauak:

—Nin tlakaj tekitij para Dios ueyixtika, uan namechititia nin kuali ojtle non temakixtia ijtek nin tlajtlakole.

¹⁸ Kiyin okichi miyek tonale, uan oasik tonale ijkuak Pablo okualan, omokuek uan okili non espíritu amo kuali non oktaya itech nin ichpokatl:

—Ipan itokalis Jesucristo timitztekimaka xikisa itech.

Uan non espíritu amo kuali niman okis itech non ichpokatl.

¹⁹ Uan ijkuak non immak oktaya non ichpokatl okitakej ayikuali kitlanis melio para ijuan, okimmasikej Pablo uan Silas uan okinuikakej plaza inka non tekichikej ueyixtikatej. ²⁰ Okinuikakej itlak non jueses uan oteiligej:

—Inin tlakaj judíos kimpasojtlaliaj nin tlakaj nin chantij ipan nin totlaueyikan. ²¹ Uan tlemach teititij non tlenon tejuan auele tikseliskej nian tikchiusaskej, por tejuan tiromanos.

²² Ompa non tlakaj okimixnamikej Pablo uan Silas, uan non jueses otlatekimakakej ma kinkijkixtikan uan ma kimmakilikan ka tlakotl.

²³ Satepan ijkuak la yokommimakiligej, okintzajtzakuatoj, uan okiligej non tetzajtzakuani ma kimmokuitlaui kuali. ²⁴ Kuak kiyon okiligej non tetzajtzakuani, okintzajtzakuato sta tlajtek, uan okimmakililigej non imikxiuan itech kuauitl itoka cepo para kiyon ayikuali kisaskej.

²⁵ Uan ka tlajko youak, Pablo uan Silas omotlatzajtzilitayaj uan okueyitlalitayaj Dios, uan non oksekin non ompa otzajtzaktayaj okinkakiyaj. ²⁶ Uan niman se tiempo la chikauak otlalolin, sta okitzetzelon non tlale kampa otlalyekatayaj non cárcel, uan niman omotlapojkej nochtin non puertas, uan nochtin non kadenas non kampa otzajtzaktayaj non tlakaj, okojkotonkej. ²⁷ Otlajtlachix non tetzajtzakuani uan ijkuak okitak non puertas tlapojtikatej, okixti non imachete para ika momiktis, por okinemiliaya non otzajtzaktayaj yocholokej. ²⁸ Mas Pablo okili chikauak:

—Amo ximomikti, tonochtin nikan tikatej.

²⁹ Satepan non tetzajtzakuani otlajtlan tlauiile, uan omotlalo ka tlajtek, uan ueueyokati omotlankuaketz imikxitlan Pablo uan Silas.

³⁰ Satepan okinkixti uan okimili:

—Tlakaj, ¿tlenon nikchiusas para nikisas ijtek tlajtlakole?

³¹ Ijuan otenankilikej:

—Xikneltoka toSeñor Jesucristo uan mitzmakixtis ijtek tlajtlakole, tejuua uan non chantij mochan.

³² Uan okinnojnotzkej itlajtol toSeñor ijua non tlakatl uan nochtin non ochantiyaj ichan. ³³ Ijua non tetzajtzakuani niman ijkuak non tlayoua okimpajpakili kampa okinkokojtayaj, uan niman omokuatekijkej ijua uan nin ochantiyaj ichan. ³⁴ Satepan okinuikak ichan uan okintlamakak. La opajpakej por okineltokakej Dios ijua non tetzajtzakuani uan non ochantiyaj ichan.

³⁵ Non ualmostla, non jueses okintitlankej policías para ma kilitij non tetzajtzakuani ma kinkajkauakan nin Pablo uan Silas. ³⁶ Uan non tetzajtzakuani okili Pablo:

—Non jueses oteualtitlankej ma nechilikij ma namechkajkaua; kuali axkan nankisaskej uan nanyaskej ka pakilistle.

³⁷ Pablo okimili non policías:

—Tejuan tiromanos, uan otechmakilikej teixtlan uan otechtzajtzakej mas ayimo okitayaj tla itlaj otiteuikiliayaj. ¿Uan axkan kinekij techkajkauaskej san ichtaka? ¡Amo! Ma ijuan techkixtikij.

³⁸ Non policías okimilitoj non jueses non okimili Pablo, uan ijuan omojkamikej ijkuak okimatkej Pablo uan Silas oktayaj romanos.

³⁹ Ompa non jueses oyakej omotlapojpoluitoj ka Pablo uan Silas, okinkixtikej ijtek non cárcel uan okintlatlajtikej ma kiskan ompa ipan non tlaueyikan. ⁴⁰ Kuak Pablo uan Silas okiskej ipan non cárcel, oyakej ichan Lidia, okinyolchikajkej nin toknluan uan satepan okiskej ipan non tlaueyikan.

Pablo uan Silas onemiyaj Tesalónica

17 Pablo uan Silas opanokej ipan non tlaueyikamej intokayan Anfipolis uan Apolonia, uan oasisoj ipan non tlaueyikan itoka Tesalónica. Ompa ipan non tlaueyikan oktaya sente intiopan non judíos. ² Pablo okichi ke okimatiya kichiuas, oya ijtek non intiopan non judíos uan yeyi sabados otenojnotz ompa.

³ Okinyekiluiaya tlenon kijtosneki nin Yektlajkuilole. Okimili nin Cristo okipiaya para kipanós uan mikis uan satepan moskalis. Uan okimiliaya:

—Ijua nin Jesus, nin ninamechnojnotza, ijua Cristo.

⁴Uan sekin non judíos okineltokakej Jesus okimmonelokej Pablo uan Silas. Uan inteuan miyekej griegos okineltokakej, tlakaj non okitlakaitayaj Dios uan miyekej siuamej ueyixtikatej. ⁵Uan non judíos non amo okineltokayaj omoxikojkej, uan okinsentlalikej sekin tlakaj amo kualtin. Nin tlakaj amo kualtin amo otekitiyay uan ka xolatl onentinemiyaj. Nin tlakaj okimpasolokej non tlakaj non ochantiyaj ompa ipan non tlaueyikan uan oyakej ichan Jasón, kitemojtiuej Pablo uan Silas para kinkixtiskej uan kintemaktiskej immak non tlakaj non ompa ochantiyaj. ⁶Uan por amo okinnextikej ompa, okinuikakej kuelantiuej Jasón uan inteuan oksekin tokniuan imixtlan non tekichikej ipan non tlaueyikan. Uan otzajtzikej chikauak, uan okitokej:

—Inin tlakaj nin yokimpasolokej nin tlakaj nouiyan ipan nin tlale, iteuan youalakej nikan. ⁷Uan Jasón okinkaloti ichan. Nochtin ijuan amo kitlakamati non itlanauatil non emperador itoka César. Ijuan kijtoug onka oksente rey itoka Jesus.

⁸Kuak okikakej nin tlajtote, non tlakaj uan non tekichikej omokuajkualantikej. ⁹Uan Jasón uan non oksekin tokniuan okitlaxtlakej para okinkajkajkej.

Pablo uan Silas onemiyaj ipan non tlaueyikan itoka Berea

¹⁰Uan ijkuak non tokniuan okinkixtikej Pablo uan Silas, niman okintitlankej ka tlayoua ipan tlaueyikan itoka Berea. Kuak oasitoj, oyakej ijtek non intiopan non judíos. ¹¹Nin tlakaj inchan Berea kachi kuali otlaneltokayaj, tla amo non ochantiyaj Tesalónica. Ka kuali inyolo okiselikej nin kuali tlajtote, uan momostla okitemouayaj itech non Yektlajkuilole tla melauak non tlenon okijtougaya Pablo. ¹²Uan miyekej okineltokakej Jesus. Inteuan miyekej griegos okineltokakej Jesus, tlakaj uan siuamej ueyixtikatej. ¹³Mas ijkuak okimatkej non judíos non ochantiyaj Tesalónica Pablo otenojnotzaya nin kuali tlajtote iteuan ipan Berea, oyakej ompa uan okimpasolokej non tlakaj. ¹⁴Ompa non tokniuan niman okititlankej Pablo ka itenko non atl ueyi, uan Silas uan Timoteo omokajkej ipan Berea. ¹⁵Non tlakaj non oyakej iuan Pablo okuikakej sta ipan non tlaueyikan itoka Atenas. Uan ijkuak nin tlakaj omokuepkej, okimili Pablo ma kimilikan Silas uan Timoteo ma san niman kinextitij Atenas.

Pablo onemiya ipan non tlaueyikan itoka Atenas

¹⁶ Kuak Pablo okinchiaya Silas uan Timoteo ompa Atenas, la omoyolkoko por okimitaya ompa ipan non tlaueyikan miyek xantojtzimej. ¹⁷ Por uinon okinnojnnotzayaj non judíos ijtek non intiopan. Iteuan okinnojnnotzaya ompa oksekin non okitlakaitayaj Dios; uan momostla okinnojnnotzaya non okimitaya ompa plaza.

¹⁸ Sekin tlajtolixmatkej non okinkuitiayaj epicúreos, uan oksekin tlajtolixmatkej non okinkuitiayaj estoicos opejkej motlajtolkuepaj ka Pablo. Sekin okijtouayaj:

—¿Tlenon techilisneki nin tlakatl nin la tlajtlatoua?

Uan oksekin okijtouayaj:

—Nesi ke tenojnotza itlanauatil oksekin diostin.

Kiyin okijtouayaj por Pablo okimiliaya non itlajtol Jesus uan non kenika omoskali. ¹⁹ Satepan okuikakej nin Pablo itokayan Areópago kampa omosentlaliayaj non tlajtolixmatkej uan okitlajtlanikej:

—¿Kuali tikmatischej tejuan tleteke nin yankuik tlamachtile nin tikualeka? ²⁰ Nin tlenon titechnojnotza, amo keman otikkakej, uan tiknekij tikmatischej tlenon kijtosneki inin.

²¹ Uan nochtin non tlakaj non ochantiyaj Atenas uan inteuan oksekin tlakaj amo otlakatkej ompa mas ochantiyaj Atenas, amo okichiuayaj tla okse, mochipa okinekiyaj kijtoskej uan kikakiskej okse yankuik tlajtole.

²² Ompa Pablo omoketz inepantla non Areópago, uan okijto:

—Tlakaj inchan Atenas, nikita namejuan la nankintlakaitaj nin diostin. ²³ Nejuatl onikimitztinemiya nin kampa nankueyitlaliyaj nin namodiostin, uan onikitak sente tlaixpan kampa nestika kiyin: “Para nin dios nin amo tikixmatij”. Axkan nin Dios nin nankueyitlaliyaj mas amo nankixmatij, ijua inin oninamechiliko.

²⁴ Nin Dios akin okichijchi nin tlale uan nochi nin tlenon onka ipan, ijua iuaxka nin tlakpak uan nin tlale. Amo chanti ijtek tiopammej non tlachijchijtle ika immatzin tlakaj. ²⁵ Uan amitla kipoloua para itlaj tikchuiaskej por ijua. Ijua techmaka nochi nin ika tinemij, nin ika timijyotiaj uan nochi nin tlenon tikpiaj.

²⁶ San ka sente tlakatl okinchiyachi nochtin nin tlakaj para ma chantikan noyoka ipan nin tlale, uan yokintlalili keski tonale nemiskej uan kampa chantiskej. ²⁷ Dios kiyon okichi para ma kitemokan, mas auele kinextiskej. Mas non melauak Dios amo uejka

ka touan, ka san intlak sesentemej nin tlakaj. ²⁸ Por ika ipoder Dios tinemij uan timoliniaj uan tikatej, inteuan kenime sekin non namotlajkuilouan okichijchikej: “Tejuan tiipiljuan Dios.” ²⁹ Tla tiipiljuan Dios, amo tiknemiliskej nin Dios ke sente xantojtzin tlachijchijtle ika oro, plata o ika tetl, uan tlachijtle ika immatzin tlakaj kenime ijuan kinemiliaj. ³⁰ Dios okilka nin intlajtlakol nin tlakaj non okichikej ijkuak amo okimatiyaj iuejka, mas axkan kintekimaka nin tlakaj nin chantij noyoka ipan nin tlale ma moyolkuepakan ka ijua. ³¹ Por Dios yokitlali se tonale ijkuak kimixkomakas ka melauak nochtin nin tlakaj nin chantij ipan nin tlale. Kimixkomakas ka Jesucristo akin yokitlapejpeni. Dios okimititi nochtin non tlakaj melauak kiyon kichiuas ijkuak okiskali Jesus kampa katej non mimikkej.

³² Kuak non tlakaj okikakej Pablo okijto non yomijmikej moskaliskej, sekin okipipinajtikej uan oksekin okijtokej:

—Kachi kuali okse tonale timitzkakiskej nin tlenon tikijtoua.

³³ Satepan Pablo okis ompa. ³⁴ Uan sekin tlakaj okineltokakej Jesus, uan okimonelokej Pablo. Ka ijuan oktaya sente tlakatl oitokaya Dionisio. Nin tlakatl oteyekanaya kampa non itoka Areópago. Iteuan sente situatl itoka Dámaris uan oksekin okineltokakej Jesus.

Pablo onentinemiya ipan non tlaueyikan itoka Corinto

18 Uan satepan, Pablo okis ompa Atenas uan oya ipan sente tlaueyikan itoka Corinto. ² Ompa Pablo okinexti sente judío oitokaya Aquila. Ichan oktaya ipan non tlale itoka Ponto. Ayimo okipiyaj miyek tonale Aquila uan non isiu itoka Priscila oasikoj ompa oualeuayaj Italia. Okiskej Italia por non emperador Claudio otlatekimakak ma kiskan nochtin non judíos ipan non tlaueyikan itoka Roma. Uan Pablo okintlajpaloto. ³ Uan Pablo iteuan otekitiya ke intekitl ijuan, por uinon omoka intlak para sepan tekitiskej. Okimijtozjomayaj kuitlaxmej uan ika okinchijchiuayaj kalmelj. ⁴ Uan mochipa non tonalmej ijkuak moseuiaj non judíos Pablo oyaya okinnojnötzaya ijtek non intiopan ijuan, uan Pablo okinekiya kinseltis non kuali tlajtole non judíos uan non amo judíos.

⁵ Kuak Silas uan Timoteo oasikoj ualeua ipan non tlale itoka Macedonia, Pablo okika non itekitl uan otenojnötzaya nin kuali tlajtole, uan okinyekiluiaya non judíos nin Jesus ijua Cristo non okichiayaj. ⁶ Uan non judíos okualankej uan opejkej kitlajtlakoltiaj

nin Pablo, uan Pablo okitzetzelo non itzotzoma para ma kitakan kinkajteua, uan okimili:

—Namejuan nankipiaskej namotlajtlakotl ika nammijmikiskej, ayikmo nejuatl notlajtlakotl. Axkan nipeuas nikinnojnotzas non amo judíos.

⁷ Pablo okis ijtek non intiopan non judíos uan oya ichan sente tlakatl itoka Justo. Nin tlakatl ochantiya itlak non tiopantle uan okueyitlaliaya Dios. ⁸ Sente tlakatl itoka Crispo oteyekanaya ijtek non intiopan non judíos. Okineltokakej non toSeñor ijua uan non ochantiyaj ichan. Inteuan miyekej tlakaj ompa Corinto inchan, ijkuak okikakej non kuali tlajtote, okineltokakej nin toSeñor uan omokuatekijkej. ⁹ Se youale Pablo okochitak non toSeñor akin okili: —Amo ximojkamiki, xikinnojnotza uan amo xikajkaua. ¹⁰ Nejua mouan nika uan auele ka tlajmitzaitis. Nikimpia miyekej tlakaj akinomej nechnehtokaskej nikan ipan nin tlaueyikan.

¹¹ Uan Pablo omoka se xijpan uan tlajko ompa Corinto uan oteititiaya itlajtol Dios.

¹² Ipan non tonalmej ijkuak Galión oktaya tlanauatike ipan non tlaletoka Acaya, non judíos omosentlalikey uan okixnamikej Pablo, uan okuikakej tiopan kampa tlaixkomakaj. ¹³ Uan okilikej non tlanauatike:

—Inin tlakatl kimilijtinemi nin tlakaj ma kueyitlalikan Dios, mas oksentlamantle teititia, amo kenime nestika itech totlanauatil.

¹⁴ Ya tlajtoskia Pablo, ijkuak Galión okimili non judíos:

—Tla itlaj okichi tlajtlakole o tla okichi amo kuali nin tlakatl, nejua namechkakiskia namejuan nin nanjudíos. ¹⁵ Mas por san tlajtolmej uan nombres uan non namotlanauatil, xikektlalikan namejuan, nejua amo nikneki niyes jues ika inin tlajtote.

¹⁶ Uan okinkixti kiauak ompa tiopan kampa tlaixkomakaj. ¹⁷ Onkan nochtin non griegos okasikej nin tlakatl itoka Sóstenes. Ijua oteyekanaya ijtek non intiopan non judíos. Okasikej uan okimakilikej ixtlan non tlanauatike. Uan Galión amitla okijto.

Pablo omokuek Antioquía uan okis uejka ka yexpa oya tenojnotza nin kuali tlajtote

¹⁸ Pablo ok miyek tonale omoka ompa Corinto, uan satepan okinnauati non toknluan, uan otlejkok ijtek sente barko uan oya ipan

non tlale itoka Siria. Sepan oyakej Priscila uan Aquila. Ompa ipan non tlaueyikan itoka Cencrea, Pablo omokuapetzotlali kuali para kisenkauas non tlenon okilika Dios kichiuas. ¹⁹ Kuak oasitoj ipan non tlaueyikan itoka Éfeso, Pablo okinka ompa Priscila uan Aquila, uan oya ijtek non intiopan non judíos uan okinnojnnotz non ompa omosentlaliyaj. ²⁰ Uan non judíos omotlatlajtikej itech Pablo para ma mokaua oksekin tonalmej, mas ijua amo okinek. ²¹ Satepan okinnauati uan okimili:

—Kipia para niyes Jerusalén para tikchiuaskej non iluittl non asis. Mas niualas okse uelta ninamechtlajpaloki, tla Dios kineki.

Uan satepan Pablo otlejkok ijtek sente barko uan okis ipan non tlaueyikan itoka Éfeso. ²² Kuak Pablo oasito Cesarea, oya Jerusalén okintlajpaloto non toknluan, uan satepan oya Antioquía. ²³ Omoka kana keski tonale ompa, uan satepan okis Antioquía uan oya ipan tlalmej intokayan Galacia uan Frigia uan okinyolchikajtaya nochtin non tlaneltokakej.

Apolos otenojnotz nin kuali tlajtole ipan non tlaueyikan itoka Éfeso

²⁴ Ijkuak non tonalmej oasiko ipan non tlaueyikan itoka Éfeso sente tlakatl itoka Apolos ochantiya ipan tlaueyikan itoka Alejandría. Nin Apolos la okixmatiya nin Yektlajkuilole uan la kuali otenojnotzaya nin kuali tlajtole. ²⁵ Nin Apolos yokimaxtijka nin iyojue toSeñor, uan otenojnotzaya ka pakilistle. Melajkan otenojnotzaya ka Jesus, mas san kenime otlakuatekiaya Juan okixmatiya. ²⁶ Apolos ope tenojnotza ka yolchikaualistle ijtek non intiopan non judíos, uan ijkuak okikakej Priscila uan Aquila, okuikakej oksejkan para kiyeknojnotzaskej kachi kuali nin iyojue Dios. ²⁷ Kuak Apolos okinekiya yas ipan non tlale itoka Acaya, non toknluan okiyolchikajkej uan okintitlanilikej amatlajkuilole non tlaneltokakej non ochantiyaj Acaya. Itech non amatlajkuilole onestaya ma kiselikan ka kuali. Kuak Apolos oasito Acaya, la okimpaleui non akinomej Dios ika itlasojtlalis okichi ma teneltokakan. ²⁸ Nin Apolos ika yolchikaualistle okinnojnnotzaya uan teixtlan oteititiaya amo kiyon kenime okijtouayaj non judíos. Apolos okimititiaya ika nin Yektlajkuilole non Jesus ijua Cristo non okichiayaj ijuan.

Pablo onemiya Éfeso

19 Chika Apolos oktaya Corinto, Pablo onemiya kampa non tepeyo, uan oasito Éfeso. Ompa okinexti sekin tlaneltokakej. ² Uan okintlajtlani:

—¿Onankiselikey namejuan non Espíritu Santo ijkuak onankineltokakej?

Uan ijuan okinankilikej:

—¡Amo! Amo keman tikkakij tla onka Espíritu Santo.

³ Pablo okintlajtlani:

—Kine ¿tlen tlakuatekilistle onankiselikey?

Ijuan okinankilikej:

—Otokuatekijkej ke otekuatekiaya Juan non Tlakuatekiani.

⁴ Pablo okimili:

—Juan okinkuatekiaya non omoyolkuepayaj ka Dios, mas okimiliaya kipia para kineltokaskej non ualas satepan ijua, kijtosneki ma kineltokakan Jesucristo.

⁵ Kuak okikakej nin tlenon okijto Pablo, omokuatekijkej ipan itokalis toSeñor Jesus. ⁶ Uan ijkuak Pablo okitlali impan non imatzin, non Espíritu Santo ouala intech, uan otlajtlatokej ika yankuikkej tlajtolmej uan otlajtouayaj ipatka Dios. ⁷ Oktayaj por nochtin kana majtlaktle uan ome tlakaj.

⁸ Kana yeyi metztle Pablo oyajtaya ijtek non intiopan non judíos, kanin okinnojnnotzaya ika yolchikualistle, okinseltiaya ma kineltokakan nin kenika tlanauatia Dios. ⁹ Mas sekin omoyoltepitzojkej uan amo okinekej kineltokaskej uan okitlajtlakoltiyaj nin kuali tlajtole imixtlan non tlakaj. Ompa Pablo omejkuan intlak uan okinuikak nin tlaneltokakej ijtek sente iskuela kampa otemachtiaya sente tlakatl itoka Tiranno, uan ompa okinnojnnotzayaj momostla. ¹⁰ Kiyon okichi kana ome xiuitl, uan nochtin non judíos uan non amo judíos non ochantiyaj ipan non tlale itoka Asia okikakej nin itlajtol toSeñor Jesus. ¹¹ Uan Pablo okinchiuaya milagros ika non ipoder Dios. ¹² Sta okimpajtiayaj non kokoxkej uan okisayaj intech non espíritus amo kualtin ijkuak okinuikiliayaj inon ipanitojuan uan non itzotzoma non okimmaxiliaya Pablo.

¹³ Uan sekin judíos oxolalnemiyaj, okinekiyaj kinkixtiskej espíritus amo kualtin ipan itokalis toSeñor Jesus, uan okimiliayaj non espíritus amo kualtin:

—Namechtekimaka xikisakan ipan itokalis Jesus non tenojnotza Pablo.

¹⁴ Kiyon okichiuayaj chikome ipiluan sente judío oitokaya Esceva. Inin oktaya sente tiopixke ueyixtika. ¹⁵ Uan se tonale ijkuak okixtiayaj, non espíritu amo kuali okimili:

—Nikixmati nin Jesus, uan nikmati akinon Pablo, mas namejuan, ¿nanakinomej?

¹⁶ Non tlakatl non itech oktaya non espíritu amo kuali impan otzekuin non tlakaj, okinuitek chikauak uan okinkixti. Uan ijuan ocholokej ompa ijtek non kale mokokoxtiuej uan xitlatztikej. ¹⁷ Nochtin non ochantiyaj Éfeso, judíos uan griegos, okimatkej non tlenon opanok uan omojkamikej, uan okueyitlaliayaj toSeñor Jesus.

¹⁸ Uan miyekej non okineltokakej Jesus oualayaj uan oteuluiayaj non intlajtlakoluan non kachto okichiuayaj. ¹⁹ Uan miyekej oktayaj tlatlajmatkej, uan okinualikakej non inlibros uan okintlatikej imixtlan nochtin. Uan ijkuak okitakej kekechton ipati non libros, okitakej ipati kana ompouale uan majtlaktle mil melio tlachijchijtle ka plata.

²⁰ Kiyon nin itlajtol Dios san kampa uilis okimatiyaj, uan okitakej non ipoder.

²¹ Satepan ijkuak yopanok inin, Pablo okijto itech iyolo kimitati non tlaneltokakej non inchan Macedonia uan Acaya, uan asiti sta Jerusalén. Uan okijto:

—Nasis Jerusalén uan satepan kipia para niyas iteuan Roma.

²² Uan ompa Pablo okintitlan Macedonia ome non okipaleuiayaj intokaj Timoteo uan Erasto, uan ijua omoka kana keski tonale ipan non tlale itoka Asia.

Ipan non tlaueyikan Éfeso omopasolouayaj tlakaj

²³ Ijkuak non tonalmej la omopasolokej nin tlakaj ka nin kuali tlajtole. ²⁴ Okipeualti sente tlakatl itoka Demetrio. Nin tlakatl tlemach okinchijchiuaya ka plata. Okichijchiuaya titiopammej tetepichichin, ke non itiopan sente xantojtzin itoka Diana. Kiyon non itlak otekitiyaj Demetrio, okitlaniyaj ueyi melio. ²⁵ Okinsentlali non itlak otekitiyaj uan oksekin tlakaj non otekitiyaj siyikiyon, uan okimili: —Tlakaj, nankimatij namejuan tiktlaniy ueyi melio ka nin tekittl.

²⁶ Uan namejuan nankitaj uan nankikakij, nin Pablo kijtojtinemi nin xantojtzimej nin kinchijchiuayaj nin tlakaj amo diostin, uan miyekej tlakaj inchan nikan Éfeso uan nochi ipan nin tlale Asia kineltokaj nin tlenon kijtous Pablo. ²⁷ Uan amo kuali ka tejuan, uan kuali tikpoloskej nin totekittl, uan iteuan kuali ayikmo kitlakaitaskej nin

itiopan non toxantojtzin Diana, uan ayikmo kueyitlaliskej nin tlakaj nin chantij noyoka Asia uan nin chantij noyoka ipan nin tlale.

²⁸ Kuak non tlakaj okikakej inin tlajtole, la okualankej uan otzajtzikey chikauak, okijtokej:

—iUeyixtika nin toxantojtzin Diana, toxantojtzin nin tiefesios!

²⁹ Uan nochtin non tlakaj non ochantiyaj ompa amo okimpakti. Uan okimasikej Gayo uan Aristarco, uan okinuelantakej ijtek non kale kampa omosentlaliayaj nochtin ijuan. Nin Gayo uan Aristarco ochantiyaj ipan non tlale itoka Macedonia uan iuan onentinemiyaj Pablo. ³⁰ Pablo okinekiya kalakis ompa para kinnojnotzas non tlakaj, mas non tlaneltokakej amo okikauilikej. ³¹ Iteuan sekin tekichikej ipan non tlale itoka Asia, oktayaj isepan Pablo uan okinauatikej ma amo kalaki ompa kampa mosentlaliaj non tlakaj. ³² Non tlakaj non omosentlalikey, sekin okijtouayaj se tlajtole uan oksekin okijtouayaj oksentlamantle. Nin tlakaj omopasolokey uan miyekey amo okimatiyaj tleka omosentlalikey. ³³ Uan sekin non judíos okilikej Alejandro tleka omosentlalikey uan okimapejkej sta imixpan. Alejandro okichi seña ka non imatzin para ma tlatlamatakan, uan okinekiya tlajtos impatka non judíos imixtlan non tlakaj. ³⁴ Mas non tlakaj ijkuak okixmatkej nin Alejandro iteuan oktaya judío, otzajtzikey nochtin kana ome hora, okijtokej:

—iUeyixtika nin toxantojtzin Diana, toxantojtzin nin tiefesios!

³⁵ Ompa non tlajkuilouani ipan non tlaueyikan, ijkuak okichi ma moseuikan non tlakaj, okimili:

—Tlakaj inchan Éfeso, nochtin nin chantij ipan nin tlaueyikan, kimatij nin tlakaj nin inchan Éfeso kimokuitlaluskej nin itiopan nin xantojtzin itoka Diana, nin toxantojtzin nin ualeua tlakpak. ³⁶ Auele kaj kijtos amo kiyon, ayikmo xitzajtzikian uan amitla xikchiuakan tla ayimo nankinemiliaj. ³⁷ Nin tlakaj nin onankinualikakej nikan, amitla okichtekej ijtek non totiopan uan amo otlajtlajkojkej ka nin toxantojtzin Diana. ³⁸ Tla Demetrio uan non tekitij itlak kinekij kinteiluiskej nin tlakaj, ma yakan kampa katej non tekichikej kampa teyektlaliaj. Por uinon onkatej jueses kampa teixkomakaj. ³⁹ Uan tla namejuan nantlajtlanij itlaj okse, nantlajtlaniskej ijkuak mosentlaliskej non tekichikej. ⁴⁰ Axkan nin tlenon yopanok, kuali techteiluiskej por titlapasolouaj. Amo onka kenika titeiliskej tla kaj techtlajtlaniaj nin tlenon opanok.

⁴¹ Kuak non tlajkuilouani otlán tlajtlátoua, okintijitlan para ma yakan inchajchan.

Pablo oya ipan tlalmej intokayan Macedonia uan Grecia

20 Satepan ijkuak ayikmo omopasolokej, Pablo okinnotz non tlaneltokakej para kinyolchikauas uan okinnajnouati uan okimmajmalkocho, uan satepan oya Macedonia. ² Okimitato nochtin nin tlaneltokakej ipan non tlalmej, kinyolchikajti ika non itlajtol, uan oasito ipan tlale itoka Grecia. ³ Ompa ipan non tlale omoka yeyi metztle. Uan yotlejkoya ijtek non barko para ualas ipan non tlale Siria, ijkuak okima, non judíos yokijtokej kasiskej ijua. Por uinon okijto yas ipan okse ojtle, uan opanok okse uelta ka Macedonia. ⁴ Uan sekin toknluan oyakej iuan Pablo sta ipan non tlale itoka Asia. Nin toknluan intokaj: Sópater, non ikone Pirro, non otlakat Berea, Aristarco uan Segundo non otlakatkej Tesalónica, Gayo non otlakat Derbe, Timoteo, uan inteuan Tíquico uan Trófimo non otlakatkej ipan non tlale Asia. ⁵ Nin toknluan otlayekankej uan otechchixkej ipan non tlaueyikan itoka Troas. ⁶ Satepan ijkuak yopanok non iluitl ijkuak mokua non pantzin non amo kipia levadura, otikiskej ipan non tlaueyikan itoka Filipos ijtek barko, uan ipan makuile tonale otikimasitoj Troas. Ompa otokajkej chikome tonalmej.

Pablo oasito Troas

⁷ Non tonale ijkuak peua non semana, otosentlalikey para tikkuaskej non pantzin nin ika tikilnamikij ijkuak omik Jesus, uan Pablo okinnojnnotz non toknluan. Uan Pablo okipiaya para kisas non ualmostla, por uinon ouejka kinnojnnotza, sta oasik tlajko youak.

⁸ Otaktayaj tonochtin ijtek sente kaltek ipan yeyi piso. Ompa kaltek oxotlatayaj miyekej tlauilmej. ⁹ Uan sente telpokatl oitokaya Eutico oyeuataya ipan non ventana. Pablo ouejka otenojnotztaya uan non telpokatl la okochisnekiya, uan okitlan non kochistle uan onkan ouetziko ipan non yeyi piso sta tlalpan uan ijkuak okeuatoj, yomik. ¹⁰ Ompa Pablo otemok uan omixtlajpaxtekak ipan non telpokatl uan okimalkocho. Uan okimili non toknluan:

—Amo ximojkamikikan, yoltika.

¹¹ Uan Pablo okse uelta otlejkok tlapauetzian, uan okixejxelo nin pantzin uan tonochtin otikkuakej. Uan Pablo oksepa ope tenojnotza

sta otlajtlanes, uan satepan okis ompa. ¹² Uan non telpokatl okuikakej ichan yoltika, uan nochtin la omoyolchikajkej.

Pablo oya ipan non tlaueyikan itoka Mileto

¹³ Tejuan otitlayekankej ijtek barko uan atasitoy ipan non tlaueyikan itoka Asón, uan ompa otikantikiskej Pablo. Kiyon otokajkej por ijua okinek nejntentas. ¹⁴ Kuak otontexikej ka ijua ipan Asón, Pablo otlejkok ijtek non barko, uan otiyakej ipan tlaueyikan itoka Mitilene. ¹⁵ Otikiskej ompa Mitilene uan non ualmostla otipanokej ixtilan sente isla itoka Quío, uan non ualuptla otasikej ipan sente tlaueyikan itoka Samos. Othoseuikkej ipan sente tlaueyikan itoka Trogilio, uan non ualmostla atasitoy Mileto. ¹⁶ Kiyon otikchikej por Pablo amo okinek panos Éfeso, para amo mokauas miyek tonale ipan non tlale Asia. Okinekiya san uiliui asiti Jerusalén tla kualí, para ompa ipan panos non iluitl itoka Pentecostés.

Pablo okinnauati non ueuentzitzin tlayekankej non ochantiyaj Éfeso

¹⁷ Kuak Pablo oktaya Mileto, oteitlan ma kimanatij non ueuentzitzin tlayekankej ipan non tlaueyikan itoka Éfeso. ¹⁸ Uan ijkuak oualakej, okimili:

—Namejuan nankimatij kenika yoninen namouan, sta kachto ijkuak onasiko nikan ipan nin tlale Asia uan sta axkan. ¹⁹ Mochipa onaktaya namouan uan onitekitjtaya para toSeñor, uan amo onoueyiketzya. Onichokaya uan onipanok tlajyouilistle por non tlenon okinekiyaj nechaitiskej non judíos. ²⁰ Mas mochipa yoninamechnojnotz nin itlajtlo Dios, non tlenon kualí para namejuan. Yonamechmachtij imixpan nin tlakaj uan namochan. ²¹ Nin judíos uan nin griegos yonikimili ma moyolkuepakan ka Dios, uan ma kineltokakan toSeñor Jesucristo. ²² Axkan, niya Jerusalén. Nin Espíritu Santo kineki ma niya, uan amo nikmati tlenon panos noka ompa Jerusalén. ²³ San nikmati noyoka ipan nin tlaueyikan kampa ka niya, nin Espíritu Santo nechilia nechztajtzakuaskej uan la nechpanoltiskej. ²⁴ Mas amitla nikhnemilia maski nechmiktiskej, san nikhnemilia nitlamis nin notekitl ka pakilistle. Nin toSeñor Jesus onechkaulite tekitl nin kampa kineki ma nitenojnotza nin kualí tlajtlole ka itlasojtlalis Dios.

²⁵ 'Axkan nikmati namonochtin nin yoninamechnojnotz kenika tlanauatia Dios, ayikmo nannechitaskej. ²⁶ Por uinon nikneki nininamechilis axkan akinon amo kineltoka Jesus, ayikmo notlajtلاكotl. ²⁷ Nejua yoninamechmachilti uan amitla oniktlati nochi tlenon okinekiya Dios xikmatikan. ²⁸ Axkan, ximokuitlauikan ka namejuan, uan iteuan xikimmokuitlauikan nochtin non tlaneltokakej. Non Espiritu Santo onamechtlati para nankimmokuitlausej non kineltokaj toSeñor Jesus, akin okinko ika iyesyo. ²⁹ Mas nikmati ijkuak yoniya, ualaskaj sekin tlakaj uan kinekiskej kinkajkayauaskej non tlaneltokakej ke non tekuanimej ijkuak kinekij kinkuaskej non borregos. ³⁰ Uan sekin ka namejuan peuskej teititiskej non amo melauak para kinuikaskej non tlaneltokakej. ³¹ Ximokuitlauikan uan xikilnamikikan yoninamechtlajtoltmakak ka tonale uan ka tlayoua nin yeyi xiuitl, uan yonichokak por sesentemej namejuan.

³² 'Axkan, nokniuan, ninamechtlalia ipan imatzin Dios uan ipan nin kualitlajtoltle itlasojtlalis. Nin kualitlajtoltle kipia poder para namechylchikauas itech namotlaneltokilis uan para namechmakas non yonamechkakilti nin kualitlajtoltle non yokinyolchipaj yeskej sa sejkan. ³³ Amikaj onikuelitili imelio nian itzotzoma. ³⁴ Namejuan kualitlajtoltle onitekit ika nomatzin para nikpias non tlenon onechpolouaya uan para nikimpaleuis non nouan onemiyaj.

³⁵ Mochipa yoninamechititi kiyin nantekitiskej para nankimpaleuiskej akin itlajtoltle kimpoloua. Xikilnamikikan non itlajtoltle nin toSeñor Jesus ijkuak okijto: "Kachi kualitlajtoltle temakas tla amo kimakaskej."

³⁶ Satepan ijkuak Pablo otlantlajtoltle, omotlankuaketz uan omotlatzajtoltle inochtin. ³⁷ Uan nochtin ochokakej, okimmalkochojkej uan okipitzojkej Pablo. ³⁸ Uan la omoyolkokojkej por okimili amo keman kitaskej. Uan satepan okikajkauatoj itlak non barko.

Pablo oya Jerusalén

21 Kuak otikinkajkej non tokniuan, otilejkokej ijtek barko uan otiyakej ipan non tlale itoka Cos, uan non ualmostla otiyakej ipan non isla itoka Rodas, uan ompa otiyakej ipan non tlaueyikan itoka Pátara. ² Ompa Pátara otikasikej sente barko non oyaya ipan non tlale itoka Fenicia. Otilejkokej ijtek uan otiyakej. ³ Uan otikitakej non isla itoka Chipre, uan otikajkej non isla ka tomaopoch, uan otiyakej sta ipan non tlale itoka Siria. Non barko

otlatemouito sta ipan non tlaueyikan itoka Tiro, uan tejuan ompa otitemotoj. ⁴ Uan otikinnexikej non tlaneltokakej uan otokajkej inuan chikome tonalmej, uan non Espiritu Santo okimili ma kilikan Pablo ma amo ya Jerusalén. ⁵ Mas ijkuak yotichikometikej, otikiskej ompa. Nochtin non tlaneltokakej inuan non insiuauan uan non impiljuan touan okiskej ipan non tlaueyikan uan ompa itenko non atl ueyi ototlankuaketzkej uan ototlatzajtzilikej. ⁶ Uan satepan otonauatikej, otomajmalkochojkej uan otitlejkokej ijtek non barko, uan ijuan omokuepej inchan.

⁷ Otikiskej Tiro uan otitlejkokej ijtek barko uan otiyakej sta ipan non tlaueyikan Tolemada. Ompa non tokniuan otikintlajpalokej uan otokajkej inuan se tonale. ⁸ Non ualmostla, Pablo uan non iuan otaktayaj, otikiskej ompa, uan otasitoj ipan non tlaueyikan itoka Cesarea. Ompa otiyakej ichan Felipe uan ompa otokajkej. Felipe otenojnotzaya nin kuali tlajtole, uan ijua oktaya sente non chikome tlapaleuianimej. ⁹ Felipe okimpiaya naui ichpochuan, ayimo omonamiktiayaj. Nin ichpokamej otlajtouayaj ipatka Dios.

¹⁰ Yotaktayaj ompa miyek tonale, ijkuak oasiko Agabo, sente tlakatl non oualeuaya Judea uan tlajtoua ipatka Dios. ¹¹ Nin tlakatl otechtlajpaloko, satepan okitojtomili non isintaron Pablo, uan ika omokxiilpi uan omomailpi, uan okijto:

—Nin Espiritu Santo kijtousa ompa Jerusalén non judíos kilpiskej kiyin nin akinon iuaxka nin sintaron, uan kitemaktiskej imak non tlakaj non amo judíos.

¹² Kuak otikkakej nin tlajtole, tejuan uan non chantij Cesarea otikilikej Pablo ma amo ya Jerusalén. ¹³ Mas Pablo otechnankili: —¿Tleka nanchokaj uan nankichiuaj ma noyolkoko? Nejua yonotemakak amo san para nechilpiskej, iteuan para nechmiktiskej ompa Jerusalén por ipampa toSeñor Jesus.

¹⁴ Uan auele otikyolpatlakej, uan satepan otikajkej uan otikilikej: —Ma mochiua tlenon kineki toSeñor.

¹⁵ Satepan, otimektlalikej uan otiyakej Jerusalén. ¹⁶ Uan oyakej touan sekin tlaneltokakej non ochantiyaj Cesarea, uan intzalan oya sente tlakatl ochantiya Chipre oitokaya Mnasón. Nin tlakatl youejka kineltoka Jesus, uan ompa ichan otokalotikej.

Pablo okitlajpaloto Jacobo

¹⁷ Kuak otasitoj Jerusalén, non toknluan otechselikej ka pakilistle.

¹⁸ Non ualmostla Pablo oya touan otiktalajpalotoj Jacobo, uan ompa intean oktayaj nochtin non ueuentzitzin. ¹⁹ Pablo okintlajpalo, uan okimili nochi tlenon Dios okichi ka ijua, ijkuak onemiya intzalan non amo judíos. ²⁰ Kuak okikakej, okueyitlalikey Dios. Uan okilikej Pablo:

—Toknin Pablo, yotikitak miyek mil judíos yokineltokekej Jesus, uan nochtin ijuan kijtoug ma mochiua tlenon nestika itech itlanauatil Dios. ²¹ Uan yokimatkej tejua tikimititia nochtin nin judíos nin chantij ipan tetlaluana ma kikaukana itlanauatil Dios, uan itean yotikimili ma amo mosirkonsidarokan non impiljuan, uan ma ayikmo kichiuakan non tlenon yokimmachtikej. ²² ¿Tlenon tikchiusaskej? Nin tlakaj ijkuak kimatiskej yotiuala, mosentlaliskej. ²³ Kachi kuali xikchiua kiyin: Nikan katej touan nauimej tlakaj kisenkauaskej non tlenon okilikaj Dios kichiusaskej. ²⁴ Xikinuika uan ximopojpoua inuan, xikintlaxtlauli para ma mokuatesonokan. Kiyon nochtin kimatiskej amo melauak non tlenon okimilikej ka tejua, kimatiskej tikchiua tlenon kijtoug itlanauatil Dios. ²⁵ Uan nin tlaneltokakej nin amo judíos yotikinchiuulikej itech amatl, ma amo kikuakan nakatl non yokitlalilika xantojtzin, nian yestle, nian nakatl non amo kixtilia iyesy. Uan ma amo tetlak kochikan tla ayimo mosiuajtijaj.

Pablo okasikej ijtek non tiopantle

²⁶ Ompa Pablo okinuikak inauixtin non tlakaj, uan non ualmostla omopojpo inuan, uan satepan okalak ijtek non tiopantle para teilis tlen tonale tlamis non mopojpoua uan ijkuak sesentemej ijuan kipiaj para kimmiktiskej non yolkamej uan kintlaliskej ixtlan Dios.

²⁷ Mas ijkuak itlamis chikome tonalmej, sekin judíos ualeuaj ipan non tlaletoka Asia okitakej Pablo paka ijtek non tiopantle, uan okimpasolokej nochtin non tlakaj. Uan okasikej Pablo. ²⁸ Uan otzajtzikey, okijtokej:

—¡Tlakaj israelitas, xitechpaleuikan! Nikanka nin tlakatl nin teititjtinemi nouiyan ma amo kichiuakan non tlenon tikchiuaj nin tiisraelitas, ma amo kichiuakan tlenon kijtoug itlanauatil Dios, uan ma amo kitlakaitakan nin tiopantle. Uan axkan yokinkalakej ijtek non tiopantle sekin tlakaj griegos. Kiyon otlakakatzojkej nikan kampa nin tlateuechijtle.

²⁹ Kiyon okijtokej por ipan non tlaueyikan kachto okitakej ka Trófimo ichan Éfeso, uan okinemiliaya Pablo okonuikaya ijtek non tiopantle.

³⁰ Nochtin nin tlakaj nin chantij ipan nin tlaueyikan omopasolokej, ompa okasikej Pablo, uan okixtikej ijtek non tiopantle, uan niman otlatzajtzakej. ³¹ Yokinekiya kimiktiskej Pablo ijkuak okilikej non soldado tlanauatiani, nochtin nin tlakaj nin chantij Jerusalén yomopasolokej. ³² Ompa non soldado tlanauatiani okinsentlali non isoldadotinuan non tlakaj tlatekimakaj, uan oualmotlalokej kampa oktayaj non tlakaj. Uan ijkuak okimitakej non soldado tlanauatiani uan non soldados, ayikmo okimakilikej Pablo. ³³ Ompa non soldado tlanauatiani omopecho itlak Pablo uan okasik, uan otlatekimakak ma kilpikan ka ome kadenas. Satepan okitlajtlani akin ijua uan tlenon okonchi. ³⁴ Mas sekin otzajtziyaj, okijtouayaj se tlajtole uan oksekin okijtouayaj oksentlamantle uan por uinon non soldado tlanauatiani auele tla okikakiya, uan otlatitlan ma kuikakan Pablo ipan non komandansia. ³⁵ Kuak oasitoj ixtlan non tlatotoktle, non soldadotinokikechpanojkej Pablo, para amitla kayitiskej. ³⁶ Uan nochtin oualayaj ualtzajtziuej, kualejtjtiuej:
—¡Ma miki!

Pablo omopaleui imixtlan non tlakaj

³⁷ Kuak ikikalakiskej Pablo ijtek non komandansia, ijua okili non soldado tlanauatiani:

—¿Kuali itlaj nikijtos?

Non soldado tlanauatiani okinankili:

—¿Kuali titlajtlatoua griego? ³⁸ Kine, ¿amo tejua non egipcio non ikipia kana keski tonale okimpasolo non tlakaj, uan okinuikak nau mil temiktianimej ipan non tlatluakan?

³⁹ Ompa Pablo okijto:

—Nejua nijudio, uan onitlakat ipan non tlaueyikan itoka Tarso. Nin tlaueyikan ueyixtika ipan non tlale Cilicia. Notlatlajtia motech xinechkauili nikinnotzas nin tlakaj.

⁴⁰ Non soldado tlanauatiani okikauili, uan Pablo omoketz ipan non tlatotoktle uan okichi seña ka non imatzin para ma tlatlamatakan. Kuak otlatlamatinij, okinnotz ka tlajtole hebreo, okijto:

22 —Noknuiuan uan notatajuan, xinechkakikan tlenon nikijtos para nopaleuis.

² Kuak okikakej kinnojnotza ika tlajtole hebreo, kachi otlatlamatinij, uan Pablo okimili:

³ —Nejua nijudio. Onitlakat ipan non tlaueyikan itoka Tarso ipan non tlale itoka Cilicia, mas oniueryak nikan Jerusalén. Uan onechmachi Gamaliel, onechmachi non intlanauatil non iuejka totatauan.

Mochipa oniknekiya nitekitis ka nochi noyolo para Dios, kenime namejuan nankichiuaj ipan nin tonale. ⁴ Nejua kachto

onikintemouaya non kineltokaj iyojue Jesus para nikintzajtzakuas uan sekin sta nikimmijmiktis, uan onikinuiak onikintzajtzakuato

tlakaj uan siamej. ⁵ Uan nin tiopixke ueyixtika uan nochtin nin ueuentzitzin kuali kijtoskej. Ijuan onechmakakej amatlajkuilolmej para nikimititis non toknuiuan judíos non chantij Damasco. Itech non amatlajkuilolmej nestika kuali nikintzajtzakuas non kineltokaj Jesus. Uan onikintemoto Damasco para nikinualikas Jerusalén para ompa nikintzajtzakuas.

Pablo oteili kenika okineltokak Jesus

(Hch. 9:1-19; 26:12-18)

⁶ Uan ijkuak oniyaya ipan ojtle ijkuak yonositaya Damasco, ika tlakualespan, se tiempo onechtlauili sente ueyi tlaule ouale tlakpak.

⁷ Uan oniuetz tlalpan. Uan onikkak sente tlajtole onechili: “Saulo,

Saulo, ¿tleka tinechtemojtinemi?” ⁸ Uan onitlajtlan: “¿Akin tejua

Señor?” Uan ijua onechili: “Nejua niJesus niualeua Nazaret. Nejua

nin tinechtemojtinemi.” ⁹ Uan non nouan oktayaj, okitakej non

tlaule, mas amo okikakej non tlajtole non onechnotz. ¹⁰ Ompa nejua

onikijto: “¿Tlenon nikchiuas, Señor?” Uan non Señor onechili:

“Ximoketza uan xia ipan non tlaueyikan itoka Damasco, uan ompa

mitziliskej nochi tlenon tikchiuas.” ¹¹ Uan non tlaule

onechixtlapacho, por uinon non nouan onemiyaj, onechtelantakej sta Damasco.

¹² Ompa Damasco oktaya sente tlakatl oitokaya Ananías. Ijua

okichiuaya tlenon onestaya itech itlanauatil Dios, uan nochtin non

judíos non ochantiyaj Damasco otlajtouayaj kuali ika ijua. ¹³ Uan

Ananías onechitako, uan ijkuak oasiko, onechili: “Noknin Saulo, xitlajtlachia oksepa.” Uan niman onitlachix uan onikitak Ananías.

¹⁴ Uan ijua onechili: “Non inDios non iuejka totatauan omitzixtlali sta

kachto para tikixmatis tlenon ijua kineki, uan para xikita nin yolmelajke Jesus uan xikkaki itlajtol. ¹⁵ Uan tejua tikimilis nochtin nin tlakaj nin chantij ipan nin tlale tlenon otikkak uan tlenon otikitak. ¹⁶ Uan axkan, ayikmo xikchia. Ximoketza uan ximokuateki. Ximotlatlajti itech Señor para ma mitzchipauli non motlajtlakotl.”

Pablo okijto kenika Dios okititlan ma kinnojnotzati non amo judíos

¹⁷ Kuak onokuek Jerusalén, oniya onotlatzajtzilito ijtek non tiopantle, uan onikochitak tlenon. ¹⁸ Onikitak non Señor, uan onechili: “Uiliui xikisa nikan Jerusalén. Nin tlakaj amo mitzneltokaskej non tlenon titlajtoua ka nejua.” ¹⁹ Uan nejua onikili: “Señor, ijuan kimatij nejua oniyaya noyoka ijtek non intiopanuan non judíos, uan onikintzajtakuaya non omitzneltokayaj, uan onikimmakiliaya. ²⁰ Uan ijkuak okimiktikej Esteban, non motekit non otlajtouaya moka, nejua noteuan ompa onaktaya uan onitemakak notlajtotl para ma kimiktikan, uan sta onimokuitlaui non intzotzoma non okimiktikej.” ²¹ Mas nin Señor onechili: “Xiya, nejua timitztitlanis uejka, para tikinnojnotzas non tlakaj non amo judíos.”

Pablo ka imak non soldado tlanauatiani

²² Sta nikan ipan nin tlajtole okikakej Pablo, uan satepan opejkej tzajtzi:

—¿Ma miki nin tlakatl, ma ayikmo nemi!

²³ Uan ijuan amo omojkajkauayaj otzajtziyay, uan okitlamotlayaj non intzotzoma uan okikuiyay tlale uan okichayauayaj tlakpak. ²⁴ Uan non soldado tlanauatiani otlatekimakak para ma kikalakikan Pablo ijtek non komandansia, uan oteili ma kimakilikan para kimatiskej tleka non tlakaj okajuayaj. ²⁵ Mas ijkuak yokilpijka para kimakiliskej, Pablo okili non soldado tlayekanke akin ompa oktaya:

—¿Kuali nankimakiliskej sente tlakatl romano, ijkuak ayimo kixkomaka?

²⁶ Kuak okikak nin tlajtole nin soldado tlayekanke, oya okilito non soldado tlanauatiani, okili:

—San kuali. Xikita nin tlenon tikchiuas ika, kue nin tlakatl romano.

²⁷ Ompa non soldado tlanauatiani omopepecho itlak Pablo uan okitlajtlani:

—¿Melauak tiromano?

Pablo okinankili:

—Melauak.

²⁸ Ompa non soldado tlanauatiani okili:

—Nejua ueyi melio onitlaxtla para nochiuas niromano.

Uan Pablo okijto:

—Nejua sta ipan onitlakat niromano.

²⁹ Kiyon non tlakaj non kimakiliskiaj Pablo, okikajkej. Uan ijkuak non soldado tlanauatiani okima nin Pablo romano, omojkamik, por yokilpijka.

Pablo okuikakej ixpan non ueyi injunta non judíos

³⁰ Non soldado tlanauatiani okinekiya kimatis tleka non judíos okiteiluiajaj nin Pablo. Uan non ualmostla okitojton ka non kadenas uan otlatitlan ma kisentlalikan non tiopixtlayekankej uan nochtin non tlakaj non omosentlaliayaj ipan non ueyi junta. Satepan okixti nin Pablo uan okuikak ixpan non junta.

23 Pablo okimitak non tlakaj non oktayaj ipan non ueyi junta, uan okimili:

—Nokniuan, nejua yoninen sta axkan ka kuali notlalnamikilis ixtlan Dios.

² Onkan Ananías, non tiopixke ueyixtika, okintekimakak non sa itlak oktaya Pablo para ma kimakilikan ipan ikamak. ³ Pablo okinankili: —¿Dios mitzmakilis tejua, san ome moxayak tikpia! Tiyeuatika para techixkomakas kenime kijtous non tlanauatile. Kine, ¿tleka titlatekimaka para ma nechmakilikan? ¿Kiyon kijtous non itlanauatil Dios?

⁴ Non ompa oktayaj okijtokej:

—¿Tleka kiyon tiknanankilia nin itiopixke ueyixtika Dios?

⁵ Pablo okijto:

—Nokniuan, nejua amo onimatiya tla ijua non tiopixke ueyixtika, kijtous nin Yektlajkuilole: “Amo xitlajtlato amo kuali ika sente motekichike.”

⁶ Ompa Pablo okima sekin non oktayaj ipan non junta inuan omoketzayaj non saduceos uan oksekin inuan omoketzayaj non fariseos, uan otlajto chikauak:

—Nokniuan, nejua nifariseo, notatajuan fariseos, namejuan nannechixkomakaj por nikneltoka nin yomijmikej moskaliskej.

⁷ Kuak kiyon okijto Pablo, non fariseos uan non saduceos opejkej motlajtolixnamikij siyijuan, uan non tlakaj non oktayaj ipan non junta omotlajkoxelokej. ⁸ Por non saduceos kijtougaj nin yomijmikej amo moskaliaj, uan amo onkatej angeles nian espíritus, mas non fariseos kineltokaj nochi inin. ⁹ Nochtin otzajtziyaj, uan sekin temachtikej itlanauatil Dios, inuan oktayaj non fariseos, omoketzkej uan okijtokej:

—Inin tlakatl amitla kichiua amo kuali. Tikixnamikij Dios tla okinotz sente espíritu o sente angel.

¹⁰ La yopeuayaj kualanij, uan nin soldado tlanauatiani okinemiliaya kikokoskej nin Pablo uan omojkamik. Ompa otlatitlan ma kimanatij soldadotinpara kixtiskej ipan non junta uan kuikaskej okse uelta ipan non komandansia.

¹¹ Non ualmostla ka tlayoua, nin toSeñor okimotiti Pablo uan okili: —Ximoyolchikaua Pablo, kenime yotitenojnotz ka nejua nikan Jerusalén, kiyon iteuan titenojnotzas ipan non tlaueyikan Roma.

Okijtokej kenika kimiktiskej Pablo

¹² Non ualmostla, sekin judíos okijtokej kenika kimiktiskej Pablo, uan omotlajtlauikaltikej, okijtokej amo tlakuaskej uan amo atliskej sta ijkuak yokimiktikej Pablo. ¹³ Opanoyaj ompouale tlakaj non kiyon okijtokej. ¹⁴ Uan ompa oyakej intlak non tiopixtlayekankej uan intlak non ueuentzitzin, uan okimilikej:

—Tejuan yotikijtokej non melauak amitla tikkuaskej uan amitla tikoniskej sta ijkuak yotikimiktikej Pablo. ¹⁵ Axkan namejuan uan nin oksekin tekichikej ipan nin ueyi junta, xiktajtlanilikan non soldado tlanauatiani ma kualika Pablo namixtlan mostla, xikchiuakan ke nankitlajoltiskej, uan tejuan tikchixtaskej para tikmiktiskej ijkuak ayimo uitz asi.

¹⁶ Uan non ikone non situatl iknin Pablo okima nin tlenon kinekij kayitiskej ijua, uan oya okilito Pablo ipan non komandansia. ¹⁷ Ompa Pablo okinotz sente soldado tlayekanke uan okili:

—Xikuika nin telpokatl ika non soldado tlanauatiani por kineki teilis tlenon.

¹⁸ Non soldado tlayekanke okuikak non telpokatl itlak non soldado tlanauatiani, uan okili:

—Pablo, non tzajtzaktika, onechnotz uan onechtlajtlani tla nikneki nikualekas nikan nin telpokatl, akin kineki mitzilis tlenon.

¹⁹Non soldado tlanauatiani okitelan itech imatzin non telpokatl, uan okuikak nenkua uan okitlajtlani:

—¿Tlenon tikneki techilis?

²⁰Ompa non telpokatl okili:

—Non judíos yokijtokej mitziliskej mostla xikuika Pablo ipan nin ueyi junta para kitlajoltiskej. ²¹Mas amo xikinneltoka, pano ompouale intlakaj kipijpiaj. Uan yokijtokej non melauak amo tlakuaskej uan amo atliskej sta ijkuak kimiktiskej Pablo. Uan axkan nepa mitzchixtikatej tlenon tikiytos.

²²Onkan non soldado tlanauatiani okititlan para ma ya non telpokatl, uan okili ma amitla teili tlenon okonili.

Pablo okuikakej itlak non tlanauatike itoka Félix

²³Ompa non soldado tlanauatiani okinnotz ome isoldadojuan tlayekankej, uan okintekimakak ma kimektlalikan ome ciento soldadotinnon san nejnemiskej, yeypouale uan majtlaktle non ipan yaskej kabayos uan ok ome ciento non yaskej ka inlanza. Inimej yaskej ipan non tlaueyikan itoka Cesarea las nueve ka tlayoua.

²⁴Noijke otlatekimakak ma kektlalikan sente kabayo para Pablo ipan yas, uan iteuan okinnauati ma kuikakan ka kualitlak non tlanauatike itoka Félix. ²⁵Inuan okititlan sente amatlajkuilole itech onestaya kiyin:

²⁶“Nejua niClaudio Lisias. Nimitztlajpaloua tejua, tlanauatike ueyixtika Félix. ²⁷Non judíos yokasikaj nin tlakatl uan kimiktiskiaj, mas ijkuak onikma ijua nin tlakatl romano, oniya ka non nosoldadojuan uan onikpaleui. ²⁸Uan oniknekiya nikmatis tleka okiteiluiayaj, uan onikuikak ipan non ueyi injunta non judíos. ²⁹Uan onikma okiteiluiayaj ka non intlanauatil ijuan, mas amitla okichi amo kualitlak para kimiktiskej nian para kitzajtzakuaskej. ³⁰Uan onikma non judíos okijtokej kimiktiskej nin Pablo. Axkan nikan timitztitlanilia. Uan noijke yonikimili non kiteiluij nin Pablo ma yakan motlak uan ma ompa mixtlan kiteiluikan. Tonamiki.”

³¹Ompa non soldadotinkichikej kiyon kenime okimilikej. Okuikakej nin Pablo ka tlayoua sta ipan non tlaueyikan itoka Antípatris. ³²Non ualmostla nin soldadotinnin san onejntakej, omokuepkej Jerusalén ipan non komandansia uan nin oyayaj ipan kabayos okuikakej Pablo.

³³ Kuak oasitoj Cesarea, okimakakej nin amatlajkuilole non tlanauatike uan iteuan okitemaktikej Pablo. ³⁴ Satepan ijkuak yokontlajtolti nin amatlajkuilole, nin tlanauatike okitlajtlani nin Pablo kanin ualeua, uan ijkuak okima ualeua ipan tlale itoka Cilicia, ³⁵ okili:

—Nimitzkakis ijkuak youalakej non mitzteiluijaj.

Ompa otlatekimakak ma kitzajtzakuakan ijtek non ikatl non ueyi Herodes.

Pablo omopaleui ixpan non tlanauatike Félix

24 Satepan ijkuak yopanok makuile tonale, Ananías, nin tiopixke ueyixtika, ouala ipan nin tlaueyikan itoka Cesarea ka sekin non ueuentzitzin uan ka sente tepantlajtoke itoka Tértulo. Inimej oualakej itlak non tlanauatike para kiteiluiskej Pablo. ² Kuak okualekakej Pablo, Tértulo ope kiteiluia, okili nin tlanauatike Félix: —Timitzasojkamatij tejua, ueyixtika tlanauatike, por tejua tikpiaj pakilistle uan yolseuilistle, uan timitzasojkamatij tejua por nin moijuiyanilis nochtin kuali katej nin tlakaj kampa nin titlanauatia. ³ Nochi inin tikseliaj mochipa uan noyoka, uan timitzasojkamatij por nochi inin, tejua ueyixtika tlanauatike Félix. ⁴ Uan axkan para amo timitzuejkauitis, timitztlatlajtia xinechkaki tepitzin. ⁵ Yotikixmatkej inin tlakatl tekokolismaka, uan nouiyan ipan nin tlale tetlajtolmaka uan kinxeloua nin judíos, uan ijua kinyekana non inuan moketzaj non nazarenos. ⁶ Uan okinekiya tlajtlakos ijtek non tiopantle, uan tejuan otikasikej uan otiknekiyaj tikixkomakaskej kenime kijtous totlanauatil. ⁷ Mas non soldado tlanauatiani non itoka Lisias omokalakti ka chikaualistle uan otechkuili nin Pablo. ⁸ Uan okijto non akinon kiteiluia kipia para ualas moka. Tejua kuali tiktlajtoltis para tikmatis tla melauak nochi nin ika tikteiluijaj. ⁹ Non judíos non ompa oktayaj inteuan okijtouayaj melauak nochi nin tlenon yokijto nin Tértulo. ¹⁰ Ompa nin tlanauatike Félix okichi seña ka imatzin para ma tlajto Pablo, uan Pablo okijto: —Ka pakilistle nopaleuis mixpan, por nikmati tejua ikipia miyek xiuitl tiinjues nin judíos. ¹¹ Kenime tejua kuali tikmatis, kimach kipia majtlaktle uan ome tonale onasiko Jerusalén para nikueyitlalis Dios. ¹² Uan amo onechnextikej ka niktajtolmakatika, nian nikimpasolotika nin tlakaj nin katej ijtek nin tiopantle, nian nin katej

ijtek non intiopanuan non judíos, nian nin chantij nouiyan Jerusalén.

¹³ Inin tlakaj auele itlaj nechnextiliskej nin tlenon ika nechteiluiaj.

¹⁴ Mas nimokuitia nejua melauak nitekitua nin inDios nin uejka notatajuan ka nin yankuik ojtle, maski ijuan kijtouaj amo melauak, uan nikneltoka nochi nin tlenon nestika itech nin tlanauatile uan non nestika itech non libros non otlajkuilokej non otlajtouayaj ipatka Dios. ¹⁵ Noteuan nikneltoka Dios kenime ijuan kineltokaj.

Tikneltokaj nin mimikkej moskaliskej, nin kualtin uan nin amo kualtin. ¹⁶ Por uinon mochipa nikneki nikchiuas non tlenon kuali, para nin notlalnamikilis amo nechtlajtlakoltis ka Dios uan ka nin tlakaj.

¹⁷ Oninemiya ipan oksekin tlalmej, uan satepan ijkuak yopanok kana keski xiuitl oniuala ipan nin notlal, para nikimmakas melio non kimpolouaj uan para nikimmiktis yolkamej uan niktlalis ixtlan Dios.

¹⁸ Nejua kiyon onikchijtaya ijkuak oualakej sekin judíos ualeua ipan non tlalet itoka Asia uan onechnextikej ijtek non tiopantle noyolchijajtika kenime kijtousa nin tlanauatile. Mas amo miyekej tlakaj oktayaj notlak uan amikaj onikpasolo. ¹⁹ Ijuan non tlakaj kipiaj para ualaskaj nikan tla itlaj kipia noka para nechteiluiskej. ²⁰ Tla amo kiyon, ma kijtokan nin tlakaj nin nikan katej tla itlaj onechnextilikej amo kuali ijkuak onaktaya ixpan non ueyi injunta non judíos. ²¹ San ijkuak onaktaya inuan, onikijto chikauak: “Axkan nannechixkomakaj por nikneltoka nin yomijmikej moskaliskej.”

²² Nin tlanauatike Félix yokimatiya kuali kenime non tlaneltokakej kitokaj non iyojue Cristo. Kuak okikak nin tlajtole, okika inin para okse tonale, uan okijto:

—Kuak ualas non soldado tlanauatiani Lisias, nikmatis tleka nankiteiluiaj.

²³ Uan Félix okili non soldado tlayekanke ma kimokuitloui Pablo, mas ma kikauakan kitlajpaloskej non isepan, uan tla itlaj kineki, ma kimakakan.

²⁴ Satepan ijkuak yopanok kana keski tonale, ouala okse uelta Félix ika non isiua itoka Drusila. Nin siuatl oktaya judía. Uan Félix otlatekimakak ma kanatij Pablo para ma kinojnotza kenika kineltokaj Jesucristo. ²⁵ Kuak Pablo okili nin Félix kipia para tinemiskej yolmelajkan, kipia para toyekanaskej kuali uan okili asis se tonale ijkuak Dios techixkomakas, Félix omojkamik, uan okijto:

—Axkan xoneua, uan ijkuak nimaxilis, nimitznotzas okse uelta.

²⁶ Nin tlanauatike Félix okichiaya ma kimaka melio Pablo para kikajkauas, por uinon miyekpa okinotzaya para monojnotzaskej.

²⁷ Kiyon opanok ome xiuitl. Ompa Félix omopatlak tlanauatike, uan okalak oksente tlanauatike oitokaya Porcio Festo. Uan Félix okinekiya mokauas kuali ka non judíos, por uinon okika tzaktika nin Pablo.

Pablo omopaleui ixpan nin tlanauatike itoka Festo

25 Ompa Festo oasiko ipan non tlaueyikan itoka Cesarea para tlanauatis, uan ijkuak yopanok yeyi tonale Festo okis Cesarea uan oya Jerusalén. ² Ompa Jerusalén non tiopixtlayekankej uan non judíos tlayekankej okiteiluikej nin Pablo. ³ Omotlatlajtikej itech Festo ma tlanauati para ma kualekakan Pablo Jerusalén. Mas ijuan yomoluijkaj kimiktiskej ipan ojtle. ⁴ Mas nin tlanauatike Festo okinnankili nin Pablo tzajtztaktika Cesarea, uan ijuatl okinemiliaya yas ompa ipan kana keski tonale. ⁵ Okimili:

—Non akinomej namechyekanaj ma yakan noka Cesarea, uan tla non tlakatl yotlajtlako, kuali nankiteiluiskej.

⁶ Nin Festo oktaya Jerusalén kana chikueyi o majtlaktle tonale uan omokuek Cesarea. Uan non ualmostla omotlali kampa motlaliaj non tlaixkomakaj uan otlatekimakak para ma kualekakan nin Pablo.

⁷ Kuak Pablo okalak, omopepechojkej nin judíos nin oualekej Jerusalén, uan okiteiluiayaj ka miyek tlemach kokolti, mas auele itlaj okinextilikej. ⁸ Ompa Pablo omopaleui uan okijto:

—Nejua amitla onitlajtlako, nian ika non intlanauatil non judíos nian ika non tiopantle nian ika non emperador romano.

⁹ Uan Festo okinekiya mokauas kuali ka non judíos, uan okitlajtlani Pablo:

—¿Tikneki tiyas Jerusalén, para ompa nimitzixkomakas?

¹⁰ Pablo okinankili:

—Nikan nika kampa nin tlaixkomaka nin emperador romano, kampa kipiaj para nechteiluiskej. Kenime tejua tikmati, nin judíos amitla nikinchiuilia. ¹¹ Tla yonikchi tlajtlakole para ika nimikis, notemaka para ma nechmiktikan, mas tla amitla nechnextiliaj nin tlenon ika nechteiluiaj, auele kaj nechtemakas immak non judíos. Niktlajtlani ma nechixkomaka nin emperador romano.

¹² Festo satepan ijkuak yokinnojnotz non kitlajtolmakaj, okijto:

—Yotilajtlan mitzixkomakas nin emperador romano. Tias tikitas ijuatl.

Pablo omopaleui ixpan non rey Agripa

¹³ Satepan ijkuak yopanok kana keski tonale non rey Agripa uan non Berenice, non isiua, oyakej Cesarea okitlajpalotoj nin tlanauatike itoka Festo. ¹⁴ Uan omokajkej miyek tonale ompa Cesarea, uan Festo okili nin rey Agripa tlenon opanok ka Pablo, okili:

—Kanka nikan sente tlakatl Félix okika tzaktika. ¹⁵ Kuak onaktaya Jerusalén, non tiopixtlayekankej uan non inueuentzitzin non judíos okitlalikej nomak Pablo uan onechilikej ma nitlajtlakolti para ma kimiktikan. ¹⁶ Nejua onikinnankili nin jues romano amikaj kitlajtlakoltia para ma kimiktikan, tla amo kipia imixtlan non kiteiluijaj para mopaleuis non ika kiteiluijaj. ¹⁷ Por uinon ijkuak ijuan oualakej nikan, amo onikpolo tonale, niman non ualmostla onotlali kampa motlaliyaj non tlaixkomakaj uan onitlatitlan ma kanatij non tlakatl. ¹⁸ Mas non omixpantikej para kiteiluiskej, amo okiteiluikej kenime nejua oniknemiliaya. ¹⁹ Okiteiluiyaj ka non intlanauatil ijuan, uan ika sente tlakatl yomik oitokaya Jesus, uan Pablo okijto ijua yoltika. ²⁰ Uan nejua amo onikmatiya tlenon nikchiuas ika tlajtole ke inin, oniktalajtlani nin Pablo tla kineki yas Jerusalén para ompa kixkomakaskej. ²¹ Mas ijua otlajtlan ma kixkomaka non emperador Augusto, por uinon onitlatekimakak ma kitzajtzakuakan sta ijkuak niktitlanis ika non emperador.

²² Ompa Agripa okili nin Festo:

—Nejua noijke nikneki nikkakis nin tlakatl.

Festo okinankili:

—Niman mostla tikkakis.

²³ Non ualmostla, ijkuak Agripa uan Berenice, non isiua, oualakej, okalakej moueyilitiuej ijtek non ueyi kale, ika non soldadotintlayekankej uan ka non tekichikej ompa ipan non tlaueyikan. Festo otlatitlan ma kanatij Pablo. ²⁴ Uan Festo okijto: —Rey Agripa, uan namejuan tlakaj nin nikan nankatej touan, nikan nankipiaj nin tlakatl. Miyekkej nin judíos yonechnojnotzkej ika ijua, ipan Jerusalén uan ipan Cesarea, uan amo kikajkauaj nechiliaj kipia para mikis. ²⁵ Mas nejua nikita amitla okichi tlajtlakole para kimiktiskej, uan ijua yotlajtlan ma kixkomaka non emperador Augusto, por uinon yonikijto niktitlanis itlak ijua. ²⁶ Uan amo nikpia

tlenon nikchijchiuilis nin noueyixtika emperador, por uinon nikualeka namixtlan, mas kachi timitzixpantilia tejua rey Agripa, para tiklajtoltis para nikpias tlenon nikijkuiluis. ²⁷ Amo kuali nesi tla san tlaliuis niktitlanis ka non emperador sente tlakatl tzaktika uan amo niteilis tleka kiteiluijaj.

Pablo omopaleui ixpan non rey Agripa

26

Ompa Agripa okili Pablo:

—Kuali titlajtos para timopaleuis.

Onkan Pablo okajkok non imatzin uan okijto kiyin:

²—La nipaki por kuali nitlajtos axkan mixtlan, tejua rey Agripa, para nopaleuis nochi non tlenon ika nechteiluijaj nin judíos. ³ Por tejua tikmati nochi kenika tinemij nin tijudíos uan kenika tonojnotzaj. Por uinon timitztlatlajtia xinechkaki nin notlajtotl.

Pablo okijto kenika onemiya ijkuak ayimo okineltokaya Jesus

⁴ Nochtin nin judíos kimatij kenime oninemiya intzalan ipan non notlal uan ipan Jerusalén sta ijkuak nitelpokatl. ⁵ Ijuan noiijke kimatij sta ijkuak nitelpokatl nifariseo uan kuali kijtoskej tla kinekij. Uan nin fariseos ijuan kachi kitlakamatij nin tlanauatile tla amo oksekin judíos. ⁶ Uan axkan onechualikakej nikan para nechixkomakaskej. Nechteiluijaj por nikneltoka Dios kimiskalis nin yomimijkej, kenime Dios okimili non iuejka totatauan. ⁷ Nin majtlaktle uan ome grupos non ipiluan Jacob okichiayaj ma mochiua non tlenon Dios kachto okimili. Por uinon okueyitlaliayaj Dios uan okitekityaj ka tonale uan ka tlayoua. Axkan nechteiluijaj non judíos, tejua ueyixtika rey Agripa, por noiijke nikneltoka inin. ⁸ Kine, ¿amo nankineltokaj namejuan Dios kimiskalis nin mimikkej?

Pablo okijto kenika okintzajtakuaya non tlaneltokakej

⁹ Nejua noiijke kachto oniknemiliaya kipia para nikinchiuilis miyek tlemach amo kuali nin kineltokaj Jesus nin ouale Nazaret. ¹⁰ Uan kiyon onikchi ompa Jerusalén. Ika intlanauatil nin tiopixtlayekankej onikinkalaki ipan cárcel miyekej tlaneltokakej, uan ijkuak okimmiktiayaj, nejua onechpaktiaya. ¹¹ Miyekpa nejua onikimpanoltiaya para nikchiuas ma kikauakan akin kineltokaj.

Kiyin onikchiuaya ijtek nochtin non totiopanuan, uan por la onechkualantiayaj, onikintokak sta ipan tetlatl.

Pablo okse uelta okijto kenika okineltokak Jesus

(Hch. 9:1-19; 22:6-16)

¹² Por uinon oniyaya ipan non tlaueyikan itoka Damasco uan onikuikaya sente amatlajkuilole kampa onestaya intlanauatil non tiopixtlayekankej para nikimasis non tlaneltokakej. ¹³ Mas ipan nin ojtle, tejua rey, ika tlakualespan onikitak otlauilauile ouale tlakpak. Nin tlauiile kachi otlauiaya tla amo non tonale, otlaui nopan uan impan non nouan oyayaj. ¹⁴ Onkan tonochtin otietzkej tlaplan, uan onikkak sente tlajtole onechili ika tlajtole hebreo: “Saulo, Saulo, ¿tleka techtemojtinemi? Siyitejua timokokoua, ke non kuakue ijkuak kiteleksa ikuaikpak non ika kitzopinia ijkuak tekiti.” ¹⁵ Ompa onikijto: “¿Akin tejua, Señor?” Uan nin Señor onechnankili: “Nejua niJesus akin tejua tiktemojtinemi. ¹⁶ Ximoketza, otimitzmotiti para titekitis noka uan titeilis nin tlenon axkan yotikitak uan nin tlenon tikitas ka nejua satepan. ¹⁷ Nimitzmakixtis immak non judíos uan ka non tlakaj non amo judíos, uan axkan nimitztitlani ka ijuan. ¹⁸ Timitztitlani inka para ma mixtlapokan, para ma nejnemikan kampa tlauilkan kampa tlayouakan, uan para ma kineltokakan Dios uan ma amo nemikan imak moxikuani, uan para ma nechneltokakan nejua, para kiyon nikitlajpojpoluis intlajtlakoluan, uan para ma kiselikan tlenon Dios okimmakak non ijuan yokinyolchipaj.”

Pablo okichi tlenon Dios okili

¹⁹ Kiyon kine, tejua rey Agripa, onikchi non itlajtol Jesus non oualeuaya tlakpak. ²⁰ Kachto onikinnojnnotz itlajtol Dios non oktayaj Damasco, satepan non oktayaj Jerusalén uan non oktayaj nouiyan ipan non tlale Judea. Uan nouiyan onikinnojnnotz non amo judíos. Onikinyolchikauaya ma moyolkuepakan ka Dios uan ma kichiuakan tlenon kuali para ma nesi yomoyolkuepej. ²¹ Por uinon non judíos onechasikej ijtek non tiopantle uan okinekiyaj nechmiktiskej. ²² Mas por Dios yonehpaleui sta axkan niyolmelajke uan kuali nikinnojnnotza nochtin, uejueyin uan tetepichichin. Amo keman nikimilia itlaj okse, san nikimilia non tlenon okijtokej non otlajtokej ipatka Dios uan non tlenon okijto Moises panos. ²³ Ijuan okijtokej nin Cristo okiapiaya para kipanós uan mikis uan satepan kachto ijuan

moskalis. Para kimilis nin judíos uan nin amo judíos ijua kimmakixtis ijtek non inlajtlakoluan.

Pablo okinek nin rey Agripa kiyolkuepas ka Dios

²⁴ Kuak Pablo okijto nin tlajtolmej ika omopaleui, Festo okijto chikauak:

—¿Yotiyejyekayouak, Pablo! La yotimomachti sta yotiyejyekayouak.

²⁵ Mas Pablo okinankili:

—Amo yoniyejyekayouak, tejua tlanauatike Festo. Nochi nin tlenon nikijtoua melauak uan kuali moasojkamati. ²⁶ Nikanka nin rey Agripa, ijua kixmati kuali nin tlenon yonikijto, por uinon ka yolmelajkan nitlajtlatoua ixtlan. Nikmati kuali ijua iteuan kimati nin tlajtole, por amo tonojnotzaj san ichtaka. ²⁷ ¿Tikneltoka, tejua rey Agripa, tlenon okijtokej non otlajtokej ipatka Dios? Nejua nikmati tikneltoka.

²⁸ Uan non rey Agripa okinankili:

—¿Tiknemilia san ka nin keski nin tlajtole tinechkuepas nikristiano?

²⁹ Ompa Pablo okijto:

—Tla san keski tlajtole o miyek tlajtole, nejua niktalajtlanilia Dios amo san tejua timokuepas kristiano, mas niktalajtlanilia intean nochtin nin nikan nechkaktatej, ma yekan ke nejua, mas amo nikneki ma kipiakan nin kadenas.

³⁰ Satepan ijkuak kiyin okijto Pablo, omoketzkej nin rey Agripa uan nin tlanauatike Festo uan Berenice uan nochtin non ompa oyejyeuatayaj. ³¹ Uan oyakej nenkua omonojnotzatoj san ka ijuan, uan okijtokej:

—Inin tlakatl amitla okichi para ma kimiktikan nian para tzajtzaktas ipan nin cárcel.

³² Uan nin rey Agripa okili nin tlanauatike Festo:

—Nin tlakatl kuali kikajkauaskia tla ijua amo tlajtlaniskia ma kixkomaka nin emperador Augusto.

Pablo okititlankej ipan non tlaueyikan itoka Roma

27 Kuak okijtokej techtitlaniskej ipan non tlale itoka Italia, Pablo uan non oksekin non otzaktayaj, okintemaktikej imak sente soldado tlayekanke itoka Julio. Nin Julio okinyekanaya se ciento soldadotiniuaxkauan non emperador Augusto. ² Ipan non

chantilistle itoka Adramitio otilejkokej ijtek sente barko. Nin barko yoktaya para kisas para yas atlatenکو ipan non tlale Asia. Oktaya iteuan touan Aristarco. Inin ochantiya ipan non tlaueyikan Tesalónica ipan non tlale itoka Macedonia. ³Non ualmostla otasitoy ipan non tlaueyikan itoka Sidón. Ompa Julio, nin soldado tlayekanke, okinojnotz ka kuali nin Pablo, uan okikauili okintlajpaloto non isepan para ma kipaleuikan. ⁴Otikiskej ipan non tlaueyikan itoka Sidón, uan otipanokej inakastlan non isla itoka Chipre. Uan non yejyekatl oualaya ka tixtlan, por uinon otonaualtijtakej itech non isla. ⁵Otikmelakej ijtek non atl ueyi ixtlan non tlale itoka Cilicia uan Panfilia, uan otasitoy ipan tlaueyikan itoka Mira ipan non tlale itoka Licia.

⁶Ompa ipan nin tlaueyikan non soldado tlayekanke okasik sente barko oualeuaya Alejandría uan oyaya ipan Italia. Uan nin soldado otechili ma titlejkokan ijtek nin barko para tiaskej. ⁷Miek tonalmej otiyakej yolik ipan non atl ueyi, uan la tekio ka otasitoy ixtlan non tlaueyikan itoka Gnido. Oknoma oualaya ka tixtlan non yejyekatl, por uinon otipanokej ixtlan non tlaueyikan itoka Salmón, otimalakachojkej Creta. ⁸Uan la tekio ka otiyakej ka tlajtlatlentle, otasitoy sejkan itoka Buenos Puertos. Ompa ayikmo uejka oktaya nin tlaueyikan Lasea.

⁹La miyek tonalmej otinempolokej, uan la tekio yomochijka para tinejnemiskej ipan non atl ueyi, por yotlankej non tonalmej ijkuak omosauayaj uan por youalasitaya non tonalmej ijkuak kachi yejyeka. Por uinon Pablo okintlajtolmakak. ¹⁰Okimili:

—Tlakaj, nikita axkan nin tiaskej ipan nin atl la tekio, uan nikmati tikposloskej nin barko uan nin itlamamalis, uan sta tejuan kuali timijmiskiskej.

¹¹Mas inon soldado tlayekanke amo okikak Pablo, kachi okikak non iuaxka non barko uan non kinejnemitia. ¹²Uan ipan nin Buenos Puertos amo uetl kuali oktaya para ompa tokauaskiaj ipan non metzmej ijkuak seua. Por uinon kachi miyekej okinemilikej kisaskej ompa para kisaskej tla kuali asiskej Fenice. Fenice okipiaya itlachialis kampa ka kalaki non tonale uan oktaya ipan non tlale itoka Creta.

La oyejyekak ipan non atl ueyi

¹³ Ompa ope yejyeka san kuakuale ka tlatzintlan. Otiknemiliayaj kuali tinejnemiskej okseki. Otikiskej uan otiyakej ka atlatenko itech non tlale itoka Creta. ¹⁴ Mas satepan okixnamik nin barko nin yejyekatl chikauak nin oitokaya Nordeste. ¹⁵ Non yejyekatl ope kuika nin barko. Uan auele otikixnamikiyaj non yejyekatl, uinon otikajkej ma techuika. ¹⁶ Otipanokej ikuitlapan sente tetepitzin isla oitokaya Claudia, ompa amo oyejyekaya chikauak. Non barko ueyi okuelantaya sente barko tetepichin, uan san yolik otiktletjkauikej. ¹⁷ Satepan ijkuak yotiktletjkauikej nin barko tetepichin, otiktletjkauikej nin barko ueyi. Uan otimojkamikiyaj tiaskiaj tikalakiskiaj ijtek non xale non itoka Sirte, otikintemouikej non ilonajuan non barko uan otikajkej ma kuika nin yejyekatl. ¹⁸ Non ualmostla, ok oyejyekaya chikauak, ompa otipejkej titlatlatlamotlaj ijtek non atl ueyi non okimamajtaya non barko. ¹⁹ Uan non ualuiptla ika tomauan otiktlatmotlakej ijtek non atl ueyi non tlenon okuikaya non barko. ²⁰ Miek tonalmej amo otikitakej nin tonale nian nin sitlalmej, uan oyejyekaya la chikauak totech, uan ayikmo otikchiayaj tomakixtiskej.

²¹ Por yotipanokaj miyek tonale amo otitlakuayaj, Pablo omoketz innepantla uan okijto:

—Tlakaj, kachi kuali nannechkakiskiaj uan amo tikisaskiaj Creta para amo tikpanoskiaj nin tlenon tikpanotikatej uan para amitla tikpoloskiaj. ²² Mas axkan ximoyolchikauakan, amo kaj mikis maski nin barko poliuis. ²³ Nin itlayoua onechmotiti sente angel okualtitlan nin Dios nin akin nejua niuaxka uan para ijua nitekiti. ²⁴ Uan non angel onechili: “Amo ximojkamiki Pablo, tejua kipia para timoteixpantis ixpan nin emperador romano, uan por tejua mopampa Dios kimpaleuis para amo mijmikiskej nochtin nin katej motlak ijtek nin barko.” ²⁵ Por uinon, tlakaj, ximoyolchikauakan, nejua nikneltoka Dios uan nikmati kuali kiyon panos kenime onechili non angel.

²⁶ Mas kipia para techuikas uan techtlamotlas non yejyekatl ipan sente isla.

²⁷ Se youale ijkuak yotikaxtolitkej tinejnemij, otechuikatinemiya non yejyekatl ipan non atl ueyi itoka Adria, uan ka tlajko youak nin tlakaj nin tekij ijtek nin barko okitakej iasitikatej ipan tlale.

²⁸ Okitlamachikej nin atl kekechton kipia ka uejkatlan, uan okipiaya

sempouale uan kaxtole uan sente metros uejkatlan, uan ijkuak yonejnenkej tepitzin okse uelta okitlamachikej, uan okipiaya sempouale uan chikome metros.²⁹ Uan por otimojkamikej touitekitiuej itech non temej uejueyin, okintlamotlakej naui teposmej oilpitayaj ikuitlapan non barko, uan ka mojkamilistle okichixkej ma tlajtlanesi.³⁰ Satepan non tlakaj non otekitiyay ijtek non barko okinemiliayaj choloskej, por uinon opejkej kitemouia ipan non atl non barko tetepichin, okichiuayaj ke kintlamotlaskej non teposmej ka ixtlan non barko.³¹ Mas Pablo okimili nin soldado tlayekanke uan non insoldadojuan:

—Tla inimej amo mokauaj ijtek nin barko, namejuan auele nammomakixtiskej.

³² Onkan nin soldadotinkitetekej nin laso non ika oilpitaya non barko tetepichin uan okikajkej ouetzito ijtek non atl.

³³ Uan ijkuak yotlajtlanestaya, Pablo okimiliaya nochtin ma tlakuakan, okimili:

—Yokaxtolti namejuan amo nankochij uan amo nantlakuaj.

³⁴ Namechtlatlajtia xitlakuakan para namomakixtiskej. Amikaj kipolos nian sente itzon.

³⁵ Kuak okijto kiyin, Pablo okikuik sente pantzin, okimakak tlasojkamati Dios imixtlan inochtin. Ompa okikoton uan ope kikua.

³⁶ Onkan nochtin omoyolchikakej uan otlakuakej.³⁷ Otaktayaj por tonochtin ijtek non barko, ome ciento uan yeypouale uan kaxtole uan sente tlakaj.³⁸ Uan satepan ijkuak yotlakuakej uan yoixuikkej, okitlamotlakej nin trigo ijtek nin atl ueyi, para ayikmo yetik yeskia nin barko.

Oapoli nin barko

³⁹ Kuak otlajtlanes, non tlakaj non otekitiyay ijtek non barko amo okixmatiyaj non tlale, uan okitakej itenko non atl ueyi xalyo tlakuakan uan chikuakalaktika. Uan okijtokej kitaskej tla kuali kuikaskej nin barko ompa.⁴⁰ Okintetekej non lasos nin itech oilpitayaj nin teposmej uan okinkajkej ijtek nin atl ueyi. Iteuan okikaxanikej nin ika kinejnemitiaj nin barko kikuitia timón. Uan nin barko ope mopepechoua ka atlatenko.⁴¹ Uan okalakito kampa omonamikiyay ome atl chikauak, uan nin barko otelin ijtek non xale. Non ka ixtlan non barko okalak ijtek non xale. Auele omoliniaya nian por tepitzin, uan non ka ikuitlapan non barko ope kikokototza

non atl.⁴² Ompa non soldadotinokinekiyaj kimmiktiskej non otzaktayaj, para amikaj kikauaskej cholos matlanelojtas.⁴³ Mas non soldado tlayekanke okinekiya kimakixtis nin Pablo, uan amo okinkauili ma kiyon kichiuakan, uan okintekimakak non okimatiyaj matlaneloskej ma tzequinikan kachto ijuan ijtek non atl, para asitiuej ipan non tlale.⁴⁴ Uan non oksekin ma yakan ipan tablas o ipan non yokojkoton non barko. Kiyon omakiskej nochtin ipan tlale.

Pablo oasito ipan non isla itoka Malta

28 Kuak yotomakixtikej tonochtin, otikmatkej non isla itoka Malta.² Non tlakaj non ompa inchan otechyekitakej. Uan por okiajtayaj uan oseuataya, okixotlaltikej sente ueyi tletl, uan otechiluikkej ma topepechokan para tototoniskej.³ Onkan Pablo okikuito kana keski kuauitl uakke, uan ijkuak okitentaya non kuauitl ipan non tletl, sente kouatl okis por otlatotoniaya uan okimatlantek Pablo.⁴ Kuak non ompa inchan okitakej kuapilkatika non kouatl itech non imatzin non Pablo, omoluikkej siyijuan:
—Nin tlakatl uilis temiktiani. Maski omakis ipan nin atl ueyi, nin itlajtlakotl amo kikauilia nemis.

⁵ Mas Pablo omomatsetzelo uan non kouatl ouetzito ipan non tletl, uan amitla opanok ka Pablo.⁶ Nochtin okichixtayaj ma posau non ima o ma uetziti miki. Mas satepan ijkuak youejka kichiaj uan ijkuak okitakej amitla opanoya, oksentlamantle okinemilikej uan opejkej kijtouaj nin Pablo ijua sente dios.

⁷ Sa ompa amo uetl uejka okimpiaya itlaluán sente tlakatl tekichike itoka Publio. Inin tlakatl otechyekitak uan otechili ma ompa tokauakan, uan otokajkej yeyi tonale.⁸ Uan non itata Publio ototoniaya uan otlajiliuiya. Pablo okitlajpaloto, uan satepan ijkuak omotlatzajtzili, okitlali non imatzin ipan uan okipajti.⁹ Uan ijkuak yokimatkej, oualakej non oksekin non kokoxkej non ochantiyaj ipan non isla, uan opajtikej.¹⁰ Uan la otechtlasojtlakej, uan satepan ijkuak otilejkokej okse uelta ijtek non barko, otechmakakej nochi tlenon otinekej para ika tipanoskej ipan ojtle.

Pablo oasito Roma

¹¹ Satepan ijkuak yopanok yeyi metztle ompa ipan non isla, otiyakej ijtek sente barko non ompa opanok non tonalmej ijkuak seuá. Non

barko oualeuaya Alejandría, uan ka ixtlan nin barko okuikaya inxayak non xantojtzimej Cástor uan Pólux. ¹² Otasikej ipan nin tlaueyikan itoka Siracusa itenko nin atl ueyi, kampa otokajkej yeyi tonale. ¹³ Uan ompa otikiskej otiyakej atlatenko uan otasikej sejkan itokayan Regio. Uan non ualmostla ouala yejyekatl ualeua ka tlatzintlan, uan ipan ome tonale otasitoy Puteoli. ¹⁴ Ompa otikinnextikej sekin toknluan uan otechilikej ma inuan tokauakan sente semana, uan satepan otikiskej ompa uan otiyakej Roma. ¹⁵ Non toknluan non inchan Roma yokimatiyaj tejuan tasiskej, uan kiyon otechnamikitoj ipan ojtle sta sejkan itoka Foro Apio uan sta kampa oitokaya Yeyi Kalmej. Kuak Pablo okimitak, okasojkama Dios uan omoyolchika. ¹⁶ Kuak otasitoy Roma, non soldado tlayekanke okintemakti non otzaktayaj ka oksente soldado non otlamokuitlauiaya ijtek non cárcel, mas Pablo okikajkej chantis oksejkan. Iuan okitlalikey sente soldado para ma kimokuitlaui.

Pablo otenojnotz nin kuali tlajtole Roma

¹⁷ Satepan ijkuak yopanok yeyi tonale, Pablo okinsentlali nin tlayekankej judíos nin ochantiyaj ipan Roma. Uan ijkuak omosentlalikey, okimili:

—Noknluan, maski amitla onikchi ka non judíos nian ika non intlanauatil non iuejka totatauan, onechtemakakej ompa Jerusalén ka non romanos. ¹⁸ Kuak onechtlajtolitikej, okinekiyaj nechkajkauaskej por amitla onechnextilikej tlajtlakole para nechmiktiskej. ¹⁹ Mas non judíos amo okinekej ma nechkajkauakan. Por uinon onitlajtlán ma nechixkomaka nin emperador Augusto César, maski amo onikinteiluiko nin noknluan judíos. ²⁰ Por uinon onamechnotz para namechitas uan para namechnojnotzas. Nilpitika ika nin kadena por nikelntoka Jesus non otikchiyaj nin tiisraelitas ma uala.

²¹ Ompa okilikej Pablo:

—Tejuan amikaj techualikiliaj sente amatlajkuilole ualeua Judea kampa ualnestas itlaj moka, nian nin toknluan judíos nin oasikoj nin ualeua ompa, amitla otechilikej amo kuali moka. ²² Tiknekij tikkakiskej tlenon tiknemiliaj. Tikmatij noyoka tlajtouaj amo kuali ka nin yankuik tlamachtile.

²³ Kiyon okitlalilikej se tonale para monojnotzaskej, uan miyekej tlakaj oualakej kampa ochantiya Pablo. Uan ka uatzinkan uan sta ka iyouak okinnojnnotz kenika tlanauatia Dios. Kiyon okinekiya

kinyolkuepas ka Jesus. Okinnojnnotzaya ika non itlanauatil Dios uan ika non libros non otlajkuilokej non otlajtouayaj ipatka Dios. ²⁴ Sekin okineltokakej non tlenon Pablo okijtouaya, uan oksekin amo okineltokakej. ²⁵ Uan amo okinemiliayaj nochtin siyikiyon, por uinon opejkej mejkuaniyaj ompa. Uan Pablo okimili:

—Non melauak okimili non Espíritu Santo non uejka totatauan, ika itlajtol Isaías non otlajtouaya ipatka Dios. Ijua okijto:

²⁶ Xiya uan xikimili non tlakaj:

Namejuan nantlakakiskej, mas amo nankasojkamatiskej, uan nantlachiaskej, mas amitla nankitaskej.

²⁷ Kue nin tlakaj nin inyolo yotepitzkej,

uan amo kuali ka tlakakij,

uan ixtlajtlapachijtikatej,

para ma amo tlajtlachiakan ika inon imixtelolouan,

nian ma amo tlakakikan ka non inakas,

nian ma amo kasojkamatikan ka inyolo,

nian ma amo moyolkuepakan ka nejua para nikipajtis.

²⁸ Xikmatikan namejuan, axkan nikan peua Dios kimmakixtis nin tlakaj nin amo judíos uan ijuan kikakiskej.

²⁹ Kuak Pablo okijto nin tlajtole, non judíos oyakej monojnnotztiuej uan la motlajtolnamiktiuej.

³⁰ Pablo omoka ome xiuitl ijtek non ikatl kampa omokalotiaya, uan okinkalakiaya nochtin non oyayaj okitayaj. ³¹ Amikaj okitlajtlakauiaaya uan otenojnotzaya ka yolchikaualistle kenika tlanauatia Dios. Uan okiteneuaya nin toSeñor Jesucristo.